

Tuhun Vaha Sa I Tyaa Ra San Juan

Tuhun Ndyoo i nduu si minoo rayii

1 Quivi i sino ñuu ñiyivi ta sa iyo Tuhun Ndyoo; maa ra, ra cu Tuhun Ndyoo, sa ndyaa ra sihin ra Ndyoo quivi cuan vatyí Ndyoo cuu tucu maa ra.

²Ndya sa xihna cuii ñi ta sa iyo ra sihin ra Ndyoo Zutu yo.

³Sihin ra cuan i zavaha ra Ndyoo Zutu yo tandihi cuii sa iyo, ta ñahñi sa zavaha ra Ndyoo sa maa tuhun ñi ra.

⁴Tandihí sa ndito ta ndito si sa cuenda ra cuan. Ta zañaha ra sii ñiyivi ñaa sa cuu sa ndisa. Tañi minoo ñúhu cuu ra.

⁵Ñúhu cuan zandisi si nu ñaa. Ta ña cuu ndahva sa ñaa ya sii si.

⁶Sicoo minoo ra i tasi ra Ndyoo. Sinañi ra Juan.

⁷I quisi ra vatyí cuu ra minoo sa ndaa ta cahan ra tuhun sa cuenda ra cu ñúhu cuan vatyí tacuan ta cua sino iñi ñiyivi.

⁸Maa ra Juan cuan, yivi ñúhu cuan cuu ra. Sa ndaa ñi i cuu ra. I tava ra Ndyoo tyiño sii ra vatyí cahan ra sa cuenda ra cu ñúhu cuan.

⁹Vatyí ra cu ñúhu sa ndisa cuan, sa cua saa ra, ta cua cuhva ra sa siñi tuñi vaha sii tandihí ñiyivi.

¹⁰I zavaha ra ñuu ñiyivi sihin ra Ndyoo Zutu yo, zoco quivi i quisi ra ñuu ñiyivi ya, ta ñá nacoto ñiyivi sii ra.

¹¹I quisi ra zuun ñi ñuu ñiyivi sa i zavaha ra, ta zuun ñi ñiyivi ra ñá naquihin vaha ñu sii ra.

¹²Zoco ñiyivi i naquihin vaha sii ra sa ndisa, i saha ra cuhva sii ñu sa nduu ñu zehe ra Ndyoo. Maa ñu cuu ñu sino iñi sa ndisa cuii sii ra.

¹³Ña caa ca ñu tañi caa zehe ñiyivi cuhva iyo si ñuu ñiyivi ya vatyí sa i nacacu saa ñu cuhva cuñi ra Ndyoo.

¹⁴Ta ra cu Tuhun Ndyoo i nduu ra minoo ñiyivi, ta sindyaa ra sihin yo zuhva quivi. Saha xaan ra tumañi iñi sii ñiyivi, ta cahan ra maa ñi sa ndisa. Sa ndyehe yo vatyí cahnu xaan cuu maa ra tañi Ndyoo zutu ra. Minoo tuhun ñi ra cuu zehe Ndyoo sa ndisa, ta yucuan cuenda cuaha xaan cuhva iyo sii ra.

¹⁵I cahan ra Juan sa cuenda ra, ta catyí ra: Ihya ra cuu ra i catyí vatyí vasi minoo ra cuee ca, zoco ñiñi ca ra ta ziqui mi vatyí sa iyo ra ta ziqui i caqui. Catyí ra Juan.

¹⁶Sii tandihí cuii yo tyindyee xaan ra cuaha xaan cuaha xaan saha.

¹⁷Sa cuenda ra Moisés ta sito yo ley ra Ndyoo, zoco sa cuenda ra Jesucristo, ta cuu ñihi yo tumañi ñi sihin ra Ndyoo, ta cuu coto yo ñaa sa cuu sa ndisa cuii.

¹⁸Ta yoñi ca ndyehe sii ra Ndyoo numinoo saha. Zoco sa minoo tuhun ñi ra cuu zehe ra, cuñi xaan ra Ndyoo sii ra, ta maa ra ndyehe sii ra Ndyoo. Ta i nacatyí ra tandihí sihin yo yozo caa iyo ra Ndyoo Zutu yo.

Ra Juan ra i zacoo ndutyá sii ñiyivi, cahan ra sa cuenda ra Jesucristo

¹⁹Ra hebreo ra ñiñi ñuu Jerusalén i tasi ra sii ra cu zutu ta sii ra tyindyee sii ra cu zutu vatyí cua nducu tuhun ra sii ra Juan yoo ra cuu ra.

²⁰Ta i catyí casi ra Juan: Yivi ra Cristo cuu yuhvi.

²¹Ta ziquí i nducu tuhun tucu ra ta catyí ra: ¿Yoo ra cuu oo? ¿Atu ra Elías cuun? Ta i catyí ra Juan: Yivi yuhvi. Ta ziquí i nducu tuhun ra inga saha sii ra Juan ta catyí ra: ¿Atu yoho cuu ra cua quisi, ra cua cahan Tuhun Ndyoo? Ta i catyí tucu ra Juan: Yivi.

²²Ta ziquí i catyí tucu ra cuan sihin ra: ¿Yoo ra cuu oo? Cuñi si vatyí nacatyí ndi sihin ra tasi sii ndi. ¿Ñaa sa cua catyun? ¿Yoo ra cuun?

²³I nacahan ra Juan ta catyí ra: Yuhvi cui minoo ra cana saa sisi huhu ta catyí: “Vasi ra ndyaca ñaha sii yo. Yucuan cuenda zandundo ndo ityí tañi i catyí ra cahan Tuhun Ndyoo”, ra Isaías. Tacuan i catyí ra Juan.

²⁴Ta ra i quisi cuenda ra fariseo

²⁵i nducu tuhun ra sii ra Juan ta catyí ra: Tatu yivi ra Cristo cuun ta yivi ra Elías ta yivi inga ra cahan Tuhun Ndyoo cuun ¿ña cuenda zacoo ndutyon sii ñiyivi?

²⁶Ta i catyí ra Juan: Zacoo ndutyé sihin ndutyá. Nu yucu maa ndo nandyaa minoo ra sa ña sito ndo yoo ra cuu ra.

²⁷I sei sa xihna ñi ñuu ñiyivi ya ta ziquí i saa maa ra, zoco ñiñi xaan ca ra ta ziquí mi. Ta yucuan cuenda ma cuu cui nu muzu ra ta ndasi tyiendu ndisa ra. Catyí ra Juan.

²⁸Ta tandihí ihya, i cuu si nu nañi si Betábara. Ndyaa si cuan ityí caña ñicandyí ndya nu ndyaa yuu Jordán nu tuhva ra Juan zacoo ndutyá sii ñiyivi.

Ra Jesús cuu tañi mvee ticatyí ra Ndyoo

²⁹Ta inga quivi i ndyehe ra Juan vatyí tuhva ra Jesús sii ra, ta i catyí ra: Ndyehe ndo, ihya vasi ra cuu mvee ticatyí ra Ndyoo. Zandasi ra cuatyí sii tandihí ñiyivi ñuu ñiyivi.

³⁰Ihya ra cuu ra quehin tuhun quivi i catyí: “Cuee ca cua quisi inga ra, zoco ñiñi xaan ca ra ta ziquí mi vatyí sa iyo ra ta ziquí i caqui.”

³¹Ta ñá site yoo ra cuu ra quivi cuan, zoco cuñi sa cua coto ñiyivi hebreo sii ra, ta yucuan cuenda vasi zacoo ndutyé sii ñiyivi sihin ndutyá. Catyí ra Juan.

³²Ta i saha ra Juan minoo sa ndaa ta catyí ra: I ndyehi quivi i noo Tatyí li ndya ityí ziquí tañi noo minoo paloma, ta i ndoo si sihin ra.

³³Ta ñá nacote sa xihna ñi yoo ra cuu ra Jesús, zoco ra Ndyoo

Zutu yo i tava ra tyiño sii, sa zacoo ndutye sihin ndutya, ta i catyi ra: “Tatu cua ndyehun vatyi noo Tatyi Ii ta ndoo si sihin minoo ra, yucuan ra cuu ra cua zacoo ndutya sihin Tatyi Ii.” Catyi ra.

³⁴Ta sa i ndyehi cuhva cuan, catyi ra Juan, ta sehi sa ndaa vatyi ihya cuu ra cuu zehe ra Ndyoo.

Ra i casi ra Jesús sa xihna ñi

³⁵Ta i yaha minoo quivi. Ta inga quivi ndyaa ra Juan yucuan inga saha sihin uu tahan ra cutahan sihin ra.

³⁶Ta sa i ndyehe ra vatyi cua yaha ra Jesús ta i catyi ra: Ica ra cu mvee ticatyi ra Ndyoo. Catyi ra.

³⁷Ta sa siñi sa uu tahan ra cutahan sihin ra sa cahan ra Juan, ta i sindyico ra cuan sii ra Jesús.

³⁸Ta ziqui i nandyehi ra Jesús ityi sata ra, ta i ndyehe ra vatyi ndyico ra cuan sii ra, ta i catyi ra Jesús: ¿Ñaa sa nanducu ndo? Ta i catyi ra cuan: Maestro, ¿ndyamaa iyo vehun?

³⁹Ta i catyi ra Jesús: Coho ndo ta cua ndyehe ndo. Ta cuahan ra cuan sihin ra, ta i ndyehe ra nu ndyaa ra Jesús, ta i ndoo ra minoo quivi cuan sihin ra vatyi sa i cuu si tañi caa cumi sa sahiñi cuhva sa i saa ra yucuan.

⁴⁰Ta minoo sa uu tahan ra cuan sa i siñi ra sa catyi ra Juan ta sindyico ra sii ra Jesús, cuu ra Andrés yañi maa ra Simón Pedro.

⁴¹Ta ra Andrés, ñahñi inga ca sa i zavaha ra. Sa xihna cuui ñi i sahan ra ta nanducu ra sii yañi ra, ra Simón, ta i catyi ra: Sa nañihi ndi sii ra Mesías. Catyi ra. (Tuhun

Mesías cuan cuñi si catyi si Cristo a minoo ra sa cua zacacu sii ñiyivi.)

⁴²Ta ziqui i sahan ra Andrés sihin ra Simón ndya nu ndyaa ra Jesús. Ta sa ndyehe ra Jesús sii ra Simón, i catyi ra: Yoho cuu ra Simón zehe ra Jonás, zoco cua cunañun Cefas. (Cuñi si catyi si Pedro a minoo yuu.)

Cana ra Jesús sii ra Felipe ta ra Natanael

⁴³Ta inga quivi cua cuhun ra Jesús ndya nu cu si Galilea, ta i nañihi ra sii ra Felipe ta catyi ra: Cundyicon sii.

⁴⁴Ta ra Felipe cuan cuu ra minoo ra ñuu Betsaida. Hin ñi ñuu maa ra sihin ñuu ra Andrés ta ra Pedro.

⁴⁵Ta i sahan ra Felipe ta nanducu ra sii ra sa nañi Natanael, ta i catyi ra: Sa i ndyehe ndi sii ra i cahan ra Moisés tuhun nu i tyaa ra nu tutu. Ta i tyaa tucu ra profeta sa cuenda ra cuan. Ra Jesús cuu ra sa cahan ra cuan tuhun, ta zehe ra José cuu ra, ra ñuu Nazaret.

⁴⁶Ta i catyi ra Natanael: Ma cuu quita minoo sa vaha ñuu Nazaret cuan. Ta i nacahan ra Felipe ta catyi ra: Coho ta cua ndyehun.

⁴⁷Ta sa i ndyehe ra Jesús sii ra Natanael vasi ra, ta i catyi ra Jesús: Ica minoo ra sa cuu ñiyivi hebreo sa ndisa cuui. Ña tuhva maa ra zandavi ñaha.

⁴⁸Ta ziqui i nducu tuhun ra Natanael ta catyi ra: ¿Yozo caa siton sii? Ta i catyi ra Jesús: I ndyehi suun cuee ca sa cana ra Felipe suun, cuhva sa ndyoon saha yutu higuera cuan.

⁴⁹Ta i catyi ra Natanael: Maestro, yoho cuu zehe ra Ndyoo Zutu yo.

Ra ndyaca ñaha cahnu sii ñiyivi hebreo cuun.

⁵⁰I nacahan ra Jesús ta catyi ra: ¿Atu sihin sa yucuan ñi sino iñun sii vatyi catyi suhun vatyi ndyehi suun saha yutu higuera cuan? Cahnu xaan ca inga sa cua ndyehun ta ziqui ca sa ihya.

⁵¹Sa ndisa catyi suhun vatyi cua ndyehun vatyi cua nuña ityi ziqui ityi andivi ta ángel Ndyoo cua ndaa cua noo ziqui ra i quisi ndya gloria.

Minoo vico tindaha ñuu

Caná nu cu si Galilea

2 Ta i yaha uñi quivi ta ziqui sicoo minoo vico tindaha ñuu Caná nu cu si Galilea. Ta ñoho zihí ra Jesús yucuan.

²Ta i cana ñiyivi sii ra Jesús sihin ra i casi ra vatyi cuhun tucu ra vico tindaha cuan.

³Ta cuahan ra, ta nu yucu ñiyivi yucuan i ndihi vino sihi ñu, ta catyi zihí ra Jesús sihin ra: Ndihi vino.

⁴Ta i nacahan ra Jesús ta catyi ra: Maha, ¿ña cuenda cohon tuhun ña sihin? Tañaha ca tahan si quivi zatyíne.

⁵Zoco i catyi maa ña sihin ñu cu muzu: Zavaha ndo tandihi sa catyi maa ra.

⁶Ta yucuan siyucu iñu tahan quizi yuu nahnu, tahan sa sityiño ñiyivi hebreo sa cuenda costumbre sa nacatya xaan ñu ndaha ñu a ñaa ca. Ta sa minoo minoo quizi cuan cuu cutahan cumi xico a minoo ziendu litro ndutya.

⁷Ta i catyi ra Jesús sihin ñiyivi zatyíno: Zacutu ndo quizi ya sihin ndutya. Ta i zacutu cuii ñu.

⁸Ta ziqui i catyi ra Jesús: Vityi tava ndo zuhva si ta cundyaca ndo

sii ra cu nuu sii vico ya. Ta tacuan i zavaha ñu.

⁹Ta i sihi ra cu nuu sii vico cuan sii ndutya cuan ta sa i nduu si vino, ta ñá sito ra yozo caa sino si. Zoco i sito maa ñu cu muzu cuan vatyi maa ñu i tyihi ndutya sisi quizi cuan vatyi maa ra Jesús catyi, ta i nduu si vino. Ta ra cu nuu sii vico cuan i cana ra sii ra tindaha cuan.

¹⁰Ta i catyi ra sihin ra: Tandihi ñiyivi tuhva ñu saha sa xihna ñi vino vaha, ta tatu sa i sihi ñiyivi cuaha vino ta ziqui cua cuhva tucu ñu vino ndahvi ca coho ñiyivi. Zoco yoho i sicumi vohon vino vaha, ta vityi sohon sii si. (Tacuan i catyi ra vatyi ña sito ra vatyi maa ra Jesús zavaha vino cuan sihin ndutya.)

¹¹Ihya cuu sa xihna ñi sa ndyityi i zavaha ra Jesús ñuu Caná nu cu si Galilea, ta sihin cuhva ya zañaha ra vatyi iyo xaan cuhva sii ra, ta i sino iñi ra i casi ra sii ra.

¹²Ta sa ndihi vico cuan, ta cuahan ra Jesús ñuu Capernaum. Ta cuahan zihí ra ta yañi ra ta ra i casi ra sihin ra. Ta yucuan i ndoo ñu zuhva quivi.

Tava ra Jesús sii ñiyivi zavaha sa ña vaha yuvehe ñuhu cahnu

¹³Sa cuñi tahan si quivi coo vico zuhun cuenda ñiyivi hebreo, ta cuahan ra Jesús ndya ñuu Jerusalén.

¹⁴Ta yucuan nuquehe vehe ñuhu i ndyehe ra vatyi xico ñiyivi zindiqui, mvee ticatyi ta paloma, ta inga ñiyivi ndyaa ñu sa nazama ñu xuhun ñiyivi.

¹⁵Ta sa ndyehe ra Jesús tacuan, i zavaha ra minoo cuarta, ta i tava

ndyizo ra sii ñu sata vehe ñuhu cuan sihin mvee ticaty i ta zindiqui. Ta sii ñiyivi nazama xuhun, i quiti cuaty i ra xuhun ñu nu ñuhu ta i zanduva ra mesa ñu.

¹⁶Ta sihin ñiyivi xico paloma i catyi ra: Tava ndo sii ti ihya. Ma zavaha ndo minoo vehe nuyahvi sii vehe Zuti.

¹⁷Ta sa i ndyehe ra i casi ra cuhva i zavaha ra, ta i nacohon iñi ra vaty i catyi ra David quivi i tyaa ra Tuhun Ndyoo: “Cuñi zativi si sii, vaty zavaha ñiyivi sa ña vaha sisi vehun.”

¹⁸Ta ziqui i nducu tuhun ra hebreo sii ra Jesús ta catyi ra: ¿Ñaa zeña cua zañohon sii ndi ta ziqui cua coto ndi vaty ra cahnu cuun ta cuu zavohon sa tyehen?

¹⁹I nacahan ra Jesús ta catyi ra: Cani ndo vehe ñuhu ya, ta sa cu uñi quivi ta cua zanduvehi sii si inga saha.

²⁰Tacuan ta ziqui i catyi ra hebreo: Uu xico iñu cuiya i zatyño ra zandaa vehe ñuhu ya. ¿Ta ñacu catyun vaty cua zandoon sii si sisi sa uñi quivi ñi?

²¹Zoco vehe ñuhu sa cahan ra Jesús tuhun, zuun ñi coño ñuhu maa ra cuu.

²²Yucuan cuenda, quivi i nandoto ra Jesús ta i nacohon iñi ra i casi ra vaty sa i catyi ra cuhva ya. Ta ziqui i sino iñi ra cuhva catyi tutu Ndyoo ta tuhun cahan ra Jesús sihin ra.

Sito ra Jesús tandihi sa iyo aña ñiyivi

²³Ta quivi sa sindyaa ra Jesús ñuu Jerusalén vico zuhun cuan ta cuaha xaan ñiyivi sino iñi sii ra vaty

ndyehe ñu cuaha xaan sa ndyityi i zavaha ra.

²⁴Zoco ña nii iñi ra Jesús sihin ñiyivi cuan vaty sa sito vaha ra cuhva iyo tandihi ñiyivi.

²⁵Ta ña siñi ñuhu minoo, yoo sa cua cuhva sa ndaa sii ra vaty zuun ñi maa ra ta sa sito ra yozo caa iyo aña ñiyivi.

Ra Jesús sihin ra Nicodemo

3 Sicoo minoo ra fariseo nañi ra Nicodemo. Minoo ra ndyizo tyiño sihin ra hebreo cuu ra.

²Ta i sahan ra minoo sa cuaa sa cua cahan ra sihin ra Jesús, ta catyi ra: Maestro, sito ndi vaty maa ra Ndyoo i tava tyiño suun vaty zacuohon sii ndi vaty yoñi ra cuu zavaha sa ndyityi tañi zavaha moo tatu yivi ra Ndyoo tyindyee sii ra.

³Ta i nacaty i ra Jesús sihin ra: Sa ndisa ta sa ndisa catyi suhun vaty tatu ma nacacu saa ñiyivi, ma cuu cundyaca ñaha ra Ndyoo sii ñu.

⁴Ta i nducu tuhun ra Nicodemo ta catyi ra: ¿Zoco yozo caa cuu nacacu saa minoo ñiyivi tatu sa sahanu ra? Ma cuu nandihvi ra sisi zihhi ra inga saha ta nacacu ra.

⁵Ta i nacahan ra Jesús ta catyi ra: Sa ndisa ta sa ndisa catyi suhun, ra ma coo ndutyta ta ra ma ñihi Taty Ii ra Ndyoo, ma cuu quihvi ra nu ndyaca ñaha ra Ndyoo.

⁶Ra cacu ñiyivi, ñiyivi cuu ra. Zoco ra nacacu saa sa cuenda Taty Ii, sa ndito aña ra.

⁷Ma iyo xaan cuñun vaty catyi suhun vaty cuñi si sa nacacu soon. Ñahñi ca cuhva.

⁸Caá taty tandihi ñi maa ityi. Siñun nduzu si, zoco ña cuu catyun

ndyamaa i quisi si a ndyamaa cuahan si. Ta tacuan tucu iyo ñiyivi sa nacacu cuenda Tatyí Ii.

⁹Tacuan i catyi ra Jesús, ta ziqui i quisaha nducu tuhun tucu ra Nicodemo sii ra ta catyi ra: ¿Ta yozo caa cuu cuhva ya?

¹⁰Ta i nacatyí ra Jesús sihin ra: Ta yoho minoo ra ñiñi cuun, minoo ra zacuaha sii ñiyivi hebreo, ta ña cutuñi iñun tuhun ya.

¹¹Sa ndisa ta sa ndisa catyi suhun vatyí quehin cuhva site ta cui sa ndaa cuhva sa ndyehi, zoco ña sino iñi ndo sa catyi.

¹²Tatu quehin sihin ndo cuhva iyo ñuu ñiyivi ya ta ña sino iñi ndo, ¿yozo caa cua sino iñi ndo tatu quehin sa cuenda sa iyo ndya gloria?

¹³Yoñi ra sa i ndaa xica ndya gloria, maa ñi maa ra sa i noo ndya gloria, ra i quisi ndya gloria, zehe ra ndyaa ndya gloria.

¹⁴Ta tañi i cañihi ra Moisés coo caa cuan sisi cuhu, tacuan tucu cua cañihi ñiyivi sii ra i quisi ndya gloria.

¹⁵Vatyí tacuan ta tandíhi ñiyivi sino iñi sii ra, ma cunaa ñu. Cua cundito ñu tandíhi cuii tyiemvu.

Cuñi xaan ra Ndyoo sii ñiyivi ñuu ñiyivi

¹⁶(Cahan ca ra Jesús, ta catyi ra:) Cuñi xaan ra Ndyoo sii ñiyivi, ta i saha ra sii sa minoo tuhun ñi zehe ra vatyí tandíhi ñiyivi, ñu sino iñi sii ra, ma cunaa ñu. Cua cundito ñu tandíhi tyiemvu sihin ra.

¹⁷Ñá zaquisi ra Ndyoo sii zehe ra ñuu ñiyivi ya sa cuenda sa cua tasi tuñi ra sii ñiyivi. I zaquisi ra sii ra

vatyi cua zandasi ra cuatyí ñiyivi ta cua zacacu ra sii ñu.

¹⁸Ñiyivi sa sino iñi sii zehe ra Ndyoo, ma tasi tuñi ra Ndyoo sii ñu, zoco ñiyivi sa ña sino iñi cua tasi tuñi ra Ndyoo sii ñu vatyí ña sino iñi ñu sii sa minoo tuhun ñi ra cu zehe Ndyoo.

¹⁹Ta ihya cuu cuenda cua tasi tuñi ra Ndyoo sii ñu vatyí i quisi ñúhu ñuu ñiyivi, zoco cuñi xaan ca ñiyivi sa ñaa, ta ña cuñi ñu sii ñúhu vatyí yaha xaan ña vaha cuu cuhva zavaha ñu.

²⁰Tandíhi ñiyivi sa zavaha sa ña vaha, cuxaan xaan ñu ndyehe ñu ñúhu cuan, ta ña tuhva ñu sii si coto ndundisi cuhva ña vaha sa ndyicuu ñu ta cua ndoho ñu.

²¹Zoco ñiyivi zavaha cuhva sasi tahan sihin sa ndisa, tuhva ñu sii ñúhu, vatyí tacuan ta cua coto inga ñiyivi vatyí ra Ndyoo tyindyee sii ñu sihin cuhva vaha zavaha ñu.

Cahan tucu ra Juan sa cuenda ra Jesús

²²Ta sa i yaha cahan ra Jesús ta ziqui cuahan ra sihin ra i casi ra ndya nu cu si Judea, ta i ndoo ra zuhva quivi yucuan, ta i zacoo ndutya ra sii ñiyivi.

²³Ta zuun ñi zacoo ndutya tucu ra Juan ñuu Enón yatyí ñi ñuu Salim vatyí cuaha xaan ndutya iyo yucuan. Ta cuaha xaan ñiyivi i quisi, ta sicoo ndutya ñu.

²⁴Tacuan i cuu si vatyí tañaha ca cua tyihi ñiyivi sii ra Juan vehe caa.

²⁵Tacuan ta ziqui i quisaha natuhun tahan xaan ra cu tahan sihin ra Juan sihin minoo ra hebreo sa cuenda yozo caa nduvaha cuhva iyo ñiyivi.

²⁶Ta i sahan ñiyivi nu ndyaa ra Juan ta catyi ñu sihin ra: Maestro, ra sa sindyaa suhun inga siyo yutya Jordán, ra sa cahan xoon tuhun, vityi zacoo ndutya ra, ta tandihí ñiyivi ndyico sii maa ra.

²⁷Ta i nacahan ra Juan ta catyi ra: Yoñi minoo yo ta cuu coo sa sii yo tatu yivi maa ra Ndyoo saha.

²⁸Zuun ñi maa ndo cuu sa ndaa vatyi sa i catyi sihin ndo vatyi yivi ra Cristo cui. Minoo ra i tasi ra Ndyoo ityi nuu cui.

²⁹Vityi cua quehin minoo cuhva, cuhva iyo minoo vico tindaha. Ra cua tindaha cuan cuu ra sa cua quihin minoo ñaha. Ta amigo ra tindaha cuan, ndyaa ra yucuan. Tyizoho ra, ta cuzii xaan cuñi ra sihin cuhva cahan ra cua tindaha. Tacuan tucu mi vityi. Zii xaan cuñi.

³⁰Ra sa cahan ndo tuhun, cuñi si nducahnu ca ra, ta yuhvi cua nduluhlu que.

Ra i quisi ndya gloria

³¹Ra i quisi ndya gloria, ra cahnu ca cuu ra ta ziqui tandihí inga ñiyivi. Ta ñiyivi ihya, cuenda ñuu ñiyivi ya cuu yo. Cahan yo cuhva iyo ñuu ñiyivi. Zoco ra i quisi ndya gloria ñiñi ca cuu maa ra ta ziqui tandihí ca yo.

³²Ta saha ra sa ndaa sa cuenda sa i ndyehe ra ta sa i siñi ra, zoco yoñi sino iñi sa catyi ra.

³³Zoco tatu iyo minoo ra sa sino iñi sa ndaa sa saha ra cuan, saha tucu maa ra sa ndaa vatyi cahan ra Ndyoo sa ndisa.

³⁴Vatyi ra i tasi ra Ndyoo, cahan ra Tuhun Ndyoo. Vatyi saha maa ra Ndyoo Tatyi li sii ra cuaha xaan.

³⁵Cuñi xaan ra Ndyoo Zutu yo sii Zehe ra, ta tandihí cuii ñaa sa iyo, saha maa ra Ndyoo sii si sii Zehe ra.

³⁶Ñiyivi sino iñi sii Zehe ra Ndyoo, cua cundito ñu tandihí cuii tyiemvu. Zoco ñiyivi ña sino iñi, ma cundito ñu sihin ra Ndyoo. Yaha xaan cua ndoho ñu cua zacuu ra Ndyoo.

Natuhun ra Jesús sihin minoo ñaha samaritana

4 ¹⁻³I sito ra fariseo vatyi cuaha ca ñiyivi ndyico sii ra Jesús ta cuaha ca ñiyivi zacoo ndutya ra ta ziqui ra Juan. Vazu yivi ra Jesús zacoo ndutya sii ñu. Maa ra i casi ra zacoo ndutya sii ñu. Ta sa sito ra Jesús vatyi sa sito ra fariseo cuhva cuan, ta ziqui i quita ra Judea ta cua nuhu ra ndya Galilea.

⁴Ta ityi cuhun ra, cua yaha ra nu cu si Samaria.

⁵Yucuan cuenda saa ra minoo ñuu sa nañi Sicar. Cuenda Samaria cuu ñuu cuan, ta ndyaa si yatyi minoo ñuhu i saha ra Jacob sii ra José zehe ra ta tyiemvu.

⁶Yucuan iyo zoco sa nañi zoco ra Jacob. Sitatu xaan ra Jesús vatyi sica ityi ra, ta yucuan cuenda sicundyaa ra yatyi ñi yuhu zoco cuan. Ta i cuu si maa ora.

⁷⁻⁸Ta ra i casi ra Jesús, cuahan ra ndya ñuu vatyi cua zata ra zuhva sa casi ra. Tacuan ta ziqui i saa minoo ñaha nu ndyaa ra Jesús. Minoo ñaha samaritana cuu ña. Vasi quihin ña ndutya. Ta catyi ra Jesús sihin ña: Cuhva siin ndutya cohi.

⁹Ta i nacahan ñaha samaritana cuan ta catyi ña: Ra hebreo cuun, ta yozo caa vatyi sicon ndutya sii,

ta ñaha samaritana cui. Tacuan i catyi ña vatyí iyo tizihí ñiyivi hebreo sihin ñiyivi samaritana.

¹⁰Tacuan ta ziquí i nacahan ra Jesús ta catyi ra: Tatu sa vatyí siton ñaa sa saha maa ra Ndyoo ta yoo ra sica ndutyá suun, cua cacon sii, ta cua cuhve ndutyá sa cunditon.

¹¹Ta ziquí i catyi ña sihin ra: Tata, ñahní sa ndohon sa cua tavon ndutyá ya, ta cono xaan ñoho ndutyá ya. ¿Ta ndyamaa cua cuhun ndutyá sa saha sa cundito ñiyivi ta cuhvon sii?

¹²¿Atu cahnu ca moo ta ziquí ra Jacob ra cu ñiyivi sahnu sii ndí? Ihya ndutyá i sihi maa ra ta zehe ra ta quití zono ra, ta i zandoo ra ndutyá ya sii ndí. Catyi ña.

¹³Ta i catyi ra Jesús sihin ña: Tandíhi ñiyivi sa cua coho ndutyá ya, cua cu-ityi ñu inga saha.

¹⁴Zoco ñiyivi sa cua coho ndutyá sa cua cuhve, ma cu-ityi ca ñu numinoo saha. Vatyí ndutyá sa cua cuhve, cua caña si sisi añima ñu, ta cua cuhva si sa cundito añima ñu sihin ra Ndyoo.

¹⁵Tacuan ta ziquí i catyi ñaha cuan sihin ra: Tata, cuhvon ndutyá cuan sii vatyí ma cu-ityi que, ta ma quisi quihin que ndutyá zoco ya.

¹⁶Ta i catyi ra Jesús sihin ña: Cuahan cua canon sii yíun ta quisi ndo.

¹⁷Ta i nacahan ña ta catyi ña: Yoñi yíi iyo. Ta i catyi ra Jesús sihin ña: Ndison sa cohon vatyí yoñi yíun iyo.

¹⁸Vatyí sa sicoo ohon tahan yíun. Ta ra sa ndyaa suhun vityí, yívi yíun cuu sii ra cuan sa ndisa. Ndisa sa cohon vatyí yoñi yíun iyo.

¹⁹Tacuan ta i catyi ñaha cuan sihin ra: Tata, tuu iñi vatyí minoo ra cahan Tuhun Ndyoo cuun.

²⁰I zacahnu ñiyivi sahnu sii nduhvi samaritana sii ra Ndyoo ihya yucu ya, zoco ndoho ñiyivi hebreo catyi ndo vatyí Jerusalén cuu nu cuñi si zacahnu ñiyivi sii ra Ndyoo, catyi ña.

²¹Ta i catyi ra Jesús sihin ña: Sino iñun sa quehin, maha, vatyí sa cua saa quívi ta cua zacahnu ndo sii ra Ndyoo Zutu yo, zoco yívi yucu ya ta yívi ndya Jerusalén.

²²Ndoho samaritana ña sito ndo ñaa sa zacahnu ndo, zoco nduhvi sito ndi yoo ra zacahnu ndi. Vatyí cuhva cacu yo vasi si sa cuenda ñiyivi hebreo.

²³Zoco sa cua saa cuhva, ta vityí cuu si, ta ñiyivi sa zacahnu sii ra Ndyoo sa ndisa, cua zacahnu ñu sii ra sihin tandíhi añima ñu ta sihin sa ndisa. Vatyí nanducu ra Ndyoo Zutu yo sii ñiyivi sa cua zacahnu sii ra cuhva cuan.

²⁴Ndyoo cuu ra tatyí, ta ñiyivi zacahnu sii ra, cuñi si vatyí zacahnu ñu sii ra sihin cuhva saha Tatyí li ra ta minoo sa ndisa. Tacuan catyi ra Jesús sihin ña.

²⁵Ta ziquí i catyi ñaha cuan: Site vatyí cua quisi minoo ra sa cua zacacu sii yo, ta Cristo cua cunañi ra. Ta quívi cua quisi ra, cua nacatyí ra tandíhi sihin yo, catyi ña.

²⁶Ta i catyi ra Jesús sihin ña: Zuun yuhvi cui ra cahan suhun ya.

²⁷Ta cuhva sa cahan ra Jesús ta i nasaa ra i casi ra, ta iyo xaan i cuñi ra ñaa cuenda natuhun xaan ra Jesús sihin minoo ñaha. Zoco numinoo ra, ta ñá cuñi ra nducu

tuhun ñaa sa cuñi ña a ñaa tuhun cahan ra sihin ña.

²⁸Ta ziqui i zandoo ñaha cuan quiyi ña, ta cuahan ña ndya ñuu, ta i nacatyí ña sihin ñiyivi:

²⁹Coho ndo cua ndyehe yo sii minoo ra nacatyí sihin tandihi cuii sa zavehi. ¿Atu yivi ra Cristo cuu ra? Catyi ña.

³⁰Tacuan ta ziqui i quita ñu ñuu cuan ta cuahan ñu ndya nu ndyaa ra Jesús.

³¹Cuee ca sa saa ñiyivi yucuan ta i zañiñi ra i casi ra Jesús sii ra ta catyi ra: Maestro, casi zuhva.

³²Zoco i catyi ra Jesús sihin ra: Iyo sa sa sasi, zoco ña sito ndo.

³³Tacuan ta ziqui i quisaha nducu tuhun tahan ra i casi ra sii tahan ra, ta catyi ra: ¿Atu iyo minoo ñiyivi sa quisi ndyaca sa sasi ra ya? Catyi ra.

³⁴Zoco i catyi ra Jesús sihin ra: Sa saha tundyee iñi sii, cuu sa zavehi cuhva cuñi ra tasi sii, ta sa zandihí tyiño ra.

³⁵Ma catyi ndo: “Cumañi cumi ca yoo, ta cua naquihin ñiyivi tyiño i zacuu ñu.” Vatyí yuhvi catyi: Ndyehe vaha ndo itu vatyí sa sisa si. Sa cuu zaquee ñiyivi sii si.

³⁶Ta ra sa cua naquihin, cua coo yahvi ra. Ta sa cua naquihin ra, cuu cuenda tandihí cuii tyiemvu. Ma cunaa si. Vatyí ra tasi ta ra cua naquihin cua cuzii xaan iñi nduu tahan ra.

³⁷Ta ihya cuu minoo sa ndisa cuhva cahan ñiyivi: “Minoo ra tasi ta inga ra naquihin.”

³⁸Tave tyiño sii ndo vatyí naquihin ndo nu ñá ndyehe ndo tundoho. Inga ra zatyíño ta vityí nañihi maa ndo sa vaha nu zatyíño

ra cuan. (Tacuan i catyi ra Jesús sihin ra i casi ra.)

³⁹Ta cuaha xaan ñiyivi ñuu Samaria i sino iñi ñu sii ra Jesús sa cuenda sa i nacatyí ñaha cuan vatyí i catyi ña: “I nacatyí ra sihin tandihí cuii sa i zavehi.”

⁴⁰Yucuan cuenda zañiñi ñu sii ra Jesús vatyí ndoo ra sihin ñu. Ta i ndoo ra Jesús uu quivi yucuan.

⁴¹Ta cuaha xaan ca ñu i sino iñi ñu sii ra Jesús sa cuenda tuhun i cahan ra sihin ñu.

⁴²Ta ziqui i catyi ñu sihin ñaha cuan: Vityí sino iñi ndi sii ra ta ña iñi ñi sa cuenda tuhun i nacatyí moo, zoco vityí zuun ñi maa ndi siñi ndi sa cahan ra, ta sito ndi vatyí ndisa ra Cristo cuu ra, ra cua zacacu sii ñiyivi ñuu ñiyivi.

Zanduvaha ra Jesús sii zehe minoo ra ndyaca ñaha

⁴³I yaha uu quivi, ta i quita ra Jesús yucuan ta cuahan ra ndya nu cu si Galilea.

⁴⁴Vatyí sa catyi maa ra vatyí minoo ra cahan Tuhun Ndyoo, ña tyaa ñiyivi yahvi sii ra ñuu ra.

⁴⁵Ta sa i saa ra Jesús ndya Galilea, ta yucuan zii xaan i cuñi ñiyivi sihin ra vatyí sa i sahan ñu vico zuhun ñuu Jerusalén ta i ndyehe ñu tandihí sa i zavaha ra Jesús yucuan.

⁴⁶Tacuan ta ziqui i naquita tucu ra Jesús ndya ñuu Caná sa ndyaca ñaha Galilea nu i zanduu ra vino sii ndutyá quivi cuan. Ta yucuan iyo minoo ra ñuu Capernaum. Cahnú xaan tyiño ndyizo ra cuenda ra cu rey. Ta cuhu xaan zehe ra ndya ñuu ra.

⁴⁷Ta sa sito ra cuan vatyí sa i quita ra Jesús Judea ta nasaa ra

Galilea, i sahan ra nu ndyaa ra sa cua cahan ra sihin ra vatyi cuhun ra ndya vehe ra ta zanduvaha ra sii zehe ra vatyi sa cuñi cuu ra.

⁴⁸Tacuan ta i catyi ra Jesús sihin ra: Tatu ma ndyehe ndo zeña ta sa ndyityi, ma sino iñi ndo sii.

⁴⁹Zoco i catyi ra ndyizo tyiño cuan sihin ra: Tata, coho vityi vityi ñi cuee ca sa cuu zehi.

⁵⁰Ta i catyi ra Jesús sihin ra: Cuahan ndya vehun. Sa nduvaha zehun. Tacuan ta i sino iñi ra sa catyi ra Jesús, ta i quihin ra ityi cuahan ra.

⁵¹Ta ityi cuahan ra ta i ñihi tahan muzu ra sihin ra ta catyi ra: Ñá sihi zehun.

⁵²Tacuan ta ziqui i nducu tuhun ra: ¿Ñaa cuhva i quisaha nduvaha zehi? Ta i catyi muzu cuan: Icu, cuhva caa iin sa yaha ora i quita cahñi cuan.

⁵³Tacuan ta i sito ra vatyi i cuu si zuun ñi cuhva sa i catyi ra Jesús sihin ra: “Sa nduvaha zehun.” Ta i sino iñi ra cuan sii ra Jesús sihin tandihi ñiyivi sii ra.

⁵⁴Ta ihya cuu sa cu uu sa ndyityi i zavaha ra Jesús sa quita ra Judea ta nasaa ra Galilea.

Zanduvaha ra Jesús sii minoo ra xii nu iyo minoo pila sa nañi Betesda

5 Ta sa yaha cuan ta ziqui i cuu si minoo quivi sa zacahnu ñiyivi hebreo minoo vico, ta cuahan ra Jesús ndya ñuu Jerusalén.

²Ta ñuu Jerusalén iyo minoo pila sa nañi Betesda sihin zahan hebreo. Iyo ohon tahan yuvehe nu cuu quihvi ñiyivi ndya nu ndyaa

si. Ndyaa yuñuu iyo pila cuan vatyi minoo yuhu nuzama sa nañi: Nu Quihvi Mvee Ticatyi.

³Ta vatyi ñi yu pila cuan candyaa cuaha xaan ñiyivi cuhu, tañi: ñu cuaa, ta ñu coxo, ta ñu xii. Ndatu ñu sa cua canda ndutya sisi pila cuan.

⁴Vatyi iyo saha, noo minoo ángel ndya pila cuan ta zacanda si ndutya, ta ziqui yoo ra cua quihvi si ndutya cuan sa xihna ñi, yucuan cuu ra cua nduvaha, ñaa ndihi cuii ca cuehe cuhu ra.

⁵Ta yucuan ndyaa minoo ra sa oco sahun uñi cuiya sa cuhu ra.

⁶Ta i ndyehe ra Jesús sii ra candyaa ra yucuan, ta i nacoto ra vatyi sa naha xaan tahan ra tacuan, ta i nducu tuhun ra sii ra: ¿Atu cuñun nduvohon? catyi ra.

⁷I nacahan ra cuhu cuan ta catyi ra: Tata, yoñi sa cua tyihi sii sisi ndutya ya cuhva sa canda si. Tandihi saha cuñi quihvi, zoco quihvi inga ra sa xihna ñi.

⁸Tacuan ta i catyi ra Jesús sihin ra: Nduvito; natuun yuun ta cacon.

⁹Ta zuun ñi caa cuhva cuan ndaha nduvaha ñi ra, ta i natuu ra yuu ra ta quisaha sica ra. Ta quivi cuan, minoo quivi quitatu ñiyivi cuu si.

¹⁰Yucuan cuenda i catyi ñiyivi hebreo sihin ra nduvaha cuan: Vityi cuu quivi quitatu yo. Ña tahan si cuizon yuun.

¹¹Ta i nacahan ra sa nduvaha cuan ta catyi ra: Ra zanduvaha sii, i catyi ra: “Nacuhun yuun ta cacon.”

¹²Tacuan ta ziqui i nducu tuhun ñiyivi sii ra sa nduvaha cuan ta catyi ñu: ¿Ta yoo ra cuu ra sa i

catyi suhun vatyí nacuhun yuun ta cacon?

¹³Zoco ña sito ra sa nduvaha cuan yoo ra zanduvaha sii ra vatyí sa quihvi ra Jesús ticui ñiyívi, ta cuaha xaan ñiyívi yucu yucuan.

¹⁴Ta cuee ca i nañihi ra Jesús sii ra sisi vehe ñuhu, ta i catyi ra sihin ra: Ndyehe vityí vatyí sa nduvohon. Ma zavaha con cuatyí, coto quisi inga tundoho cahnu ca zicun.

¹⁵Tacuan ta ziquí cuahan ra cuan, ta i nacatyí ra sihin ñiyívi hebreo vatyí ra Jesús cuu ra i zanduvaha sii ra.

¹⁶Ta yucuan cuenda i cuxaan xaan ñiyívi hebreo sihin ra Jesús ta i cuñi cahñi ñu sii ra vatyí i zavaha ra cuhva cuan quívi quitatu ñiyívi.

¹⁷Zoco i catyi ra Jesús sihin ñu: Tandihí tyiemvu zatyíño ra Ndyoo Zuti, ta yuhvi zatyíño tuqui. Catyi ra.

¹⁸Ta yucuan cuenda cuñi xaan ca ñiyívi hebreo sa cahñi ñu sii ra Jesús vatyí ña tyaa ra yahvi ley sa cuenda quívi quitatu ñiyívi, ta catyi tucu ra vatyí ra Ndyoo cuu Zutu ra ta zacuu ra sa iin ñi ra cuu ra sihin ra Ndyoo.

Iyo xaan cuhva sii Zehe ra Ndyoo

¹⁹Tacuan ta ziquí i catyi ra Jesús: Sa ndisa catyi sihin ndo vatyí ñahñi sa cuu zavaha ra cu Zehe ra Ndyoo sa maa ñi maa ra. Zavaha ra cuhva sa ndyehe ra vatyí zavaha Zutu ra, vatyí tandihí cuhva zavaha ra Ndyoo Zutu ra, ta tacuan tucu zavaha Zehe ra.

²⁰Cuñi xaan ra Ndyoo Zutu yo sii Zehe ra, ta zañaha ra sii ra tandihí cuii sa zavaha maa ra. Ta cua

zañaha tucu ra inga cuhva cahnu ca sii Zehe ra, tacuan ta iyo xaan cua cuñi ndo.

²¹Vatyí tañi tuhva ra Ndyoo Zutu yo zanandoto sii ñiyívi i sihi ta saha ra sa cundito ñu, ta tacuan tucu Zehe ra, saha ra sa cundito yoo ñiyívi cuñi ra.

²²Ta Ndyoo Zutu yo, ña tyicuhva ra sii ñiyívi. Saha ra tandihí cuhva cuan sii Zehe ra sa tyicuhva ra sii ñiyívi.

²³Tacuan i zavaha ra Ndyoo vatyí cuñi ra sa cua zacahnu ñiyívi sii Zehe ra tañi zacahnu ñu sii ra Ndyoo Zutu ra. Ñiyívi ña zacahnu sii Zehe ra Ndyoo, ña zacahnu tucu ñu sii Zutu ra vatyí maa ra i tasi sii ra.

²⁴Sa ndisa catyi sihin ndo: Ra sa siñi sa quehin ta sino iñi ra sii ra i tasi sii, cua cundito ra tandihí cuii tyiemvu. Ma tasi tuñi ca ra Ndyoo sii ra. Ma cuu cuii añima ra, cua cundito ra tandihí cuii tyiemvu.

²⁵Sa ndisa catyi sihin ndo vatyí sa cua saa cuhva, ta vityí cuu si, ta iyo ñiyívi tañi sa sihi ñu sa cuenda cuatyí ñu zoco cua cuñi ñu sa cahan Zehe ra Ndyoo. Ta ñiyívi tyaa yahvi, cua cundito ñu tandihí cuii tyiemvu sihin ra Ndyoo.

²⁶Vatyí iyo cuhva sii Ndyoo Zuti sa cuhva ra sa cundito ñiyívi tandihí cuii tyiemvu. Ta tacuan tucu i saha ra sii Zehe ra sa cuhva ra sa cundito ñiyívi.

²⁷Ta i saha tucu ra Ndyoo cuhva sii Zehe ra vatyí zandaa ra tyiño cuenda ñiyívi vatyí ra i quisi ndya gloria cuu ra.

²⁸Ma iyo xaan cuñi ndo vatyí quehin tuhun ya vatyí cua saa

cuhva ta tandihi ñiyivi i sihi cua cuiñi ñu sa cahan Zehe ra Ndyoo.

²⁹Ta cua quita ñu sisi ñaña. Ñiyivi i zavaha sa vaha, cua nandoto ñu ta cua cundito ñu. Zoco ñiyivi i zavaha sa ña vaha, cua nandoto ñu ta cua ndoho ñu.

Cuhva cuu coto yo vatyí cuu zacuu ra Jesús tandihi

³⁰(Cahan ca ra Jesús ta catyi ra:) Ñahñi sa cuu zavehi sa maa ñi mi. Cuhva catyi maa ra Ndyoo sihin, ta tacuan zandei tyiño cuenda ñiyivi. Ta ndoo xaan cuu cuhva zandei tyiño vatyí ña nduqui cuhva zavehi cuhva cuiñi mi, zoco zavehi cuhva cuiñi ra i tasi sii.

³¹Tatu zuun ñi mi saha sa ndaa sa cuende, ña sito ñiyivi tatu quehin sa ndisa.

³²Zoco iyo inga ra saha sa ndaa sa cuende, ta site vatyí ndisa cuu sa ndaa sa saha ra sa cuende.

³³I tasi ndo tyiño, ta i nducu tuhun ndo sii ra Juan. Ta cuhva i catyi maa ra, sa ndisa cuu si.

³⁴Zoco ña siñi ñuhu sa cuhva ñiyivi sa ndaa sa cuende. Zoco catyi cuhva ya vatyí cuiñi sa cua cacu ndo.

³⁵I cuu ra Juan tañi minoo lámpara. Cayu si ta zandisi si. Ta zii xaan i cuiñi ndo zuhva quivi sihin ñúhu i saha maa ra.

³⁶Zoco iyo minoo sa ndaa sii. Ñiñi ca si ta ziqui sa ndaa sa saha ra Juan. Zuun ñi cuhva zavehi cuu sa ndaa. Ta zañaha si vatyí i tasi ra Ndyoo Zuti sii, sa ndisa. Ta maa ra cuu ra i catyi vatyí zavehi cuhva ya ta zandehi sii si.

³⁷Ta ra Ndyoo Zuti, ra i tasi sii, cahan tucu ra sa cuenda mi. Tañaha ca cuiñi ndo sa cahan ra a ndyehe ndo sii ra.

³⁸Ta ñahñi tuhun ra iyo añima ndo vatyí ña sino iñi ndo sii ra i zaquisi ra.

³⁹Nanducu xaan ndo sisi tutu Tuhun Ndyoo vatyí sica iñi ndo vatyí yucuan cua nañihi ndo cuhva cacu añima ndo ta ma cuu cuiñi ndo. Ta zuun ñi yucuan cuu nu saha si sa ndaa sa cuende.

⁴⁰Zoco ña cuiñi ndo sino iñi ndo sii ta ñihi ndo sa cundito ndo.

⁴¹Ña sica xaan iñi tatu tahan iñi ñiyivi sii a ña tahan iñi ñu.

⁴²Zoco sa site sii ndo, ta site vatyí ña cuiñi ndo sii ra Ndyoo.

⁴³Vasi sa cuenda ra Ndyoo Zuti, ta ña sino iñi ndo sii. Zoco tatu cua quisi inga ra sa cuenda sa zuun ñi maa ra, sii maa ra cuan cua sino iñi ndo.

⁴⁴¿Yozo caa cuu sino iñi ndo? Ma cuu vatyí saha ndo sa zacahnu ñiyivi sii ndo ta zacahnu ndo sii ñu. Ta sii sa minoo ñi ra cuu Ndyoo, ña nanducu ndo cuhva cuzii iñi maa ra sihin ndo.

⁴⁵Ma caca iñi ndo vatyí yuhvi cua tyei cuatyí sata ndo nuu ra Ndyoo Zuti. Iyo minoo ra sa tyaa cuatyí sata ndo. Zuun ñi maa ra Moisés cuu ra. Ta ñii xaan iñi ndo vatyí maa ra cua zacacu sii ndo.

⁴⁶Zoco tatu sa i sino iñi ndo sa ndisa cuhva cahan ra Moisés, ta vityí cua sino iñi ndo sii, vatyí i tyaa ra Moisés sa cuende.

⁴⁷Zoco tatu ña sino iñi ndo sa i tyaa ra, zuun ñi cuhva cuan ma cuu

sino iñi ndo sa quehin. (Catyi ra Jesús sihin ñiyivi hebreo cuan.)

**Saha maa ra Jesús sa
casi ohon mil rayii**

6 Ta sa ndihi cahan ra Jesús tuhun cuan, ta ziqui cuahan ra ndya inga siyo miñi cahnu sa nañi Galilea. Ta inga zivi si cuu Tiberias.

²Ta cuaha xaan ñiyivi ndyico sii ra vatyi i ndyehe ñu sa ndyityi i zavaha ra sihin ñiyivi cuhu nu i zanduvaha ra sii ñu.

³Ta i ndaa ra Jesús minoo yucu, ta yucuan i sicundyaa ra sihin ra i casi ra.

⁴Ta sa cuñi tahan si quivi coo minoo vico cuenda ñiyivi hebreo.

⁵Ta nandyehé ra Jesús vatyi cuaha xaan ñiyivi ndyico sii ra, ta i catyi ra sihin ra Felipe: ¿Ndyamaa cua zata yo sa casi ñiyivi ya?

⁶Tacuan i catyi ra vatyi cuñi ra ndyehe ra ñaa sa cua catyi ra Felipe vatyi sa sito ra Jesús ñaa sa cua zavaha ra.

⁷Tacuan ta i catyi ra Felipe sihin ra: Vazu uñi mil peso pan, zoco ma ñihi si casi ñiyivi zuhva zuhva ñi.

⁸Ta ra Andrés, minoo ra i casi ra Jesús cuu ra ta yañi ra Simón Pedro, ta maa ra Andrés cuan i catyi:

⁹Iyo minoo ra luhlu ihya; ndyizo ra ohon tahan pan ta uu tahan tyiyaca. Zoco ñahñi ñi cuu si cuan nuu sa cuaha xaan ñiyivi ya.

¹⁰Tacuan ta ziqui i catyi ra Jesús: Catyi ndo sihin ñiyivi vatyi nacundyaa ñu. Catyi ra. Ta iyo cuaha cuhu yucuan, ta i sicundyaa ñiyivi tañi ohon mil sa maa ñi rayii (ta ziqui ca ñu zihí ta sa ndyihí).

¹¹Tacuan ta i quihin ra Jesús pan cuan, ta sa yaha saha ra tyahvi ndyoo sii ra Ndyoo ta ziqui i saha ra sii si sii ra i casi ra. Ta i zasa ra cuan sii si sii ñiyivi yucu yucuan. Ta tacuan tucu i zavaha ra sihin tyiyaca cuan. I saha ra ndya cuhva ndya sa ndaha iñi ñu.

¹²Ta sa ndaha iñi ñu ta catyi ra Jesús sihin ra i casi ra: Naquihin ndo sa nandoo, ta tacuan ta ñahñi si cua tivi.

¹³Tacuan ta i naquihin ra sii si, ta i zacutu ra usi uu tahan tyica sihin yiqui pan cuan sa nandoo ta sa ndihi sasi ñiyivi.

¹⁴Ta sa ndyehe ñiyivi cuan sa ndyityi i zavaha ra Jesús, i catyi ñu: Ndisa cuii vatyi ihya ra cuu ra sa ndyaa tyiño sa quisi ra ñuu ñiyivi ta cahan ra Tuhun Ndyoo. Catyi ñu.

¹⁵Ta i tuu iñi ra Jesús vatyi cuñi ñu quisi tñn ñu sii ra ta zañiñi ñu sii ra vatyi cuu ra minoo rey, ta sa sito ra cuhva cuan i quita ra yucuan ta cuahan ra minoo yucu maa ñi maa ra.

Sica ra Jesús nu ndutya

¹⁶Ta sa cuaa cuan cuahan ra i casi ra Jesús ndya yuhu miñi cuan.

¹⁷Ta i quihvi ra minoo barco, ta i quisaha yaha zava ra miñi cuan vatyi cuñi ra cuhun ra ñuu Capernaum. Ta sa cuaa cuu si cuhva cuan, ta tañaha ca nasaa ra Jesús.

¹⁸Ta ñihi xaan i quisaha canda ndutya vatyi ñihi xaan ñoho tatyí.

¹⁹Ta cuhva sa i yaha ra tañi minoo ohon a iñu kilómetro, tacuan ta ziqui i ndyehe ra sii ra Jesús. Sica ra nu ndutya, ta tuhva ra sii

barco cuan. Ta i yuhu xaan ra i casi ra.

²⁰Zoco i catyi ra Jesús: Zuun yuhvi cui. Ma yuhu ndo.

²¹Tacuan ta ziqui i cuñi xaan ra i casi ra vatyí naquihvi ra Jesús sisi barco. Ta sa i quihvi ra, ta yatyí cuii ñi i saa tu nu cuahan ra.

Nanducu ñiyivi sii ra Jesús

²²Cundisi inga quivi ta i sito ñiyivi sa nandoo inga siyo miñi cuan vatyí sa cuahan ra i casi ra Jesús sihin sa minoo barco sa sindyaa yucuan, ta ña cuahan ra Jesús sihin ra.

²³Zoco cuhva cuan ta i saa inga ca barco, yutu i quita ñuu cahnu Tiberias. I saa tu yatyí ñi nu i sasi ñiyivi pan sa yaha saha ra Jesús tyahvi ndyoo sii ra Ndyoo.

²⁴Tacuan ta sa ndyehe ñiyivi vatyí yoñi ra Jesús yucuan ta nu ra i casi ra, tacuan ta ziqui i quihvi ñu sisi barco sa i saa cuan, ta cuahan ñu ndya ñuu Capernaum cua nanducu ñu sii ra Jesús.

Ra Jesús cuu pan sa saha sa cundito ñiyivi

²⁵Ta sa i saa ñiyivi inga siyo miñi cuan, i nañihi ñu sii ra Jesús ta nducu tuhun ñu: Maestro, ¿ama i soon ihya? Catyi ñu.

²⁶Ta i catyi ra Jesús sihin ñu: Sa ndisa catyi sihin ndo, nanducu ndo sii vatyí i sasi ndo, ta ndaha iñi ndo. Yivi sa cuenda vatyí i cutuñi iñi ndo sa ndyityi i zavehi.

²⁷Ma zatyíño ndo maa ñi sa cuenda ndyayu sa cua casi ndo vatyí cunaa si cuan. Vaha ca zatyíño ndo sa cuenda ndyayu sa

cua coo tandihi tyiemvu, ndyayu sa cua cuhva sa cundito ndo tandihi tyiemvu. Ihya ndyayu cua cuhva ra i quisi ndya gloria vatyí maa ra Ndyoo Zutu yo saha cuhva cuan sii ra sa cuhva ra. (Tacuan i catyi ra Jesús.)

²⁸Tacuan ta i nducu tuhun ñiyivi sii ra: ¿Ñaa sa cuñi si zavaha ndi ta cua zavaha ndi tandihi cuii cuhva cuñi ra Ndyoo? Catyi ñu.

²⁹Ta i nacahan ra Jesús ta catyi ra sihin ñu: Ihya cuu sa cuñi ra Ndyoo zavaha ndo. Sino iñi ndo sii ra i tasi ra.

³⁰Tacuan ta ziqui i nducu tuhun ñu sii ra: ¿Ñaa zeña cua zañohon sii ndi ta ndyehe ndi ta sino iñi ndi suun? ¿Ñaa sa cua zavohon?

³¹Ñiyivi sahnu sii ndi ta sa naha, i sasi ñu maná sisi cuhu tañi catyi tutu ra Ndyoo: “Saha maa ra Ndyoo pan sa quisi ndya ityi ziqui vatyí casi ñu.”

³²Tacuan ta i catyi ra Jesús sihin ñu: Sa ndisa catyi sihin ndo vatyí yivi ra Moisés saha pan sa quisi ndya ityi ziqui. Ra Ndyoo Zuti cuu ra saha pan sa cuu pan sa quita ityi ziqui sa ndisa cuii.

³³Vatyí pan sa saha maa ra Ndyoo cuu ra i quita ndya andivi ta saha ra sa cundito ñiyivi ñuu ñiyivi.

³⁴Tacuan ta i catyi ñiyivi sihin ra: Tata, cuhva pan cuan sii ndi tandihi cuii tyiemvu.

³⁵Ta i catyi ra Jesús sihin ñu: Yuhvi cui pan sa saha sa cundito ñiyivi. Ñiyivi cua sino iñi sii, ma cuzoco ca ñu ndaha ñi. Ta ma cu-ityi ca ñu numinoo saha.

³⁶Zoco tañi sa catyi sihin ndo vatyí vazu sa ndyehe ndo sii, zoco ña sino iñi ndo sii.

³⁷Tandihí ñiyivi sa saha ra Ndyoo Zuti sii, cua sino iñi ñu sii. Ta ñu sino iñi sii, ma tave sii ñu ityi sata.

³⁸Vatyi ña quite ndya gloria sa zavehi cuhva cuñi mi, zoco vasi vatyi cua zavehi cuhva cuñi ra i tasi sii.

³⁹Ta ihya cuu sa cuñi ra i tasi sii vatyi ma zacunei numinoo ñiyivi sa i saha ra sii. Zoco cua zanandote sii tandihí ñu quivi cua tyicuhva ra Ndyoo sii ñiyivi.

⁴⁰Cuhva cuñi ra Ndyoo Zuti cuu, tandihí ñiyivi sa ndyehe sii Zehe ra ta sino iñi ñu sii ra, cua cundito ñu tandihí tyiemvu. Ta cua zanandote sii ñu quivi cua tyicuhva ra Ndyoo sii ñiyivi. Tacuan i catyi ra Jesús.

⁴¹Ta sa ndihí cahan ra tacuan, ta ziqui i quisaha natuhun xaan ra hebreo vatyi catyi ra Jesús: “Yuhvi cui pan sa i quita ndya andivi.”

⁴²Ta i catyi ñu: ¿Atu yivi ra Jesús cuu ra ya, zehe ra José? Sito yo sii zutu ra ta sii zihí ra. ¿Ñacu catyi ra vatyi ra i quita ndya andivi cuu ra?

⁴³Tacuan ta i catyi ra Jesús: Ma natuhun tahan xaan ndo.

⁴⁴Yoñi sa cuu sino iñi sii tatu ma tyindyee ra Ndyoo Zutu yo sii ra cuan. Ra Ndyoo i tasi sii. Ta cua zanandote sii ñiyivi cuan quivi cua tyicuhva ra Ndyoo sii ñiyivi.

⁴⁵Sisi libro i tyaa ra profeta catyi si tyehen: “Cua zacuahá ra Ndyoo sii tandihí ñu.” Catyi si. Tacuan cu si, ta tandihí ñiyivi sa siñi ta cutuhva ñu sa zacuahá ra Ndyoo Zutu yo, cua sino iñi ñu sii.

⁴⁶Yoñi numinoo ñiyivi sa ndyehe sii ra Ndyoo Zutu yo. Mínoo tuhun ñi ra i ndyehe cuu ra i quita ndya nu ndyaa ra Ndyoo.

⁴⁷Sa ndisa catyi sihin ndo vatyi ra sa sino iñi sii, sa ñihí ra sa cundito ra tandihí tyiemvu.

⁴⁸Yuhvi cui pan sa saha sa cundito ñiyivi.

⁴⁹I sasi ñiyivi sahnú sii ndo maná sisi cuhu, zoco sihi ñu.

⁵⁰Ta quehin tuhun pan sa quisi ndya andivi vatyi cua casi ñiyivi sii si, ta ma cuu ñu.

⁵¹Ta yuhvi cui pan ndito sa i quita ndya andivi. Ta ñiyivi sa cua casi pan ya, cua cundito ñu tandihí cuu tyiemvu. Ta pan sa cua cuhve cuu coño ñuhi. Cua cuhve sii si vatyi tacuan ta cua cundito ñiyivi sihin ra Ndyoo.

⁵²Tacuan i catyi ra Jesús, ta ziqui i quisaha natuhun tahan xaan ra hebreo sihin tahan ra ta catyi ra: ¿Yozo caa cuu cuhva ra ya coño ñuhu ra casi yo?

⁵³Tacuan ta i catyi ra Jesús sihin ra: Sa ndisa catyi sihin ndo vatyi tatu ma casi ndo coño ñuhu ra i quisi ndya gloria ta coho ndo ñiñi ra, ma cundito añima ndo.

⁵⁴Ñiyivi sa cua casi coño ñuhi ta coho ñu ñiñi, cua cundito añima ñu, ta cua zanandote sii ñu quivi cua tyicuhva ra Ndyoo sii ñiyivi.

⁵⁵Vatyi coño ñuhi cuu sa ndisa ndyayu, ta ñiñi cuu sa ndisa sa coho ñiyivi.

⁵⁶Ñiyivi sa cua casi coño ñuhi ta coho ñu ñiñi, iñi ñi cua cuu ñu sihin, ta iñi ñi cua cui sihin ñu.

⁵⁷Tañi sa tasi ra Ndyoo ndito sii ta ndite sa cuenda ra, ta zuun ñi cuhva, ñiyivi sa cua casi coño ñuhi, cua cundito añima ñu sa cuenda mi.

⁵⁸Ta ihya cuu pan sa i quita andivi. Ña iyo si tañi maná sa sasi

ñiyivi sahnu sii ndo ta sihi ñu; vatyi ñiyivi cua casi pan sa quehin tuhun, cua cundito ñu tandihi cuii tyiemvu sihin ra Ndyoo.

⁵⁹I zacuaha ra Jesús cuhva ya nu titahan ñiyivi sisi vehe ñuhu ñuu Capernaum.

**Ihya tuhun saha si cuhva
coto yo yozo caa cundito yo
tandihi cuii tyiemvu**

⁶⁰Ta sa i siñi ñiyivi ndyico sii ra Jesús cuhva cahan ra ta cuaha xaan ñu catyi ñu: Yi xaan cuhva cahan ra. Yoñi sa cuu cutuñi iñi sa cahan ra. Catyi ñu.

⁶¹Zoco i tuu iñi ra Jesús cuhva natuhun tahan xaan ñu ndyico sii ra sa cuenda cuhva i cahan ra, ta i catyi ra sihin ñu: ¿Atu ña tahan iñi ndo tuhun cuan?

⁶²¿Ta yozo caa tatu ndyehe ndo sii ra i quita ndya gloria nandaa tucu ra ndya nu i quita ra? ¿Ñaa sa cua caca iñi ndo?

⁶³Tatyi li cuu sa saha sa cundito aña ñiyivi. Ñahñi tyindyee coño ñuhu ñu. Tuhun quehin sihin ndo cuu sa cuenda aña ndo, ta saha si sa cundito aña ndo.

⁶⁴Zoco iyo zuhva ndo sa ña sino iñi ndo. Tacuan catyi ra Jesús vatyi sa sito ra ndya sa xihna ñi yoo ñu cuu ñu sa ña sino iñi ta yoo ra cua xico tuhun sii ra.

⁶⁵Ta i catyi ra: Yucuan cuenda catyi vatyi yoñi numinoo ndo ta cuu sino iñi ndo sii tatu ma cuhva ra Ndyoo Zuti cuhva cuan sii ndo.

⁶⁶Ta sa ndihi cahan ra Jesús cuhva cuan, ta cuaha ñiyivi ndyico sii ra, i zandoo ñu sii ra ta ña sindyico ca ñu sii ra.

⁶⁷Tacuan ta ziqui i catyi ra Jesús sihin sa usi uu tahan ra i casi ra: ¿Atu cua cahun ndihi tucu ndoho?

⁶⁸Ta i nacahan ra Simón Pedro ta catyi ra: Tata, ¿Yoo sihin cahun ndi? Moo cuu ra nacatyi sihin ndi yozo caa cua ñihi ndi sa cundito ndi tandihi tyiemvu.

⁶⁹Ta sa sino iñi maa ndi ta nacoto vaha ndi vatyi yoho cuu ra Cristo, zehe ra Ndyoo ndito.

⁷⁰Ta i nacahan ra Jesús ta catyi ra: I casi sii ndo sa usi uu tahan ndo, ta minoo ndo cuu minoo cuihna. Catyi ra.

⁷¹I cahan ra Jesús cuhva ya sa cuenda ra Judas Iscariote zehe ra Simón vatyi maa ra cuu ra cua xico tuhun sii ra. Ta minoo sa usi uu tahan ra i casi ra cuu ra.

Ñá sino iñi yañi ra Jesús sii ra

7 Ta sa yaha cuhva cuan ta i sica noo ra Jesús nu cu si Galilea. Ña cuñi ca ra caca noo nu cu si Judea vatyi cuñi cahñi ra hebreo sii ra.

²Ta sa cuñi tahan si quivi zacahnu ñiyivi hebreo minoo vico nu zavaha ñu vehe tyiyahva.

³Ta i catyi yañi ra Jesús sihin ra: Quiton ihya ta cahun ndya Judea vatyi tacuan ta cua ndyehe ñiyivi sino iñi suun ityi cuan tyiñon zavohon.

⁴Vatyi tatu cuñi minoo ra sa cua coto ñiyivi sii ra, ñahñi sa xehe zavaha ra. Tatu zavohon cuhva ya, zavohon sii si nuu tandihi ñiyivi.

⁵Tacuan catyi yañi ra vatyi nu yañi ra ta ñá sino iñi ra sii ra.

⁶Tacuan ta ziqui i catyi ra Jesús sihin ra: Ta saa ca quivi, zoco sa

cuenda maa ndo ta cuu ndya vaha ñi maa quivi.

⁷Ma cuu cuxaan ñiyivi sihin maa ndo, zoco cuxaan xaan ñu sihin mi vatyi nacatyi sa ña vaha sa zavaha ñu.

⁸Cuahan maa ndo vico. Ma cuhin vityi vatyi ta saa ca cuhva cuhin.

⁹Tacuan i cahan ra Jesús sihin ra, ta i ndoo ra Galilea.

**Cuahan ra Jesús vico nu
sino vehe tyiyahva**

¹⁰Ta sa cuahan yañi ra, ta ziqui cuahan tucu ra Jesús, zoco ña cuahan ndisi ra. Cuahan xehe ñi ra.

¹¹Ta i nanducu ra ndyaca ñaha sii ñiyivi hebreo sii ra vico cuan, ta catyi ra: ¿Ndyamaa iyo ra cuan?

¹²Ta natuhun tahan xaan tandihi ñiyivi sa cuenda ra. Iyo ñu catyi ñu: “Vaha ñiyivi cuu ra.” Ta inga ñu catyi: “Ña vaha ra. Zandavi ñaha xaan ra sii ñiyivi.” Catyi ñu.

¹³Zoco xehe ñi cahan ñiyivi sa cuenda ra vatyi yuhu ñu sii ra ndyaca ñaha hebreo.

¹⁴Ta sa yaha zava vico cuan, ta ziqui i quihvi ra Jesús vehe ñuhu cahnu cuenda ñu hebreo ta quisaha zacuahra ra.

¹⁵Ta iyo xaan i cuñi ra hebreo ta catyi ra: ¿Yozo caa sito xaan ra ya ta ñá sahan ra zicuela?

¹⁶I nacahan ra Jesús ta catyi ra: Cuhva zacuehi, yivi sa cuenda ñi mi cuu. Cuenda ra i tasi sii cuu si.

¹⁷Tatu cuñi minoo ndo zavaha ndo cuhva cuñi ra Ndyoo, cua coto ndo tatu cuhva zacuehi cuu sii ra Ndyoo a sa cuenda ñi mi.

¹⁸Tatu cahan minoo ñiyivi cuhva sa sica ñi iñi maa ra, cuñi ra cuan

vatyi zacahnu ñiyivi sii ra. Zoco ra cuñi vatyi zacahnu ñiyivi sii ra i zaquisi sii ra, cahan ra cuan sa ndisa ta ñahñi cuatyi ra.

¹⁹I saha ra Moisés ley sii ndo, zoco numinoo ndo ta ña cuñi ndo tyaa ndo yahvi sii si. ¿Ta ñaa cuenda cuñi ndo cahñi ndo sii?

²⁰Ta i nacahan ñiyivi ta catyi ñu: Iyo minoo tatyí ña vaha suun. Yoñi sa cuñi cahñi suun.

²¹I nacahan ra Jesús ta catyi ra sihin ñu: I zavehi minoo sa ndyityi quivi quitatu yo, ta iyo xaan cuñi tandihi ndo.

²²I saha ra Moisés minoo ley sa tahndya ñii xiñi xuu lee. Zoco yivi ra Moisés i quisaha sihin si. Zutu sahnu yo i quisaha sihin si ndya tyiemvu. Yucuan cuenda sahndya ndo ñii xiñi xuu lee vazu quivi quitatu yo cuu.

²³Ta tatu sa cuenda sa ma cumañi ley ra Moisés ta tahndya ñii xiñi xuu lee vazu quivi quitatu yo cuu, ¿ña cuenda cuxaan ndo sii vatyi ndaha zanduvehi sii minoo ra quivi quitatu yo?

²⁴Ma tyaa ndo cuatyi sata ñiyivi tatu ña sito vaha ndo ñaa sa zavaha ñu. Cuatu ndo ndya ndyehe vaha ndo ta ziqui cahan ndo.

**Cuñi ñiyivi coto ñu yoo
ra cuu ra Jesús**

²⁵Tacuan ta ziqui i quisaha nducu tuhun zuhva ñiyivi ñuu Jerusalén ta catyi ñu: ¿Atu yivi ra ihya cuu ra sa cuñi cahñi ñiyivi?

²⁶Zoco ndyehe ndo yucuan, cahan ra nuu ñiyivi, ta ñahñi catyi ñu. ¿Atu sa sino iñi ra cu tyiño vatyi ra Cristo cuu ra?

²⁷Zoco sito yo sii ra ya, ta sito yo ndyamaa i quisi ra. Ta quivi cua quisi ra Cristo, yoñi cua coto ndyamaa cua quisi ra.

²⁸Ta sito ra Jesús sa cahan ñu cuhva zacuaha ra sisi vehe ñuhu cahnu, ta saa xaan cahan ra ta catyi ra: Sito ndo sii, catyi ndo ta sito ndo ndya ityi i quisi, zoco ña vasi sa cuenda ñi mi. Iyo minoo ra tasi sii. Ra vaha xaan cuu ra, ta ña sito ndo sii ra.

²⁹Yuhvi site sii ra vatyi sa cuenda maa ra vasi, ta maa ra i tasi sii.

³⁰Tacuan ta i cuñi ra tiin ra sii ra Jesús, zoco yoñi tyihi ndaha sii ra vatyi ta saa ca cuhva cua tahan si sii ra.

³¹Zoco cuaha ñiyivi sa yucu yucuan sino iñi ñu sii ra vatyi ra Cristo cuu ra, ta catyi ñu: Ma cuu zavaha inga ra cuaha ca sa ndyityi ta ziqui ra ya.

Zacuhun ra fariseo zandaru vatyí cua tiin ra sii ra Jesús

³²I siñi ra fariseo cuhva natuhun ñiyivi sa cuenda ra Jesús. Ta ra fariseo ta ra zutu nahnu i zacuhun ra zandaru cuenda vehe ñuhu hebreo vatyí cua tiin ra sii ra Jesús ta cuhun ra vehe caa.

³³Tacuan ta i catyi ra Jesús: Cua cundyei zuhva cuii ñi ca quivi sihin ndo, ta ziqui cunanuhin ndya nu ndyaa ra i tasi sii.

³⁴Cua nanducu ndo sii, zoco ma nañihi ndo sii. Ta nu cuhin, ma cuu cuhun ndo.

³⁵Tacuan ta i catyi ra hebreo zuun ñi sihin ra tahan ra: ¿Ndyamaa cua cuhun ra ya ta ma nañihi yo sii ra? ¿Atu cua cuhun ra

nu iyo ñiyivi sii yo ñuu griego, ta yucuan cua zacuaha ra?

³⁶¿Ta ñaa cuñi si catyi si sa catyi ra tyehen: “Cua nanducu ndo sii, ta ma nañihi ndo sii. Ta nu cua cundyei ma cuu cuhun ndo”?

Cua cuhva ra Ndyoo Tatyí Ii sii ñiyivi sino iñi sii ra Jesús

³⁷Quivi sa nducahnu xaan vico cuan, nandyaa ra Jesús, ta ñihi xaan cahan ra, ta catyi ra: Tatu iyo ndo ityi ndo, quisi ndo nu ndyei ta coho ndo.

³⁸Ñiyivi sa sino iñi sii, ndya aña ñu cua caña ndutya sa saha sa cundito ñiyivi tañi sa catyi Tuhun Ndyoo. Ta tañi yuu cahnu cua cuu ndutya cuan.

³⁹Cahan ra Jesús cuhva ya sa cuenda Tatyí Ii. Vatyí sii ñiyivi sa sino iñi sii ra Jesús cua cuhva ra Ndyoo Tatyí Ii vatyí tañaha ca cuhva ra Ndyoo Tatyí Ii quivi cuan vatyí tañaha ca cunanuhu ra Jesús ndya gloria.

Ñá cuu ndu-iin ñiyivi

⁴⁰Ta sa siñi ñiyivi cuhva cahan ra Jesús, iyo ñu catyi ñu: Ndisa cuii vatyí ra ihya cuu ra profeta, ra sa cua quisi cumañi ca sa quisi inga ra sa cua zacacu sii yo.

⁴¹Ta inga ñu catyi ñu: Ihya cuu ra Cristo. Zoco inga tucu ñu catyi ñu: Yivi ra Galilea cua cuu ra Cristo.

⁴²Catyí Tuhun Ndyoo vatyí ñiyivi ra rey David cua cuu sii ra Cristo. Belén cua cuu ñuu ra nu i cuu ñuu ra rey David. Catyi ñu.

⁴³Ta yucuan cuenda ñá cuu ndu-iin ñiyivi sa cuenda ra Jesús.

⁴⁴Ta zuhva ñiyivi cuñi ñu quihin ñu sii ra cuhun ra vehe caa, zoco yoñi i tiin sii ra.

**Yoñi inga ra cahan tañi
cahan ra Jesús**

⁴⁵Tacuan ta ziqui i nasaa ra zandaru cuenda vehe ñuhu nu yucu ra fariseo ta ra zutu nahnu, ta i nducu tuhun ra sii ra: ¿Ñacu ñá tiin ndo sii ra?

⁴⁶Ta i nacahan ra zandaru ta catyi ra: Ta yoñi ca maa cahan tañi cahan ra cuan. Catyi ra.

⁴⁷Tacuan ta i catyi ra fariseo: Ndyaa sii maa ndo ta zandavi ñaha ra.

⁴⁸¿Atu sica iñi ndo vatyi sino iñi minoo ra ndyaca ñaha a minoo ra fariseo? Numinoo ndi ta ña sino iñi ndi sii ra cuan.

⁴⁹Zoco ñiyivi sa ñahñi maa sito ta nu ley ta ña sito ñu, cua cuxaan xaan ra Ndyoo sihin ñu.

⁵⁰Tacuan ta i cahan minoo ra sa nañi Nicodemo. Zuun ñi ra cuu ra sa i sahan nu ndyaa ra Jesús minoo sa cuaa. Ta minoo ra ndyaca ñaha cuu tucu ra sihin inga ra, ta i catyi ra sihin ra tahan ra:

⁵¹Catyi ley yo vatyi ma cuu catyi yo atu vaha a ña vaha sa zavaha minoo ra tatu ma tyizoho xihna yo sa cahan ra ta coto yo ñaa sa zavaha ra. Catyi ra.

⁵²Ta i nacahan minoo ra tahan ra ta catyi ra: Vaziqui ra Galilea cuu tucu yoho vatyi cahan xoon tuhun ra. Nanducun sisi Tuhun Ndyoo, ta cua ndyehun vatyi yoñi minoo ra Galilea cua cuu ra minoo profeta. (Yucuan cuenda yivi ra cahan Tuhun Ndyoo cuu ra Jesús cuñi ra fariseo vatyi ra Galilea cuu ra Jesús.)

⁵³Tacuan ta cuanuhu minoo minoo ra ndya vehe ra.

Minoo ñaha zana iyo

8 Sahan ra Jesús ndya yucu sa nañi Olivos.

²Ta inga quivi ñaha ñi i nasaa tucu ra ndya vehe ñuhu cahnu, ta quisi tandihi ñiyivi nu ndyaa ra, ta i sicundyaa ra ta zacuaha ra sii ñu.

³Tacuan ta ra cu maestro cuenda ley sihin ra fariseo i sindyaca ra sii minoo ñaha i nañihi ra sihin minoo ra ndya vaha ñi. Ta i tyaa ra sii ña mahñu ñiyivi.

⁴Tacuan ta i catyi ra sihin ra Jesús: Maestro, i nañihi ndi sii ñaha ya sihin minoo ra ndya vaha ñi.

⁵Nu ley ra Moisés catyi si vatyi cañi ñiyivi sii ña sihin yuu ndya cua cuu ña. ¿Ta yoho, yozo caa catyuan?

⁶Catyi ra cuhva ya vatyi cuñi ra coto ra sii ra Jesús vatyi cuñi ra sa cua tyaa ra cuatyí sata ra. Zoco i nacañi noo ra Jesús xiñi ra ta quisaha tyaa ra nu ñuhu sihin nu ndaha ra.

⁷Ta ñá zaña ra cuan sa nducu tuhun ra sii ra, ta ziqui i nandyehe ra Jesús sii ra ta catyi ra: Yoo ra ñahñi cuatyí iyo, nacañi xihna ca maa ra sii ña sihin yuu. Catyi ra.

⁸Ta i nacañi noo tucu ra xiñi ra ta quisaha tyaa tucu ra nu ñuhu.

⁹Ta sa siñi ra cuhva cuan, i quisaha quita minoo minoo ñi ra vatyi tuu iñi ra vatyi iyo tucu cuatyí maa ra. Xihna ca ra sahanu ca cuahan minoo minoo ra ta cuhva ndya ra ndyihí, ta i ndoo minoo tuhun ñi ra Jesús sihin ñaha cuan.

¹⁰Ta sa nduvita ra Jesús ta yoñi ca ndyehe ra, minoo tuhun ñi ca ñaha cuan, ta i catyi ra: Maha, ñaha ra tyaa cuatyí saton. ¿Atu yoñi ca ra catyi vatyí iyo cuatyun?

¹¹Ta i catyi maa ña: Yoñi ca ra, tata. Ta i catyi ra Jesús: Ta nu mi ta ña tyei cuatyí saton. Cuahan, ta ma zavaha con cuatyí. Catyi ra.

**Tañi minoo ñúhu ñuu
ñiyivi cuu ra Jesús**

¹²Ta inga tucu saha i cahan ra Jesús sihin ñiyivi, ta catyi ra: Yuhvi cui ñúhu sii ñuu ñiyivi. Ñiyivi ndyico sii, ma caca noo ca ñu nu ñaa vatyí ndyaa ñúhu sihin ñu.

¹³Tacuan ta i catyi ra fariseo sihin ra: Zuun ñi moo saha sa ndaa sa cuendon, ta ña ndisa sa cohon.

¹⁴Ta i nacahan ra Jesús, ta catyi ra sihin ra: Vazu sehi sa ndaa sa cuenda mi, zoco sa ndisa cuu si vatyí site ndya ityi i quisi ta ndya ityi cuhin. Zoco maa ndo ña sito ndo ndya ityi i quisi a ndya ityi cuhin.

¹⁵Maa ndo tyicuhva ndo cuhva iyo si ñuu ñiyivi ya. Zoco mi ña tyicuhve.

¹⁶Zoco tatu cua tyicuhve, minoo cuhva vaha xaan cua cuu si vatyí ña minoo tuhun ñi mi. Ra Ndyoo Zuti, ra i tasi sii, ndyaa ra sihin.

¹⁷Sisi ley maa ndo, catyi tucu si vatyí sa ndaa sa saha uu tahan ñiyivi, ndisa cuu si.

¹⁸Yuhvi cuu minoo ra saha sa ndaa sa cuende, ta ra Ndyoo Zuto yo, ra i tasi sii, saha ra sa ndaa sa cuende.

¹⁹Tacuan ta i catyi ra fariseo sihin ra: ¿Ndyamaa iyo zutun? catyi ra. I

nacahan ra Jesús ta catyi ra: Nu sii mi ta ña nacoto ndo ta nu sii Zuti. Tatu sa vatyí nacoto ndo sii, cua nacoto tucu ndo sii Zuti.

²⁰Ihya tuhun i cahan ra Jesús nu ndyaa satu nu tyihi ñiyivi xuhun sisi vehe ñuhu cahnú, zoco yoñi i tiñ sii ra sa cuhun ra vehe caa vatyí ta saa ca cuhva cua tahan si sii ra.

Nu cuhin ma cuu cuhun ndo

²¹Tacuan ta ziqui i catyi tucu ra Jesús sihin ñu: Cua cuhin ta cua nanducu ndo sii. Zoco cua cuu ndo sa cuenda cuatyí ndo, ta ma cuu cuhun ndo nu cuhin. Catyi ra.

²²Tacuan ta i catyi ra hebreo: Vaziqui zuun ñi maa ra cua cahñi sii ra vatyí catyi ra vatyí ma cuu cuhun yo nu cuhun ra.

²³Ta i catyi ra Jesús sihin ra: Maa ndo cuu cuenda ihya. Yuhvi i quisi ndya andivi. Ra ñuu ñiyivi ya cuu maa ndo. Ta yuhvi, yivi ra ñuu ñiyivi ya cui.

²⁴Yucuan cuenda catyi sihin ndo vatyí cua cuu ndo sa cuenda cuatyí ndo. Tatu ña sino iñi ndo sii vatyí yuhvi cuu ra zacacu sii ndo, cua ndoo cuatyí ndo ziqui ndo, ta cua cuu ndo.

²⁵Tacuan ta i catyi ñiyivi sihin ra: ¿Yoo ra cuun? Ta i catyi ra Jesús sihin ñu: Zuun ñi ra cui tañi sa nacatyí sihin ndo ndya quivi i quisaha quehin sihin ndo.

²⁶Iyo cuaha xaan sa cuñi catyi cuhva iyo ndo, ta cua catyi ñaa sa cuu cuatyí ndo. Ta ra i tasi sii, ñahñi sa vatyí iyo sii ra. Ta ihya ñuu ñiyivi nacatyí tuhun cuhva i siñi cuhva catyi maa ra. Tacuan i catyi ra Jesús sihin ñu.

²⁷Zoco ñá cutuñi iñi ñiyivi vatyí cahan ra sa cuenda Ndyoo Zutu ra.

²⁸Tacuan ta ziqui i catyi ra Jesús sihin ñu: Quiyi cua cañihi ndo sii ra i quisi ndya gloria, ta ziqui cua coto ndo vatyí yuhvi cuu ra. Ta ñahñi sa zavehi sa cuñi ñi mi, zoco tañi sa zacuahá Zuti sii ta tacuan quehin.

²⁹Ta ra i tasi sii, ndyaa ra sihin. Ña zandoo maa tuhun ra sii vatyí tandihi saha zavehi cuhva cuñi ra.

³⁰Ta sa ndihi cahan ra Jesús tuhun ya, ta cuaha xaan ñiyivi i sino iñi sii ra.

Tuhun sa ndisa cuan, cua zacacu si sii yo

³¹Tacuan ta ziqui i catyi ra Jesús sihin ñiyivi hebreo, ñu sino iñi sii ra: Tatu ma zaña ndo tuhun zacuehi sii ndo, cua cuu ndo ñiyivi sino iñi sii mi sa ndisa.

³²Ta cua coto ndo ñaa sa cuu sa ndisa, ta sa ndisa cuan cua ndasi si sii ndo.

³³Ta i nacahan ñiyivi ta catyi ñu: Ñiyivi sahnu sii ndi cuu sii ra Abraham. Tañaha ca cuu ndi muzu sii numinoo ñiyivi. ¿Ta ñaa cuenda catyun vatyí cua ndasi ndi?

³⁴Ta i nacatyí ra Jesús sihin ñu: Sa ndisa ta sa ndisa catyi sihin ndo. Tandihi ñiyivi zavaha cuatyí, muzu cuu ñu sii cuatyí cuan.

³⁵Ta ra cu muzu, ma ndoo ra vehe sito ho ra tandihi tyiemvu. Zoco zehe ra cuu sito ho cuan, ndoo ra yucuan tandihi tyiemvu.

³⁶Tatu zehe ra cuu sito ho vehe cuan saha sa cacu ndo, cua cacu ndisa cuii ndo, ta ma cuu ca ndo muzu sii sa ña vaha.

³⁷Site vatyí ñiyivi ra Abraham cuu sii ndo. Zoco cuñi ndo cahñi

ndo sii vatyí ña cuñi ndo sino iñi ndo tuhun quehin sihin ndo.

³⁸Quehin cuhva sa ndyehi nu ndyaa Zuti. Ta maa ndo ndyicuu ndo cuhva catyi zutu maa ndo.

Cuihna cuu zutu ndo

³⁹Ta i nacahan ñiyivi, ta catyi ñu sihin ra: Zutu ndi cuu sii ra Abraham. Ta i catyi ra Jesús sihin ñu: Tatu sa ndisa vatyí zutu ndo cuu sii ra Abraham, cua zavaha ndo cuhva i zavaha ra Abraham.

⁴⁰Zoco vityí cuñi ndo cahñi ndo sii vatyí minoo ra cahan sa ndisa sihin ndo cui. Ta tuhun quehin sihin ndo, cuhva i siñi cuhva catyi ra Ndyoo cuu si. Ta cuhva cuñi maa ndo zavaha ndo, ña tacuan i zavaha ra Abraham.

⁴¹Zavaha ndo cuhva zavaha zutu ndo. Catyi ra Jesús. Tacuan ta i nacahan ñiyivi cuan ta catyi ñu: Ñá cacu maa ndi tacuan ñi. Iyo minoo ñi ra cuu zutu ndi, ra Ndyoo.

⁴²Ta i nacatyí ra Jesús sihin ñu: Tatu sa vatyí ra Ndyoo cuu Zutu ndo sa ndisa, cua cuñi xaan ndo sii, vatyí ndya nu ndyaa ra Ndyoo i quite ta vasi. Ña vasi cuhva cuñi mi. Maa ra i tasi sii.

⁴³Ña cutuñi iñi ndo tuhun quehin sihin ndo vatyí ña cuñi ndo tyizoho ndo tuhun quehin sihin ndo.

⁴⁴Zutu ndo cuu sii ra cu cuihna. Ta cuñi xaan ndo zavaha ndo sa ña vaha cuhva cuñi zutu ndo. Sahñi ra sii ñiyivi ndya ta xihna ñi ta ñahñi maa sa ndisa iyo sii ra. Cuhva cahan ra sa vatyá, tacuan cahan ra vatyí tacuan cuhva iyo ra, vatyí ra vatyá cuu ra ta zutu sa vatyá cuu sii ra.

⁴⁵Ta sa cuenda sa vatyí quehin sa ndisa, ta yucuan cuenda ña sino ñi ndo sii.

⁴⁶Yoñi ndo cuu catyí ndo sa ndisa vatyí iyo cuatyí. Ta tatu quehin sa ndisa, ¿ñacu ña sino ñi ndo sii?

⁴⁷Ra cuu cuenda ra Ndyoo, tyizoho ra sa cahan ra Ndyoo. Ta yucuan cuenda ña tyizoho ndo sa catyí ra Ndyoo vatyí yivi zehe ra cuu sii ndo.

Sa xihna ñi sa iyo ra Jesús ta ziqui i sicoo ra Abraham

⁴⁸Ta i nacahan ra hebreo ta catyí ra: Sa ndisa cuii catyí ndi vatyí minoo ra samaritano cuun ta ñoho minoo cuihna suun.

⁴⁹Ta i catyí ra Jesús: Ñahñi cuihna ñoho sii. Tyei yahvi sii Zuti, zoco ña tyaa ndo yahvi sii.

⁵⁰Ta ña nducu xein sa zacahnu ñiyivi sii, zoco iyo minoo ra cuñi sa zacahnu ñiyivi sii. Ta cua tyicuhva ra sii ndo.

⁵¹Sa ndisa ta sa ndisa catyí sihin ndo vatyí ñiyivi zavaha cuhva catyí, ma cuu ñu.

⁵²Ta i catyí ñiyivi hebreo: Vityí nacoto vaha ndi suun vatyí ñoho minoo cuihna suun. I sihi ra Abraham ta tandihi ra profeta ta sa naha. Ta catyun vatyí ma cuu ñiyivi tatu zavaha ñu cuhva catyun.

⁵³¿Atu ñiñi ca cuu moo ta ziqui ñiyivi sahnu sii ndi, ra Abraham? Zoco i sihi ra Abraham ta tandihi inga ra i cuu profeta ta tyiemvu. Ta yoho, ¿yoo ra cuun vatyí catyun vatyí ma cuu ndi tatu sino ñi ndi suun?

⁵⁴Ta i catyí ra Jesús: Tatu maa ñi mi catyí vatyí ra ñiñi cui, ña vale

si. Zoco maa Zuti cuu ra catyí vatyí ra ñiñi cui. Ta zuun ñi ra cuan cuu ra catyí ndo vatyí Ndyoo ndo cuu sii ra.

⁵⁵Ta tañaha ca coto ndo sii ra, zoco yuhvi site sii ra. Ta tatu catyí vatyí ña site sii ra, cua cui minoo ra vatya tañi maa ndo. Zoco site sii ra, ta zavehi cuhva catyí ra.

⁵⁶Ñiyivi sahnu sii ndo, ra Abraham, zii xaan i cuñi ra vatyí cua tahan si quivi caqui. Ta i ndyehe ra sii si, ta zii xaan i cuñi ra.

⁵⁷Tacuan ta i catyí ra hebreo cuan sihin ra Jesús: Ta quita ca uu xico usi cuiyon, ta ¿yozo caa catyun vatyí sa ndyehun sii ra Abraham?

⁵⁸Ta i nacatyí ra Jesús sihin ra: Sa ndisa ta sa ndisa catyí sihin ndo vatyí cumañi ca cacu ra Abraham ta sa iye. Catyí ra.

⁵⁹(Ta i cuxaan xaan ra hebreo), ta i quihin ra yuu sa cua cañi ra sii ra Jesús. Zoco i quihvi xehe ra Jesús ticui ñiyivi, ta i quita ra sisi vehe ñuhu cahnu cuan, ta cuahan ra.

Zanduvaha ra Jesús sii minoo ra cuaa

9 Ta sa cua yaha ra Jesús, ta i ndyehe ra sii minoo ra cuaa. Cuaa ra i cacu ra.

²Ta i nducu tuhun ra i casi ra Jesús sii ra ta catyí ra: Maestro, ¿yoo sa zavaha cuatyí, zutu ra a zihí ra ya a zuun ñi maa ra? Vatyí ndyehe, cuaa ra i cacu ra.

³Ta i catyí ra Jesús sihin ra: Yivi cuatyí ra, ta yivi cuenda ñiyivi sii ra. I tahan ra ya cuhva ya vatyí tacuan ta cua coto ñiyivi vatyí cuu sii ra Ndyoo zanduvaha ra sii ra.

⁴Ñiñi xaan cuñi si zavehi cuhva cuñi ra i tasi sii, ñi ñi sa ndisi vatyí cua cuaa ta yoñi cua cuu zatyíño.

⁵Niñ ñi sa ndyei ñuu ñiyivi ya, tañi minoo ñúhu cui ñuu ñiyivi. Tacuan i catyi ra Jesús.

⁶Ta sa ndihi cahan ra cuhva cuan ta ziqui i tyicu zii ra nu ñuhu. Ta i zavaha ra ndyahu sihin zii ra, ta i tyaa ra sii si nuu ra cuaa cuan.

⁷Ta i catyi ra Jesús sihin ra: Cuahan ta nacatyon siti nuun nu ndyaa tanque Siloé. Zivi Siloé cuan cuñi si catyi si: I tasi suun. Ta i sahan ra cuan, ta i nacatya ra, ta sa nasaa ra ta sa cuu ndyehe ra.

⁸Ta ñiyivi sa ndyaa yatyi yuvehe ra ta ñiyivi sa tuhva ndyehe sii ra vatyi cuaa ra i catyi ñu: ¿Atu yivi ra ihya cuu ra sica xaan caridad?

⁹Zuhva ñu catyi ñu: Zuun ra cuu ra. Ta inga ñu catyi: Tañi caa ra caa. Zoco maa ra i catyi: Zuun yuhvi cui.

¹⁰Yucuan cuenda catyi ñiyivi sihin ra: ¿Yozo caa i cuu vatyi i ndundisi ndyehun?

¹¹Ta i nacahan ra ta catyi ra: Minoo ra sa nañi Jesús i zavaha ra ndyahu, ta i tyaa ra sii si siti nui, ta i catyi ra sihin: “Cuahan cua nacatyon nuun nu ndyaa tanque Siloé.” Ta i sehin ta nacatye siti nui, ta ndundisi ndyehi vityi. Catyi ra.

¹²Tacuan ta i catyi ñiyivi sihin ra: ¿Ndyamaa iyo ra cuan? Ta i catyi maa ra: Ña site.

Nducu tuhun xaan ra fariseo sii ra sa nduvaha siti nuu cuan

¹³I quihin ñiyivi sii ra sa ndundisi ndyehe, ta sindyaca ñu sii ra nu yucu ra fariseo.

¹⁴Ta quivi quitatu ñiyivi i cuu quivi i zavaha ra Jesús ndyahu ta zanduvaha ra siti nuu ra cuaa cuan.

¹⁵Ta i nducu tuhun tucu ra fariseo sii ra nduvaha cuan ta catyi ra: ¿Yozo caa nduvaha siti nuun? Ta i catyi ra: Ndyahu i tyaa ra siti nui, ta i nacatye, ta vityi ndundisi ndyehi. Catyi ra.

¹⁶Tacuan ta ziqui i catyi zuhva ra fariseo: Ra cuan, yivi cuenda ra Ndyoo cuu ra vatyi ña tyaa ra yahvi sii quivi quitatu yo. Ta inga ra fariseo catyi: Tatu ra iyo cuatyi cuu ra, ma cuu zavaha ra sa ndyityi tañi ya. Ta sa cuenda cuan, ta ñá cuu ndu-iiñ ra fariseo.

¹⁷Ta i catyi tucu ra sihin ra i nduvaha nuu inga saha: ¿Ñaa catyi moo cuenda ra i zanduvaha siti nuun? Ta i catyi ra: Minoo ra profeta cuu ra. Catyi ra.

¹⁸Zoco ra ndyaca ñaha sii ñiyivi hebreo, ñá sino iñi ra sii ra vatyi cuaa ra ta ziqui i ndundisi ndyehe ra ndya sa cana ra sii zutu ra ta sii zihhi ra.

¹⁹Ta i nducu tuhun ra sii ñu ta catyi ra: ¿Atu zehe maa ndo cuu sii ra ya? ¿Atu cuaa ra i cacu ra? ¿Ta yozo caa cuu vatyi ndundisi ndyehe ra vityi?

²⁰Ta i nacahan zutu ra ta catyi ra: Sito ndi vatyi zehe ndi cuu sii ra ta cuaa ra i cacu ra.

²¹Zoco ña sito ndi yozo caa vatyi ndyehe ra vityi a yoo sa zanduvaha siti nuu ra. Sa iyo cuiya ra. Nducu tuhun ndo sii maa ra. Cuu cahan ra sa cuenda maa ra.

²²I cahan zutu ra ta zihhi ra cuhva cuan vatyi yuhu ñu sii ra ndyaca ñaha sii ñiyivi hebreo vatyi sa i yaha ndu-iiñ ra cuan minoo cuhva ta catyi ra vatyi yoo ra catyi vatyi i

quisi ra Jesús cuenda ra Ndyoo ma cuu ca cuhun ra vehe ñuhu.

²³Yucuan cuenda i catyi zutu ra ta zihí ra: “Sa iyo cuiya ra. Nducu tuhun ndo sii maa ra.”

²⁴Ta inga saha i cana ra hebreo sii ra i nduvaha, ta catyi ra: Zacahnun sii ra Ndyoo vatyí sito maa ndi vatyí ra iyo cuatyí cuu ra zanduvaha suun.

²⁵Ta i nacahan ra i nduvaha ta catyi ra: Ña site tatu ra iyo cuatyí cuu ra a yiví, zoco minoo ñi cuhva site vatyí ra cuaa i cui, ta vityí ndundisi ndyehi. Catyi ra.

²⁶Tacuan ta ziquí i catyi ra sihin ra inga saha: ¿Ñaa sa zavaha ra suhun? ¿Yozo caa i zanduvaha ra siti nuun?

²⁷Ta i catyi ra sihin ra: Sa nacatyí sihin ndo, ta ñá tyizoho ndo. ¿Ñaa cuenda cuñi ndo coto ndo inga saha? ¿Atu cuñi tucu maa ndo vatyí cundyico ndo sii ra?

²⁸Tacuan ta i cuxaan ra hebreo, ta catyi ra: Minoo ra ndyico sii ra cuun. Zoco maa ndi ndyico ndi sii ra Moisés.

²⁹Sito ndi vatyí i cahan ra Ndyoo sihin ra Moisés. Zoco inga ra cuan, ña sito ndi ndyamaa i quisi ra cuan. Catyi ra.

³⁰Tacuan ta i nacahan ra nduvaha cuan ta catyi ra: Ihya cuu minoo sa vaha xaan vatyí vazú ña sito maa ndo sii ra, zoco i zandundisi ra ndyehi.

³¹Ta sito yo vatyí ña tyizoho ra Ndyoo sa cahan ñiyiví iyo cuatyí. Zoco tatu iyo minoo ra zacahnu sii ra Ndyoo ta zavaha ra cuhva cuñi ra, tyizoho ra Ndyoo sa cahan maa ra cuan.

³²Ta ndya ta sino ñuu ñiyiví, ta tañaha ca coto yo tatu iyo minoo ra sa cuu zandundisi nuu minoo ra cuaa ndya quiví i cacu ra.

³³Tatu sa yiví ra Ndyoo tasi sii ra cuan, ma cuu zacuu ra cuhva ya. Catyi ra.

³⁴Ta i nacahan ra hebreo ta catyi ra: Yoho sa cacun sisi tandihí nuu cuatyí, ta vityí cuñun zacuohon sii maa ndi. Ta i quihin ra sii ra, ta i tava ndyizo ra sii ra ityí sata.

Cuaa ñiyiví cuenda sa ndisa

³⁵Ta i sito ra Jesús vatyí i tava ndyizo ñiyiví sii ra i nduvaha. Ta i nañihi ra Jesús sii ra, ta catyi ra: ¿Atu sino iñun sii Zehe ra Ndyoo?

³⁶Ta i nacahan ra cuan ta catyi ra: ¿Yoo ra cuu ra cuan, tata? vatyí cuu sino iñi sii ra.

³⁷Ta i catyi ra Jesús sihin ra: Sa i ndyehun sii ra, ta zuun ra cuu sa natuhun suhun. Catyi ra.

³⁸Ta i catyi ra cuan: Sino iñi suun; yoho ra ndyaca ñaha cuun. Ta i zacahnu ra sii ra Jesús.

³⁹Ta i catyi ra Jesús: Vasi ñuu ñiyiví ya vatyí cua tyicuhve sii ñiyiví. Ta ñiyiví sa ña cuu ndyehe cua ndyehe ñu. Ta ñiyiví sa ndyehe vityí, cua nducuaa ñu. Catyi ra.

⁴⁰Ta tayucu zuhva ra fariseo yatyí ñi yucuan, ta siñi ra sa cahan ra Jesús ta catyi ra sihin ra: ¿Atu cuaa tucu nduhvi?

⁴¹Ta i catyi ra Jesús sihin ra: Tatu sa vatyí cuaa ndo sa ndisa, ma coo cuatyí ndo. Zoco sa cuenda sa vatyí catyi ndo vatyí ndisi ndyehe ndo ta yucuan cuenda ndoo cuatyí ndo ziquí ndo.

**Cahan ra Jesús sihin minoo
cuhva, cuhva iyo minoo sacu**

10 Sa ndisa ta sa ndisa catyi sihin ndo: Ra sa ma quihvi yu sacu, ndaa ra xiñi sacu ta quihvi ra; ra zuhu cuu ra.

²Vatyi ra quihvi yu sacu cuan, sitocho mvee ticatyi cuan cuu sii ra.

³Ta ra zacuenda yuvehe cuan, nuña ra ta quihvi sitocho mvee. Sito mvee ticatyi zono ra nduzu ra, ta cana ra sii ti sihin zivi ti, ta quita ra, ta ndyico ti sii ra.

⁴Ta sa ndihi tava ra sii mvee ticatyi zono ra, maa ra cuahan ityi nuu ti. Ta ndyico ti sii ra vatyi nacoto ti nduzu ra.

⁵Zoco sii inga ra sa ña sito ti, ma cundyico ti. Cua cono ti sii ra vatyi ña nacoto ti nduzu ra.

⁶I cahan ra Jesús sihin ñiyivi sihin minoo cuhva, zoco ñá cutuñi iñi ñu tuhun cahan ra sihin ñu.

Ra zacuenda vaha cuu ra Jesús

⁷Tacuan ta ziqui i cahan ra Jesús inga saha, ta catyi ra: Sa ndisa ta sa ndisa catyi sihin ndo vatyi yuhvi cui tañi yu sacu nu quihvi coyo mvee ticatyi.

⁸Tandihí cui ra i quisi cuee ca sa quisi mi, ra zuhu cuu ra cuan. Zoco ña tyizoho mvee ticatyi zone sa cahan ra.

⁹Yuhvi cui yuvehe. Tandihí ñiyivi sa cua quihvi coyo, cua cacu ñu. Ta cua quita ñu, ta cua nandihvi ñu, ta cua nañihi ñu sa vaha.

¹⁰Ra zuhu cuan, vasi ra vatyi zuhu ra ta cahñi ra. Vasi zativi ra. Yuhvi vasi vatyi cuhve sa cundito

ñiyivi tandihí tyiemvu ta coo vaha xaan ñu.

¹¹Yuhvi cuu ra zacuenda vaha sii ndo. Ta sehi sa cui sa cuenda mvee ticatyi zone.

¹²Zoco minoo ra sa cuu muzu, zatyño ra ta iyo yahvi ra. Ndyehe ra vatyi vasi ina nduvahu, ta zandoo ra sii mvee ticatyi cuan vatyi yivi zono ra cuu sii ti. Ta tiin ina nduvahu sii ti ta quiti cuatyi ti sii ti.

¹³Ta sino ra cu muzu cuan vatyi muzu ñi cuu ra, ta ñahñi sa cuu cuñi maa ra sa cuenda mvee ticatyi cuan.

¹⁴Zoco yuhvi cuu ra zacuenda vaha. Nacote sii mvee ticatyi zone, ta nacoto ti sii.

¹⁵Tañi nacoto Zuti sii ta nacoto tuqui sii ra. Ta sehi sa cui sa cuenda mvee ticatyi zone.

¹⁶Ta iyo inga mvee ticatyi zone. Yoñi ti ihya. Cuñi si sa naquihin sii ti. Cua cuiñi ti nduzi, ta cua ndu-ñi ti sihin inga ti, ta minoo ñi ra cua zacuenda sii ti.

¹⁷Yucuan cuenda cuñi xaan Zuti sii, vatyi sehi sa cui, ta cuee ca ta cua nandoto tuqui.

¹⁸Yoñi sa cuu cahñi sii tatu ma cuhve sa cui, zoco cua cuhve sa cui. Cua cui, ta cuu nandoto tuqui. Ihya tyiño i saha ra Ndyoo Zuti sii.

¹⁹Ta sa ndihi cahan ra Jesús tuhun ya, ta ziqui ña cuu ca ndu-ñi ra hebreo sa cuenda sa i catyi ra Jesús.

²⁰Ta i catyi cuaha xaan ra: Ñoho minoo cuihna sii ra cuan, ta zana xiñi ra. ¿Ñacu tyizoho ndo sa cahan ra?

²¹Zoco inga ra catyi: Cuhva cahan ra, yivi cuhva cahan minoo ra sa ñoho cuihna. ¿Atu cuu zandundisi cuihna nuu ñiyivi cuaa?

Ña tyaa ra hebreo yahvi sii ra Jesús

²²Vico cahñi i cuu si, ta nducahnu minoo vico ñuu Jerusalén. Vico cuenda nu ndihi ndaa vehe ñuhu cahnu ta tyiemvu, ta nducahnu vico tahan cuiya cuenda si.

²³Ta i sica noo ra Jesús sisi vehe ñuhu cahnu cuan nu nañi si corredor ra Salomón.

²⁴Tacuan ta tyihi mahñu ra hebreo sii ra Jesús, ta i catyi ra: ¿Ndyaa ama ta cahan casun sihin ndi? Tatu ra Cristo cuun, catyi casun.

²⁵Ta i nacahan ra Jesús ta catyi ra: Sa i nacatyi sihin ndo, ta ña sino iñi ndo. Tyiño zavehi sa cuenda Zuti, yucuan saha sa ndaa cuende.

²⁶Zoco ña sino iñi maa ndo vatyi yivi mvee ticatyi zone cuu sii ndo. Tañi sa nacatyi sihin ndo.

²⁷Mvee ticatyi zone, siñi ti nduzi. Ta nacote sii ti, ta ndyico ti sii.

²⁸Ta sehi sa cundito ti tandihi cuii tyiemvu. Ta ma cuu ca ti. Ta yoñi ra cua tava sii ti sisi ndehi.

²⁹Ñiñi ca cuu Zuti ta ziqui tandihi ca, ta i saha maa ra sii ti sii. Ta yoñi ra cuu tava sii ti sisi ndaha Zuti.

³⁰Yuhvi sihin Zuti iin ñi cuu ndi.

³¹Tacuan ta i quihin ra hebreo yuu inga saha sa cua cañi ra sii ra Jesús.

³²Ta i cahan ra Jesús inga saha, ta catyi ra: Sa cuaha xaan tyiño vaha zañehi sii ndo sa cuenda Zuti. ¿Ndyaa sa ña tahan iñi ndo ta cuñi ndo cañi ndo yuu sii?

³³Ta i nacahan ra hebreo ta catyi ra: Yivi sa cuenda minoo tyiño vaha i zavohon, zoco sa cuenda vatyi ña vaha cohon vatyi minoo ñiyivi ñi cuun, ta catyun vatyi ra Ndyoo cuun.

³⁴Ta i catyi ra Jesús sihin ra: Nuututu Tuhun Ndyoo ndyaa si nu i catyi ra Ndyoo vatyi ndyoo cuu tucu maa ndo.

³⁵I catyi ra Ndyoo vatyi ñiyivi sa tyizoho Tuhun ra cuu tañi Ndyoo. Ta ma cuu catyi Tuhun Ndyoo minoo sa ña ndisa.

³⁶I zandu-ii ra Ndyoo Zuti sii ra i tasi ra ñuu ñiyivi. Ta maa ndo catyi ndo vatyi quehin ndyaa vaha ñi sii ra Ndyoo vatyi catyi vatyi Zehe ra Ndyoo cuu sii.

³⁷Tatu ña zavehi cuhva cuñi Zuti, ma sino iñi ndo sii.

³⁸Zoco zavehi cuhva cuan, ta vazu ma sino iñi ndo sii, zoco sino iñi ndo sa cuenda sa vaha i zavehi. Tacuan ta cua cuu nacoto ndo. Ta cua nacoto vaha ca ndo vatyi ndyaa ra Ndyoo Zutu yo sihin, ta iin ñi cui sihin ra. Tacuan i catyi ra Jesús.

³⁹Yucuan cuenda i cuñi tucu ra tiin ra sii ra sa cuhun ra vehe caa. Zoco i quita ra ta cuahan ra, ta ña cuu.

⁴⁰Ta cuahan tucu ra inga saha ndyaa inga siyo yuu Jordán ndyaa nu i zacoo ndutya ra Juan sii ñiyivi sa xihna ñi. Ta i ndoo ra yucuan.

⁴¹Ta cuaha xaan ñiyivi cuahan coyo ndyaa nu ndyaa ra. Ta i catyi ñu: Ñahñi sa ndyityi i zavaha ra Juan, zoco tandihi cuii sa catyi ra cuenda ra ya, ta ndisa cuu si.

⁴²Ta cuaha xaan ñiyivi i sino iñi sii ra Jesús yucuan.

I sihi ra Lázaro

11 I cuhu minoo ra sa nañi Lázaro, cuhva ña María ta ña Marta. Betania cuu ñuu ñu.

²Ta ña María cuhva ra Lázaro, zuun ñi ña cuu ña sa tyozo azetye vixi saha ra Jesús ta zana-ityi ña sihin ixi xiñi ña minoo saha.

³Tacuan ta ziqui i zacuhun cuhva ra Lázaro tyiño nu ndyaa ra Jesús ta catyi ñu: Tata, cuhu ra sa cuñi xoon.

⁴Ta sa i siñi ra Jesús tuhun cuan i catyi ra: Ma cahñi cuehe cuan sii ra. Zoco cua ndyehe ñiyivi vatyí cuu xaan zacuu ra Ndyoo, ta cua zacahnu xaan ñiyivi sii Zehe ra. Catyi ra Jesús.

⁵Ta cuñi xaan ra Jesús sii ña Marta ta sii cuhu ña ta sii ra Lázaro.

⁶Ta sa i sito ra vatyí cuhu ra ta i ndoo ra uu ca quivi nu ndyaa ra.

⁷Tacuan ta ziqui i catyi ra sihin ra i casi ra: Cohon yo Judea inga saha.

⁸Ta i catyi ra sihin ra: Maestro, nacao cuñi ñiyivi hebreo yucuan cañi ñu yuu suun. ¿Atu cuhun yucuan inga saha?

⁹Ta i catyi ra Jesús: Iyo usi uu ora sa minoo ndiyiaca. Ra sa sica noo ora, ma catyihí saha ra vatyí ndisi ndyehe ra ta zavaha ra sa vaha.

¹⁰Zoco tatu cua caca noo minoo ra sa sa cuaa ta zavaha ra sa ña vaha, cua catyihí saha ra vatyí cumañi ñúhu nu cuahan ra.

¹¹Tacuan i catyi ra Jesús ta ziqui i catyi ra: Quixi xaan ra Lázaro amigo yo, zoco cuhin cua zandoye sii ra.

¹²Tacuan ta catyi ra i casi ra: Tata, tatu quixi ra, cua nduvaha ra.

¹³Zoco i cahan ra Jesús tuhun sa sihi ra, zoco i sica iñi ra i casi ra vatyí cahan ra tuhun sa quixi ndisa cuii ra ta quitatu ra.

¹⁴Ta tacuan ta i catyi casi ra Jesús sihin ra: Sa sihi ra Lázaro.

¹⁵Ta zii cuñi vatyí yoñi ndyaa yucuan. Vaha ca tacuan sa cuenda maa ndo vatyí cua sino ca iñi ndo. Coho yo nu catuu ra.

¹⁶Tacuan ta i cahan ra Tomás sa nañi Dídimó sihin inga ra i casi ra Jesús, ta i catyi ra: Coho tucu maa yo vatyí cuu yo iin ñi sihin ra Jesús.

Zanandoto ra Jesús sii ra Lázaro

¹⁷Ta sa i saa ra Jesús yucuan, i sito ra vatyí sa ñoho ra Lázaro cumi quivi sisi ñaña.

¹⁸Ñuu Betania cuan yatyi ñi ndyaa si sihin ñuu Jerusalén tañi uñi kilómetro zazava.

¹⁹Ta i saa cuaha xaan ra hebreo; cua cuhva ra tundyee iñi sii ña Marta ta ña María vatyí sihi cuhva ñu.

²⁰Ta sa sito ña Marta vatyí vasi ra Jesús, cuahan ña cua zatahan ña sii ra. Zoco i ndoo ña María sisi vehe.

²¹Tacuan ta i catyi ña Marta sihin ra Jesús: Tata, tatu sa vatyí ndyoon ihya, ma cuu cuhve.

²²Zoco site vatyí tandihí cuii ñi sa cua cacon sii ra Ndyoo, maa ra Ndyoo cua cuhva sii si suun.

²³Ta i catyi ra Jesús sihin ña: Cua nandoto cuhvon.

²⁴Ta i catyi ña Marta sihin ra: Site vatyí cua nandoto ra quivi cua tyicuhva ra Ndyoo sii ñiyivi.

²⁵Ta i catyi ra Jesús sihin ña: Yuhvi cuu ra zanandoto, ta sehi sa cundito ñiyivi. Ra sa sino iñi sii, vazú sa sihi ra, zoco cua nandoto ra.

²⁶Ta ñiyivi ndito ta sino iñi ñu sii, ma cuu ca ñu. ¿Atu sino iñun cuhva ya?

²⁷Ta i catyi ña sihin ra: Ndisa tata. Sino iñi vatyi ra Cristo cuun, ta Zehe ra Ndyoo cuu suun. Ra sa cua quisi ñuu ñiyivi cuun. Catyi ña.

Sacu ra Jesús nu ndyaa ñaña ra Lázaro

²⁸Ta sa sa ndihi cahan ña tacuan, ta ziqui cuahan ña ta cana xehe ña sii ña María cuhu ña, ta catyi ña: Sa saa ra Maestro ta cana ra suun.

²⁹Ta sa i siñi ña María tuhun cuan, ta yatyi xaan i nduvita ña ta cuahan ña nu ndyaa ra Jesús.

³⁰Ta tañaha ca cua quihvi ra Jesús sisi ñuu cuan. Ta cuhva ndyaa ñi ra nu tahan ña Marta sii ra.

³¹Ta ra hebreo, ra ndyaa sihin ña María vehe cuan, i ndyehe ra vatyi yatyi xaan i nduvita ña ta i cacono ña cuahan ña. Ta i sindyico ra sii ña vatyi catyi ra: Cuahan ña cua vacu ña nu ndyaa ñaña ra Lázaro.

³²Tacuan ta i saa ña María nu ndyaa ra Jesús, ta i sicuñi siti ña nuu ra ta catyi ña: Tata, tatu sa vatyi ndyoon ihya sihin ndi ndya icuñuu ca, ma cuu cuhve.

³³Ta sa ndyehe ra Jesús vatyi sacu ña ta sacu tucu ra hebreo, ra ndihi sihin ña, ta i nducuihya xaan cuñi añima ra Jesús.

³⁴Ta i catyi ra: ¿Ndyamaa i tyihi ndo sii ra? Ta i catyi maa ñu sihin ra: Coho, tata, vatyi cua ndyehun.

³⁵Ta i sacu ra Jesús.

³⁶Tacuan ta ziqui i catyi ra hebreo: Ndyehe ndo cuhva cuñi xaan ra sii ra sihi cuan.

³⁷Zoco i catyi inga ra: Ihya ra i zandundisi ndyehe ra cuaa cuan. ¿Ñacu ñá zavaha ra minoo cuhva ta ma cuu ra ya?

Nandoto ra Lázaro

³⁸I quisi minoo sa ndahvi xaan cuñi ra Jesús inga saha sa ndyehe ra ñaña nu ñoho ra Lázaro. Minoo yavi yuu, i cuu si, ta ndazi minoo yuu yuhu si.

³⁹I catyi ra Jesús: Tyaa siyo ndo yuu ña. Ta i catyi ña Marta, cuhva ra i sihi cuan: Tata, sa iñi sahan ra vatyi sa cumi quivi sa sihi ra.

⁴⁰Ta i catyi ra Jesús sihin ña: Sa catyi suhun vatyi tatu cua sino iñun, cua ndyehun vatyi cahnu xaan cuu cuhva iyo sii ra Ndyoo, ta cuu zacuu ra tandihi.

⁴¹Tacuan ta ziqui i tyaa siyo ñu yuu nu ñoho ndiyi cuan. Ta i nandyehe ndaa ra Jesús ityi ziqui, ta catyi ra: Tyahvi ndyoo suun Ndyoo Zuti vatyi siñun sa quehin.

⁴²Ta site vatyi siñun sa quehin tandihi saha, zoco catyi tacuan sa cuenda ñiyivi sa yucu ihya vatyi tacuan ta cua sino iñi ñu vatyi moo i tasi sii.

⁴³Ta sa ndihi cahan ra tacuan, ta ziqui i cana saa ra ta catyi ra: Lázaro quita xiña.

⁴⁴Ta ra i sihi cuan, i quita ra. Zucu ra zahma. Ta nuhñi minoo zahma nuu ra. Ta i catyi ra Jesús sihin ñiyivi: Ndasi ndo sii ra, naquita ra.

Nducu cahñi ñiyivi sii ra Jesús

⁴⁵Tacuan ta ziqui i sino iñi cuaha xaan ra hebreo, ra ndihi sihin ña

María ta ndyehe ra cuhva i zavaha ra Jesús.

⁴⁶Zoco sahan zuhva ra nu yucu ra fariseo ta nacatyi ra cuhva i zavaha ra Jesús.

⁴⁷Yucuan cuenda i titahan ra zutu nahnu sihin ra fariseo, ta catyi ra: ¿Yozo caa zacuu yo vatyí cuaha xaan sa ndyityi zavaha ra cuan?

⁴⁸Tatu cuhva yo sa zavaha ca ra tacuan, cua sino xaan iñi tandíhi cuii ñiyivi sii ra. Ta cua quisi zandarú ñuu Roma ta cahñi ra sii yo ta zatívi ra ñuu yo. Catyi ra.

⁴⁹Ta minoo ra nañi Caifás, maa ra cuu ra cu nuu sii tandíhi cuii ra cu zutu cuiya cuan. Ta i catyi ra sihin ra: Ñahñi maa sa sito ndo.

⁵⁰Ña cutuñi iñi ndo vatyí vaha ca sa nacuu minoo tuhun ñi ra sa cuenda ñiyivi, ta yivi ca sa cuu tandíhi cuii yo. Catyi ra.

⁵¹Ñá cahan ra cuan sihin sa siñi tuñi xiñi ñi maa ra. Ra cu nuu sii tandíhi cuii ra cu zutu i cuu ra cuiya cuan. Ta vazú ña sito ra, zoco i cahan ra profecía vatyí cua cuu ra Jesús sa cuenda tandíhi ñiyivi hebreo.

⁵²Ta yivi sa cuenda sa maa ñi maa ñu, zoco cua zandu-iin ra sii tandíhi zehe ra Ndyoo, ñu indyacuán ta indyehe.

⁵³Ta ndya quívi cuan i zacasi tahan ra hebreo, ra ndyizo tyiño cuan, tyiño vatyí cua cahñi ra sii ra Jesús.

⁵⁴Yucuan cuenda ñá sica noo ndisi ca ra Jesús nu yucu ra hebreo. I quita ra yucuan ta saa ra ñuu Efraín yatyí nu ndyaa minoo nu ndahvi xaan caa, sa catyi yo

desierto. Ta yucuan i ndoo ra sihin ra i casi ra.

⁵⁵Ta sa cua tahan si quívi coo vico zuhun cuenda ñu hebreo. Ta i quita cuaha xaan ñu ñuu ñu, ta cuahan ñu ñuu Jerusalén cuee ca sa tahan si quívi coo vico vatyí cuñi ñu nduvaha ñu cuhva iyo costumbre maa ñu.

⁵⁶Ta yucuan i nanducu ñu sii ra Jesús, ta catyi ñu sihin tahan ñu nu ñoho ñu vehe ñuhu cahnu: ¿Ñaa sa sica iñi ndo? ¿Atu ma quisi ra vico ya? Catyi ñu.

⁵⁷Ra zutu nahnu sihin ra fariseo, sa i saha ra tyiño vatyí tatu yoo sa cua coto ndyamaa ndyaa ra Jesús cua zacoto ra sii ra cuan vatyí cua tiin ra sii ra.

I tyozo minoo ñaha azetye
vixi saha ra Jesús

12 Iñu quívi ca cuee ca sa tahan si vico zuhun cuan, i saa ra Jesús ñuu Betania nu iyo ra Lázaro, ra sa i sihi ta i zanandoto ra Jesús sii ra.

²Ta yucuan i zavaha ñu sa cuxiñi ra Jesús. I tyizo ña Marta coho nu mesa, ta ndyaa ra Lázaro sihin ra Jesús mesa.

³Tacuan ta ziqui i quihin ña María zava litro azetye vixi sa yahvi xaan ndyaa, ta i tyozo ña sii si saha ra Jesús, ta i zana-ityi ña saha ra sihin ixi xiñi ña. Ta i situ cuii vehe cuan sihin xico vixi.

⁴Ta i catyi minoo ra i casi ra Jesús, ra sa nañi Judas Iscariote zehe ra Simón, zuun ra cuu ra sa cua xico tuhun sii ra Jesús. Maa ra cuan i catyi:

⁵¿Ñacu ñá xico ñu azetye ya? ta cua ñihi ñu tañi cumi mil zazava ta tyindyee ñu sii ñiyivi ndahvi sihin si. Catyi ra.

⁶Zoco ñá catyi ra tacuan vatyi cuñi xaan ra sii ñiyivi ndahvi. I catyi ra tacuan vatyi minoo ra zuhu cuu ra, ta ndyizo ra yiti sa ñoho xuhun ra Jesús, ta quihin xehe ra xuhun cuan.

⁷Tacuan ta i catyi ra Jesús: Ma cahan ca ndo sihin ña. Zavaha ña sii si cuee ca sa cui ta cuhin nuñaña.

⁸Ñiyivi ndahvi cuan, cua coo ñu sihin ndo tandihi cui tyiemvu. Zoco yuhvi ma cundyei sihin ndo tandihi tyiemvu.

Cuñi cahñi ñiyivi sii ra Lázaro

⁹Ta sa ñihi ñiyivi hebreo tuhun vatyi ndyaa ra Jesús ñuu Betania, cuaha xaan ra saa coyo. Ña iin ñi sa cuenda ra Jesús i quisi ra, quisi ra vatyi cuñi ra ndyehe ra sii ra Lázaro, ra i zanandoto ra Jesús.

¹⁰Zoco ra zutu nahnu i natuhun tahan ra yozo caa ta cuu cahñi ra sii ra Lázaro.

¹¹Vatyi sa cuenda ra Lázaro, ta cuaha xaan ra hebreo zaña ra tuhun zacuaha ra cu zutu ta sino iñi ra sii ra Jesús.

I quihvi ra Jesús ñuu Jerusalén

¹²Ta inga quivi i saa cuaha xaan ñiyivi ñuu Jerusalén sa cuenda vico zuhun, ta sa i sito ñu vatyi vasi ra Jesús

¹³i sahndya ñu ndaha tuticaha ta i quita coyo ñu ta cua zatahan ñu sii ra, ta cana saa ñu ta catyi ñu: iCahnu xaan cuu ra vasi sa cuenda

ra Ndyoo! iRey, ra ndyaca ñaha sii yo cuu ra! Catyi ñu.

¹⁴Ta i ñihi ra Jesús minoo burro luhlu, ta yozo ra sii ti tañi catyi si sisi Tuhun Ndyoo:

¹⁵Ma yuhu ndo ñiyivi ñuu Sión;
Ica rey ndo vasi ya;
Yozo ra minoo burro luhlu.

Tacuan catyi si.

¹⁶Ña cutuñi iñi ra i casi ra Jesús cuhva ya sa xihna ñi, zoco ta sa cua nanuhu ra Jesús ndya gloria ta ziqui i nacohon iñi ra i casi ra vatyi tacuan ndyaa si sa cuenda ra Jesús, ta i nacohon iñi ra vatyi tacuan i zavaha ñiyivi sihin ra.

¹⁷Ta i saha ñiyivi sa ndaa, ñiyivi sa yucu sihin ra Jesús nu i cana ra sii ra Lázaro sisi ñaña ta i zanandoto ra sii ra.

¹⁸Ta yucuan cuenda cuaha xaan ñiyivi i zatahan sii ra Jesús vatyi sa sito ñu vatyi i zavaha ra sa ndyityi cuan.

¹⁹Zoco i catyi ra fariseo sihin tahan ra: Ndyehe ndo vatyi ma cuu ca zavaha yo ñaa sa cuñi yo sihin ra vatyi sa tandihi cui ñiyivi sino iñi sii ra.

Nanducu ra griego sii ra Jesús

²⁰Ta yucu tucu zuhva ra griego, ra i saa sihin ñiyivi vico cuan sa cua zacahnu ra sii ra Ndyoo.

²¹Ta i tuhva ra sii ra Felipe ra ñuu Betsaida nu cu si Galilea, ta i catyi ra sihin ra: Tata, cuñi xaan ndi natuhun ndi sihin ra Jesús.

²²Ta i sahan ra Felipe, ta nacatyi ra sihin ra Andrés. Ta ziqui i sahan ra Andrés sihin ra Felipe cua nacatyi ra sihin ra Jesús.

²³Ta i catyi ra Jesús sihin ra: Sa saa cuhva cua cui, ta ra i quisi ndya gloria cua cunanuhu ra ndya gloria.

²⁴Sa ndisa ta sa ndisa catyi sihin ndo vatyí minoo siti trigo tatu ma canacava si nu ñuhu ma cuu si, zoco minoo tuhun ñi si cua coo sa tacuan. Ta tatu cua cuu si, cuaha xaan siti si cua nanduu.

²⁵Ra sa cuñi coo vaha, cunaa ra sihin si. Ta inga ra tatu ndoo ra vaha vazu cahan ñiyivi sii ra sa cuenda Tuhun Ndyoo, cua coo vaha ra cuan ndya gloria, ta ma cuu añima ra.

²⁶Tatu iyo ndo cuñi ndo zatyíño ndo tyiñe, cundyico ndo sii. Ta nu cua cundyei, yucuan cua cundyaa tucu maa ndo. Ta tatu iyo ndo sa cua zatyíño ndo tyiñe, cua zacahnu Zuti sii ndo.

Nacatyí ra Jesús vatyí cua cuu ra

²⁷Ta vityí ndahvi xaan cuñi añime. ¿Ta ñaa sa cua catyi? ¿Atu cua catyi: “Zuti zacacun sii, sihin tundoho sa cua ndyehi vityí”? Ma catyi tacuan vatyí vasi ñuu ñiyivi sa cuenda sa cua ndyehi tundoho ya.

²⁸Vaha ca nacatyí: “Zuti zanducahnu zivun.” Tacuan i catyi ra Jesús. Ta ziqui i quisi minoo nduzu ndya andivi ta catyi si: Sa i zanducahnu mi zivi, ta cua zanducahni sii si inga saha.

²⁹Ta i siñi ñiyivi sa yucu yucuan nduzu cuan, ta i catyi ñu vatyí cahan zavi. Ta inga ñu i catyi ñu vatyí cahan minoo ángel ra Ndyoo sihin ra Jesús.

³⁰Ta i nacahan ra Jesús ta catyi ra: Ña vasi nduzu ya sa cuenda mi. Vasi si sa cuenda maa ndo.

³¹Ta vityí cua tasi tuñi ra Ndyoo sii ñuu ñiyivi ya. Ta ra ndyaca ñaha sii ñuu ñiyivi ya, vityí cua tava ra Ndyoo sii ra ityi sata.

³²Ta yuhvi tatu cua tyaa ñiyivi sii nu cruz, cuaha xaan ñiyivi cua sino iñi sii.

³³Ta sa i cahan ra Jesús tuhun ya, saha ra sa cua coto ñiyivi cuhva cua cuu ra.

³⁴Ta i nacahan ñiyivi ta catyi ñu: Sa siñi ndi vatyí catyi si nuu ley ra Ndyoo vatyí ra Cristo, tacuan ñi cua coo ra tandihi cuii tyiemvu. ¿Ta ñacu catyun vatyí cuñi si sa tyaa ñiyivi sii ra i quisi ndya gloria nu cruz? ¿Yoo ra cuu ra i quisi ndya gloria?

³⁵Tacuan ta ziqui i nacatyí ra Jesús sihin ñu: Zuhva ñi ca cuhva cua coo ñuhu nu yucu ndo. Caca ndo ñii ñi sa ndyaa ñuhu ya, coto quisi sa ñaa ta ma cuu ca caca ndo. Vatyí ra sica noo nu ñaa, ña sito ra ndya ityi cuahan ra.

³⁶Ñii ñi sa ndyaa ñuhu sihin ndo, sino iñi ndo sii ra. Vatyí tacuan ta cua cuu ndo zehe ñuhu. (Cua cuu ndo ñiyivi sa zama cuhva iyo.)

Ña sino iñi ra hebreo sii ra Jesús

Tacuan i catyi ra Jesús, ta cuahan ra ta i quihvi xehe ra sii ñu.

³⁷Vazu sa cuaha xaan sa ndyityi i zavaha ra nuu ñiyivi cuan, zoco ñá sino iñi ñu sii ra

³⁸vatyí tacuan ta cua quita si tañi i catyi ra Isaías, minoo ra cu profeta, quivi i catyi ra tyehen:

Tata ¿yoo ra sino iñi sa quehin?

Ta ¿yoo sii i zañaha ra ndyaca ñaha sii yo cuhva cuu zacuu ra?

³⁹Yucuan cuenda ña cuu sino iñi ñu vatyí zuun ñi i catyi tucu ra Isaías:

⁴⁰I zanducuaa ra siti nuu ñiyivi cuan, ta i zanduñihi ra iñi ñu.

Ta tacuan ta ma ndyehe ñu
sihin siti nuu ñu, ta ma
cutuñi iñi ñu sihin añima ñu
ta nazama ñu cuhva iyo ñu, ta
ma zanduvehi sii ñu.

Catyi ra Ndyoo.

⁴¹I catyi ra Isafas tuhun ya quivi
i ndyehe ra vatyí cahnu xaan cuu
maa ra Ndyoo ta tyaqui xaan ra. Ta
i cahan ra cuenda ra.

⁴²Zoco cuaha xaan ra cu tyiño
ñuu cuan, i sino iñi ra sii ra Jesús.
Zoco ñá saha ra sa ndaa vatyí yuhu
ra sii ra fariseo coto tava ndyizo ra
sii ra sisi vehe ñuhu.

⁴³Vatyí cuñi xaan ca ra cuan sa
tyaa ñiyivi yahvi sii ra, ta ña sica
iñi ra tatu cua cuzii iñi ra Ndyoo
sihin ra a ma cuzii iñi ra.

Tuhun cahan ra Jesús cua tyicuhva si sii ñiyivi

⁴⁴I cana saa ra Jesús ta catyi ra:
Ra sa sino iñi sii, ña iñi ñi sii mi
sino iñi ra. Zoco sino tucu iñi ra sii
ra i tasi sii.

⁴⁵Ta ra sa ndyehe sii, ndyehe tucu
ra sii ra i tasi sii.

⁴⁶Vasi ñuu ñiyivi ya tañi minoo
ñúhu vatyí yoo ra sino iñi sii, ma
ndoo ca ra nu ñaa.

⁴⁷Ta tatu sa siñi ñiyivi sa quehin
ta ma tyaa ñu yahvi, ma tyicuhve
sii ñu vatyí ña vasi tyicuhve. Vasi
zacaqui sii ñiyivi ñuu ñiyivi.

⁴⁸Ra sa ña cuñi sii mi caña ñi, ta ña
tyaa ra yahvi tuhun quehin, sa iyo sa
cua tyicuhva sii ra. Tuhun sa i quehin,
yucuan cuu sa cua tyicuhva sii ra
quivi cua tyicuhva ra Ndyoo sii ñiyivi.

⁴⁹Vatyí ña quehin sa cuenda ñi
mi. Zuti, ra i tasi sii, i saha ra tyiño
sii, tandihi cuii sa cuu nacatyí.

⁵⁰Ta site vatyí tyiño i saha ra sii,
cuu cuhva cundito ñiyivi tandihi
tyiemvu sihin ra. Yucuan cuenda
tandihi cuii sa catyi sihin ndo,
quehin cuhva saha Zuti tyiño sii.

I nacatya ra Jesús saha ra i casi ra

13 Ta sa vatyí vico zuhun, ta sa
sito ra Jesús vatyí sa cua tahan
si cuhva quita ra ñuu ñiyivi ya ta cuhun
ra nu ndyaa Zutu ra. I cuñi xaan ra sii
ñiyivi sino iñi sii ra ihya ñuu ñiyivi ta
cuhva cuñi ra sii ñu, ma ndihi maa si.

²Ta cuhva sa cuxiñi ra, ta i quihvi
cuihna añima ra Judas Iscariote
zehe ra Simón, vatyí cua xico tuhun
ra sii ra Jesús.

³Ta sa sito ra Jesús vatyí sa i saha
Zutu ra tandihi cuii tyiño sii maa ra.
Ta sa sito ra vatyí ndya nu ndyaa ra
Ndyoo i quita ra, ta ndya indyacuan
cua cunanuhu ra.

⁴Ta cuhva sa cuxiñi ra i nduvita
ra, ta i tava ra zahma sa ndisi ra, ta
sihñi ra minoo toalla sisi ra.

⁵Ta ziqui i tyihi ra ndutya sisi
minoo caa, ta quisaha nacatya ra
saha ra i casi ra. Ta zana-ityi ra
saha ra sihin toalla sa nuhñi sisi ra.

⁶Ta sa saa ra nu ndyaa ra Simón
Pedro, i catyi ra Pedro sihin ra:
Tata, ¿tatu cua nacatyon sehi?

⁷Ta i nacahan ra Jesús ta catyi ra:
Ña cutuñi iñun sa zavehi vityi, zoco
cuae ca cua cutuñi iñun. Catyi ra.

⁸Ta i catyi ra Pedro sihin ra:
Numinoo saha ta ma nacatyon sehi
caña ñi. Ta i catyi ra Jesús sihin ra:
Tatu ma nacatye sohon, yivi ñiyivi
sii cuu suun.

⁹Ta i catyi ra Simón Pedro sihin
ra: Tata, ña maa ñi sehi nacatyon,
nacatya tucun ndehi ta xiñi.

¹⁰Ta ziqui i catyi ra Jesús sihin ra: Ra sa sityi, maa ñi saha ra cuñi si ndoo vatyí sa ndii maa ra. Ta sa ndii maa ndo, zoco ña tandihi ndo.

¹¹Tacuan i catyi ra Jesús vatyí sa sito ra yoo ra cua xico tuhun sii ra. Yucuan cuenda i catyi ra: “Ña ndii tandihi ndo.”

¹²Tacuan ta sa ndihi nacatya ra saha ra, ta i naquihin ra zahma ra, ta sicundyaa ra mesa. Ta ziqui i nacatyi ra sihin ra: ¿Atu cutuñi iñi ndo cuhva i zavehi sihin ndo?

¹³Catyi maa ndo maestro cui, ta catyi ndo ra ndyaca ñaha cui, ta vaha cahan ndo vatyí zuun ra cui.

¹⁴Tatu yuhvi cuu maestro ta ra ndyaca ñaha ta i nacatye saha ndo. Tacuan tucu maa ndo, tahan si nacatya ndo saha tahan ndo.

¹⁵Vatyí sa i sehi minoo cuhva sii ndo, ta cuñi si sa cua zavaha tucu ndo cuhva i zavehi sihin ndo.

¹⁶Sa ndisa ta sa ndisa catyi sihin ndo vatyí ña cahnu ca ra cu muzu ta ziqui patrón ra. Ta cahnu ca cuu ra tava tyiño sii ñiyivi ta ziqui ca ra cuahan sihin tyiño.

¹⁷Tatu sito ndo tuhun ya, zii xaan cua cuñi ndo tatu zavaha ndo sii si.

¹⁸Ña quehin sa cuenda tandihi ndo. Sa site yoo ndo i casi. Zoco cua cuu si cuhva catyi tutu Tuhun Ndyoo: “Ra sa sasi pan sihin, cua nduvita ra ziqui.”

¹⁹Ta vityi sa nacatyi sihin ndo cuee ca sa tahan si vatyí quivi cua tahan si ta cua sino iñi ndo vatyí yuhvi cuu ra sa nacatyi sihin ndo.

²⁰Sa ndisa ta sa ndisa catyi sihin ndo vatyí ra naquihin vaha sii ra tasi, naquihin vaha ra sii. Ta ra naquihin vaha sii, naquihin vaha ra sii ra sa tasi sii.

Zacoto ra Jesús sii ra i casi ra vatyí cua xico tuhun ra Judas sii ra

²¹Ta sa ndihi cahan ra Jesús tuhun cuan, ta i quisi minoo sa cuihya xaan cuñi añima ra, ta i catyi ra: Sa ndisa ta sa ndisa catyi sihin ndo vatyí iyo minoo ndo cua xico tuhun ndo sii.

²²Ta cuhva cuan i nandyehé ra i casi ra Jesús sii tahan ra vatyí ña sito ra yoo ra cuu ra cahan ra Jesús tuhun.

²³Ta minoo ra i casi ra Jesús, ra sa cuñi xaan ra, nañaa ra sii ra Jesús.

²⁴Ta i saha ra Simón Pedro minoo zeña sii ra cuan sihin ndaha ra vatyí nanducu tuhun ra sii ra Jesús yoo ra cuu ra sa cahan ra tuhun.

²⁵Ta ra yucuan, i tuhva ca ra sii ra Jesús ta nducu tuhun ra: Tata, ¿yoo ra cuu ra sa cohon tuhun?

²⁶Ta i nacahan ra Jesús ta catyi ra: Cua zatyí pan, ta cua cuhve sii si sii minoo ra. Yucuan ra cuu ra. Ta sa zatyí ra Jesús pan cuan, ta i saha ra sii si sii ra Judas Iscariote, zehe ra Simón.

²⁷Ta sa ndihi sasi ra Judas pan cuan, i quihvi cuihna añima ra. Ta ziqui i catyi ra Jesús sihin ra: Cuhva sa cua zavohon, zavohon sii si yatyí ca.

²⁸Zoco ña sito numinoo ra ndyaa mesa sihin ra Jesús ñaa cuenda i cahan ra tacuan sihin ra Judas.

²⁹Iyo ra i sica iñi ra vaziqui i catyi ra Jesús: “Cuahan cua zaton ñaa sa cua cuñi si sii yo cuenda vico zuhun ya.” A catyi ra: “Cuhvon xuhun sii ñiyivi ndahvi.” Vatyí cumi ra Judas yiti sa ñoho xuhun ra Jesús.

³⁰Ta sa ndihi sasi ra Judas pan cuan, ta zuun ñi caa cuhva cuan i nduvita ra ta cuahan ra. Ta sa cuaa ñi cuu si.

**Minoo tyiño saa saha ra
Jesús, ta ñiñi xaan si**

³¹Ta sa yaha cuahan ra Judas ta ziqui i catyi ra Jesús: Vityi sa tahan si cuhva vatyi cua coto ñiyivi vatyi iyo xaan cuhva sii ra i quisi ndya gloria ta cua zacahnu ñu sii ra, ta cua zacahnu xaan ñu sii ra Ndyoo sa cuenda ra.

³²Vatyi tatu ra i quisi ndya gloria zañaha ra vatyi cahnu xaan cuu maa ra Ndyoo. Zuun ñi cuhva cuan cua zañaha ra Ndyoo vatyi cahnu xaan cuu maa ra cuan. Ta numi xaan cua nacoto vaha ndo sii si.

³³Ndoho zehe luhli, zuhva ñi ca cuhva cua cundyei sihin ndo. Cueue ca cua nanducu ndo sii, ta tañi sa i catyi sihin ra hebreo nacatyí sihin maa ndo vityi vatyí nu cuhin ma cuu cuhun ndo.

³⁴Sehi minoo tyiño saa sii ndo vatyí cuñi ndo sii tahan ndo tañi cuñi mi sii ndo.

³⁵Ihya cuhva cua coto tandihi ñiyivi vatyí ndyico ndo sii, tatu cuñi ndo sii tahan ndo.

**Zacoto ra Jesús sii ra i casi
ra vatyí cua catyi ra Pedro
vatyi ña sito ra sii ra**

³⁶Ta i catyi ra Simón Pedro sihin ra: Tata, ¿ndyamaa cua cuhun? Ta i catyi ra Jesús sihin ra: Nu cuhin ma cuu cuhun sihin vityi, zoco cuee ca ta cua cuhun. Catyi ra.

³⁷Ta i catyi tucu ra Pedro sihin ra: Tata, ¿ña cuenda ma cuu cuhin

suhun vityi? Cuhin vazu cui sa cuendon.

³⁸Ta i nacahan ra Jesús ta catyi ra: ¿Atu cuu cuun sa cuende? Sa ndisa ta sa ndisa catyi suhun vatyí cuee ca sa vacu saa ndivi tyahnu ta cua catyún uñi tahan saha vatyí ña siton sii.

**Tañi minoo ityi cuu ra Jesús, ta
cuu cuhun yo nu ndyaa Zutu ra**

14 I catyi ra Jesús: Ma caca xaan iñi ndo. Sa sino iñi ndo sii ra Ndyoo. Sino tucu iñi ndo sii mi.

²Vehe Zuti, iyo cuaha xaan nu cuu cundyaa ndo. Tatu sa ña ndisa, ma nacatyí sihin ndo. Cuhin cua zanduvehi nu cua cundyaa ndo.

³Ta tatu cuhin ta zanduvehi nu cua cundyaa ndo, cua quisi inga saha ta naquihin sii ndo vatyí cuhun ndo ta cundyaa ndo nu cua cundyei.

⁴Sito ndo ndyamaa cuehin, ta sito ndo ityi.

⁵Ta i catyi ra Tomás sihin ra: Tata, ña sito ndi ndyamaa cuohon ¿ta yozo caa cuu coto ndi ityi? Catyi ra.

⁶Ta i catyi ra Jesús sihin ra: Yuhvi cui ityi. Ta maa ñi sa ndisa cuii quehin, ta sehi cuhva cundito ñiyivi. Yoñi cuu saa nu ndyaa Zuti tatu ma sino iñi ñu sii.

⁷Tatu sa vatyí nacoto ndo sii, nacoto tucu ndo sii Zuti. Ta ndya vityi sa nacoto ndo sii ra, ta sa ndyehe ndo sii ra.

⁸Ta i catyi ra Felipe sihin ra: Tata, zañohon sii ra Ndyoo Zutun sii ndi. Ta sihin sa yucuan ñi ta sa vaha ñi.

⁹Ta i catyi ra Jesús: Felipe, sa cuaha xaan quivi ndyei sihin

ndo. ¿Atu ta nacoto con sii? Ra sa ndyehe sii, sa ndyehe ra sii ra Ndyoo Zuti. ¿Ta ñaa cuenda catyun vatyí zañehi sii ra Ndyoo Zuti sii ndo?

¹⁰¿Atu ña sino iñun vatyí ndyaa ra Ndyoo Zuti sihin ta iin ñi cui sihin ra? Ta tuhun quehin, ña quehin sa cuenda ñi mi. Quehin tuhun ra Ndyoo Zuti, ra ndyaa sihin. Ta tyiño zavehi, maa ra zavaha sii si.

¹¹Sino iñi ndo vatyí iin ñi cui sihin ra Ndyoo Zuti ta ndyaa ra sihin. Zoco tatu ña sino iñi ndo cuhva cuan, zoco sino iñi ndo sa cuenda tyiño zavehi.

¹²Sa ndisa ta sa ndisa catyi sihin ndo, ra sa sino iñi sii, cua zavaha ra tyiño tañi tyiño zavehi. Ta tyiño cahnu ca cua zavaha tucu ra vatyí cuehin nu ndyaa ra Ndyoo Zuti.

¹³Ta tandihi sa cua caca ndo sii, sihin zivi mi, cua cuhve sii si. Ta tacuan ta cua zacahnu ca ñiyivi sii ra Ndyoo Zuti sa cuenda sa cua zavaha Zehe ra.

¹⁴Tandihi sa cua caca ndo sii, sihin zivi mi, cua cuhve sii si sii ndo.

I catyi ra Jesús vatyí cua zaquisi ra sii Tatyí Ii

¹⁵Tatu cuñi ndo sii, zavaha ndo cuhva catyi sihin ndo.

¹⁶Ta cua caca tahvi sii ra Ndyoo Zuti ta cua zaquisi ra sii inga ra cua tyindyee sii ndo. Ta cua ndoo ra cuan sihin ndo tandihi cuii tyiemvu.

¹⁷Tatyí Ii cuu ra, ta maa ñi sa ndisa cahan ra. Ña cuu ñihi ñiyivi ndya vaha ñi sii ra vatyí ña ndyehe ñu sii ra, ta ña nacoto ñu sii ra.

Zoco sa sito maa ndo sii ra vatyí ndyaa ra sihin ndo, ta cua coo ra sisi añima ndo.

¹⁸Ta ma zandoi sii ndo tacuan ñi. Cua quisi tuqui nu ndyaa ndo.

¹⁹Zuhva ñi ca cuhva, ta ma ndyehe ca ñiyivi ndya vaha ñi sii. Zoco maa ndo cua ndyehe ndo sii. Cua cundite, ta yucuan cuenda cua cundito tucu maa ndo sihin.

²⁰Ta quivi cuan, cua coto ndo vatyí iin ñi cui sihin Zuti, ta iin ñi cua cuu ndo sihin ta mi sihin maa ndo.

²¹Ta ra sa cumi vaha tandihi cuii tuhun i nacatyí sihin ndo ta zavaha ra sii si, yucuan ra cuu ra sa cuñi xaan sii. Ta ra sa cuñi sii, cuñi xaan Zuti sii ra. Ta cua cuñi xein sii ra, ta cua quisi nu ndyaa ra. Tacuan i catyi ra Jesús.

²²Ta i catyi ra Judas, zoco yivi ra Judas Iscariote cuu ra, ta i catyi ra sihin ra: Tata, ¿ñaa cuenda cua quisun nu ndyaa maa ndi, ta ma cahun nu ndyaa inga ñiyivi ndya vaha ñi?

²³Ta i nacahan ra Jesús ta catyi ra sihin ra: Tatu cuñi minoo ra sii mi sa ndisa, cua tyaa ra yahvi tuhun quehin. Ta cua cuñi xaan Zuti sii ra. Ta cua cahun ndi nu ndyaa ra, ta cua ndoo ndi sihin ra.

²⁴Zoco ra ña cuñi sii, ña tyaa ra yahvi tuhun quehin. Ta tuhun quehin ta sa siñi ndo, yivi tuhun ñi mi cuu si. Sa cuenda ra Ndyoo Zuti cuu si, ra i tasi sii.

²⁵Ta sa nacatyí cuhva ya sihin ndo ñi ñi sa ndyei sihin ndo vityi.

²⁶Ta ra sa cua tyindyee sii ndo, ra cu Tatyí Ii, cua tasi ra Ndyoo Zuti sii ra sa cuenda mi. Cua zacuaha ra

sii ndo tandihi. Ta cua zanacohon ra iñi ndo tandihi sa i catyi sihin ndo.

²⁷Ta sa coo vaha ndo sehi sii ndo. Ta sa coo vaha ndo zandoi sihin ndo. Ña sehi sii si cuhva saha ñiyivi ñuu ñiyivi ya. Ma cuhva ndo sa caca xaan iñi ndo, ta ma yuhu ndo.

²⁸Ta vityi sa siñi ndo sa catyi vatyí cuhin, ta cua quisi tuqui nu ndyaa ndo. Tatu ndisa vatyí cuñi xaan ndo sii, zii xaan cua cuñi ndo vatyí cuhin nu ndyaa ra Ndyoo Zuti vatyí cahnu ca cuu maa ra ta ziqui ca mi.

²⁹Ta vityi sa nacatyí sihin ndo cuae ca sa tahan si vatyí quivi cua tahan si ta cua sino iñi ndo.

³⁰Ña cuaha ca tuhun cua quehin sihin ndo vatyí sa vasi ra ndyaca ñaha ñuu ñiyivi ya, ta ña ndyaca ñaha ra sii.

³¹Zoco sa cua nacoto ñiyivi ñuu ñiyivi vatyí cuñi xein sii ra Ndyoo Zuti, yucuan cuenda cua zavehi tyiño i tava ra sii. Ta vityi nanduvita yo ta cuhun yo.

Ra Jesús cuu ra tañi minoo yoho uva sihin zoco tu

15 Yuhvi cui tañi minoo yoho uva, ta Zuti cuu tañi ra zatyiño nu ndyaa tu.

²Ta tandihi zoco yoho uva cuan sa ñahñi yucu vixi vaha saha cua cahndya ra sii si. Ta tandihi zoco yoho sa ndyizo yucu vixi vaha, zanduvii ra sii si, ta tacuan ta cua cuhva si cuaha ca.

³Ta maa ndo sa nduvii ndo sihin tuhun quehin sihin ndo.

⁴Iñi ñi cuu ndo sihin. Tañi mi iñi ñi cui sihin ndo. Tañi minoo zoco

yoho, ma cuu cuhva si yucu vixi sa maa ñi maa si, tatu ña iñi ñi cuu si sihin yoho sa cuu saha si. Ta tacuan tucu maa ndo; ma cuu zavaha ndo cuhva catyi sihin ndo tatu ña iñi ñi cua cuu ndo sihin.

⁵Yuhvi cui tañi yoho uva cuan, ta maa ndo cuu tañi zoco tu. Ra sa nañaa sii, nañei sii ra. Ta cuaha xaan sa vaha zavaha ra. Vatyí tatu ma tyindyei sii ndo ñahñi maa sa cuu zavaha ndo.

⁶Ta ra sa ña nañaa sii, cua zavite sii ra tañi minoo zoco yoho. Ta cua na-ityi zoco yoho cuan, ta cua quisi naquihin ñiyivi sii si, ta cua tyihi ra sii si nu cayu ñúhu vatyí cua cayu si.

⁷Tatu nañaa ndo sii, ta tuhun quehin iyo vaha si sihin ndo, cua caca ndo ñaa sa cuñi ndo ta cua ñihi ndo sii si.

⁸Cuhva cuan zacahnu xaan sii sii Zuti tatu cuaha xaan sa vaha zavaha ndo. Ta tacuan ta cua cuu ndo ñiyivi ndyico sii mi sa ndisa.

⁹Cuhva cuñi xaan Zuti sii, ta tacuan cuñi sii maa ndo. Ma naa iñi ndo cuhva cuñi xein sii ndo.

¹⁰Tatu zavaha ndo tandihi sa catyi sihin ndo, cua cuñi xein sii ndo. Tañi sa i tyaa xein yahvi tandihi sa i catyi Zuti sihin, ta cuñi xaan ra sii.

¹¹Quehin cuhva ya sihin ndo vatyí cuzii cuñi ndo tañi sa zii cuñi mi. Ta sa zii cuñi maa ndo, ma ndihi si.

¹²Ihya cuu tyiño sehi sii ndo vatyí cuñi xaan ndo sii minoo ndo ta sii inga ndo tañi cuñi xein sii ndo.

¹³Tatu cuñi ndisa cuii yo sii inga ñiyivi, cuhva yo sa cuu yo sa

cuenda ñu. Ñahñi inga ca cuhva ñihi ca cuñi yo sii ñu.

¹⁴Maa ndo cuu ñiyivi sa cuñi xein tatu zavaha ndo tandihi cuhva sa i catyi sihin ndo.

¹⁵Ndya vityi ma cahan que muzu sihin ndo vatyi minoo muzu ña sito ra ñaa sa zavaha patrón ra. Zoco catyi vaty ñiyivi sa cuñi xein cuu sii maa ndo vaty sa i nacaty sihin ndo tandihi cui sa i nacaty Zuti sihin.

¹⁶Ñá casi ndo sii. Yuhvi cuu ra i casi sii ndo. Ta i sehi tyiño sii ndo vaty cuhun ndo ta zatyño ndo tyiñe. Ta cua quita vaha tyiño ndo, ta ma cunaa si. Ta tandihi sa cua caca ndo sii Zuti sihin zivi mi cua cuhva ra sii si sii ndo.

¹⁷Ta ihya cuu tyiño sehi sii ndo vaty cuñi xaan ndo sii minoo ndo ta sii inga ndo.

Cua cuxaan ñiyivi ndya vaha ñi sihin ndo

¹⁸Tatu ña cuu ndyehe ñiyivi ña sino iñi sii ndo, sa sito ndo vaty sa xihna ñi sii mi ña cuu ndyehe ñu ta ziqui sii maa ndo.

¹⁹Tatu ñiyivi cuenda ñuu ñiyivi ya cuu ndo, cua cuñi xaan ñiyivi ñuu ñiyivi ya sii ndo. Zoco yivi ca ñiyivi ñuu ñiyivi ya cuu ndo vaty sa i casi sii ndo sisi ñuu ñiyivi ya. Yucuan cuenda, ña cuu ndyehe ñiyivi ndya vaha ñi sii ndo.

²⁰Nacohon iñi ndo vaty sa i nacaty sihin ndo vaty ña cahnu ca cuu ra cu muzu ta ziqui ca patrón ra. Tatu sa cuxaan ñiyivi sihin mi, cua cuxaan tucu ñu sihin maa ndo. Tatu zavaha ñu cuhva catyi, cua

zavaha tucu ñu cuhva catyi maa ndo.

²¹Zoco tandihi cui nuu sa ña vaha cua zavaha ñu sihin maa ndo sa cuenda mi vaty ña sito ñu sii ra i tasi sii.

²²Tatu sa ñá quisi quehin sihin ñu, ñahñi cuaty ñu. Zoco vity ñahñi cuhva cuu tyixehe ñu cuaty ñu.

²³Ra sa ña cuu ndyehe sii, ña cuu ndyehe tucu ra sii Zuti.

²⁴Tatu sa ñahñi sa ndyityi i zavehi nu yucu ñu tañi sa yoñi zavaha, ñahñi cuaty ñu. Zoco vity sa i ndyehe ñu sii, ta i cuxaan ñu sihin mi ta sihin Zuti.

²⁵Tacuan cua cuu si vaty cua tahan si cuhva catyi si sisi zuun ñi ley maa ñu nu catyi si: “Vazu ñahñi cuaty, zoco ma cuu ndyehe ñu sii.” Catyi si.

²⁶Zoco quivi naquisi Taty Ii, ra cua tasi ndya nu ndyaa ra Ndyoo Zuti, cua tyindyee ra sii ndo, ta maa ñi sa ndisa cua cahan ra. Ra cuan cua cuhva sa ndaa sa cuenda mi.

²⁷Ta maa tucu ndo cua cuhva ndo sa ndaa vaty i sindihi ndo sihin ndya quivi i quisaha zatyñe.

16 Ihya tuhun i quehin sihin ndo vaty ma catyih saha ndo.

²Cua tava ndyizo ñiyivi sii ndo sata vehe ñuhu. Ta cua saa cuhva vaty yoo ra sa cua cahñi sii ndo ta cua caca iñi ra vaty tyiño ra Ndyoo zatyño ra.

³Ta cua zavaha ñu cuhva ya vaty ña sito ñu sii ra Ndyoo Zutu yo a sii mi.

⁴Zoco vity sa i nacaty cuhva ya sihin ndo vaty quivi cua tahan si

ta cua nacohon iñi ndo vatyí sa i catyí sihin ndo.

Cuhva cua zavaha Tatyí li ra Ndyoo

Ñá catyí tuhun ya sihin ndo sa xihna ñi vatyí ndeyé sihin ndo.

⁵Zoco vatyí cua cuhin ndya nu ndyaa ra i tasi sii. Ta yoñi ndo cua nducu tuhun ndo sii, ndyamaa cuhin.

⁶Ta vatyí sa nducuihya cuñi añima ndo vatyí sa i catyí tuhun ya sihin ndo.

⁷Ta catyí sa ndisa sihin ndo vatyí ñiñi xaan cuu si sa cuhin vatyí tatu ma cuhin ma quisi Tatyí li ziqui ndo. Cua cuhin ta cua zaquisi sii ra ziqui ndo.

⁸Ta quiví cua quisi ra, cua zacoto ra sii ñiyiví vatyí iyo cuatyí ñu. Ta cua zañaha ra vatyí iyo minoo ityí ndoo. Ta cua tasi tuñi ra Ndyoo sii ñiyiví sa ma ndu-uu iñi cuatyí.

⁹Cua catyí ra sihin ñiyiví vatyí iyo cuatyí ñu vatyí ña sino iñi ñu sii.

¹⁰Cua zañaha ra sii ñu vatyí iyo minoo ityí ndoo vatyí cuhin nu ndyaa Zuti, ta ma ndyehe ca ndo sii.

¹¹Ta cua zañaha ra cuhva cua tasi tuñi ra Ndyoo vatyí cua tasi tuñi ra Ndyoo sii ra ndyaca ñaha ñuu ñiyiví ya.

¹²Iyo cuaha xaan ca sa cuñi catyí sihin ndo, zoco ma cutuñi iñi ndo sii si vatyí.

¹³Zoco quiví cua quisi Tatyí li, cua cahan ra sa ndisa vatyí ra cahan sa ndisa cuu ra. Maa ra cuan, cua zañaha ityí sii ndo sii tandíhi cuii sa ndisa. Ma cahan ra sa cuenda ñi maa ra. Tandíhi sa siñi ra nu ndyaa ra Ndyoo Zutu yo, cua zacoto ra sii ndo. Ta cua zacoto ra sii ndo ñaa sa cua coo ityí nuu ca.

¹⁴Cua zacahnu ra sii mi vatyí cua quihin ra tuhun quehin sihin ra, ta cua zacoto ra sii ndo.

¹⁵Tandíhi cuii sa iyo sii Zuti ta sii mi cuu tucu si. Yucuan cuenda catyí vatyí cua quihin ra tuhun quehin sihin ra, ta cua zacoto ra sii ndo.

Cuihya cuñi ra i casi ra Jesús, zoco cuee ca ta cua nduzii cuñi ra

¹⁶Zuhva cuii ñi ca quiví, ta ma ndyehe ca ndo sii. Ta inga zuhva ca quiví ta cua nandyehe ndo sii, vatyí cuhin nu ndyaa Zuti. Catyí ra.

¹⁷Tacuan ta i quisaha natuhun tahan ra i casi ra Jesús sihin tahan ra: ¿Ñaa tuhun cuu si sa catyí ra sihin yo? vatyí catyí ra: “Zuhva cuii ñi ca quiví ta ma ndyehe ca ndo sii, ta inga zuhva ca quiví ta cua nandyehe ndo sii vatyí cuhin nu ndyaa Zuti”. Catyí ra.

¹⁸¿Ñaa cuñi si catyí si sa catyí ra zuhva cuii ñi ca quiví? Ña cutuñi iñi yo ñaa tuhun cahan ra. Catyí ra i casi ra Jesús.

¹⁹Ta i tuu iñi ra Jesús vatyí cuñi nducu tuhun ra sii ra, ta i catyí ra sihin ra: ¿Atu nducu tuhun ndo sii tahan ndo sa cuenda tuhun i catyí vatyí zuhva ñi ca quiví ta ma ndyehe ca ndo sii ta inga zuhva ca quiví ta cua nandyehe ndo sii?

²⁰Sa ndisa ta sa ndisa catyí sihin ndo vatyí cua vacu xaan ndo ta cua coo xaan tucuihya iñi sii ndo, zoco ñiyiví ñuu ñiyiví ya, cua cuzii xaan cuñi ñu. Ta cua nducuihya xaan iñi maa ndo, zoco cuee ca ta cua nduzii xaan cuñi ndo.

²¹Quiví sa cua cacu zehe minoo ñaha, ndyaa xaan ña tundoho vatyí

sa saa cuhva cacu si. Zoco tatu sa yaha cacu zehe ña, ña nacohon ca iñi ña tundoho. Sa nduzii cuñi ña vaty i cacu minoo rayii ñuu ñiyivi.

²²Ta maa ndo vityi, cuihya xaan cuñi ndo. Zoco cua ndyehi sii ndo inga saha, ta cua nduzii xaan cuñi ndo. Ta yoñi cua cuu tyaa siyo sa zii cuñi ndo.

²³Ta quivi cuan, ma nducu tuhun ca ndo sii. Sa ndisa ta sa ndisa catyi sihin ndo, tandihi sa cua caca ndo sii ra Ndyoo Zuti sihin zivi mi, cua cuhva ra sii si sii ndo.

²⁴Nu vityi ta tañaha ca caca ndo sihin zivi mi. Caca ndo ta cua ñihi ndo, ta tacuan ta zii xaan cua cuñi ndo.

I zahacanaa ra Jesús ziqui ñuu ñiyivi ya

²⁵I quehin tuhun ya sihin ndo sihin minoo cuhva. Zoco cua saa cuhva ta ma cahan que sihin ndo sihin minoo cuhva. Cua catyi casi vehi sihin ndo cuhva iyo ra Ndyoo Zuti.

²⁶Ta quivi cuan cua caca ndo sii ra Ndyoo sihin zivi. Ta ña catyi vaty cua caca tahvi sii ra Ndyoo Zuti sa cuenda ndo

²⁷vaty zuun ñi maa ra Ndyoo Zuti cuñi xaan ra sii ndo vaty cuñi xaan ndo sii, ta sino iñi ndo vaty i quisi ndya nu ndyaa ra Ndyoo.

²⁸Ndya nu ndyaa ra Ndyoo Zuti i quite ta vasi ñuu ñiyivi. Ta cua zandoo tuqui ñuu ñiyivi ya ta cunanuhi nu ndyaa ra Ndyoo Zuti inga saha.

²⁹Tacuan ta i catyi ra i casi ra sihin ra: Vityi casi vaha cohon, ta ña cahan con sihin minoo cuhva.

³⁰Vityi sito ndi vaty siton tandihi, ta ña cuñi si sa nducu tuhun numinoo ra suun (vaty sa siton tandihi sa sica iñi ndi). Yucuan cuenda sino iñi ndi vaty ndya nu ndyaa ra Ndyoo i quisun.

³¹Ta i catyi ra Jesús sihin ra: ¿Atu sino iñi ndo vityi?

³²Sa cua saa cuhva, ta zuun ñi vityi cuu si, ta cua quití cuaty ndo minoo minoo ndo ndya vehe ndo, ta cua zandoo ndo sii, maa tuhun ñi. Zoco ña maa tuhun ñi cua ndoo. Ndyaa ra Ndyoo Zuti sihin.

³³I quehin tuhun ya sihin ndo vaty tacuan ta cua coo sa taxi añima ndo sa cuenda mi. Ñuu ñiyivi ya cua ndyehe ndo tundoho, zoco ma yuhu ndo vaty sa i zahacanei ziqui ñuu ñiyivi ya.

Sica tahvi ra Jesús sii ra Ndyoo cuenda ra i casi ra

17 I cahan ra Jesús tuhun ya, ta ziqui i nandyehé ndaa ra ityi andivi ta catyi ra: Ndyoo Zuti, sa saa cuhva. Zacahnun sii zehun ta cuhva cua cuu zacahnu zehun suun.

²I sohon sa cundyaca ñehi ziqui tandihi ñiyivi sa iyo ñuu ñiyivi, ta i sohon sa vaty cuu cuhve sa cundito ñu tandihi cuii tyiemvu, tandihi ñu sa i sohon sii.

³Ta ihya cuu cuhva cua cuu cundito ñu sihin, tatu nacoto ñu suun vaty minoo tuhun ñi ra cuu Ndyoo sa ndisa cuii cuun. Ta sa nacoto ñu sii yuhvi ra Jesucristo, ra i tasun.

⁴I zacahni suun ñuu ñiyivi ya. I zandihí tyiño sa i sohon sii.

⁵Ta vityi, Ndyoo Zuti, zacahnun sii nu ndyoon sihin cuhva sa sicoo

sii, quivi i sindyei suhun indyacuan cumañi ca sino ñuu ñiyivi.

⁶I zañehi sii ra i sohon sii, cuhva iyo moo. Sii moo cuu sii ra, ta i sohon sii ra sii, sisi ñuu ñiyivi ya. Ta i tyaa ra yahvi tuhun cahan moo.

⁷Ta vityi sa sito ra vatyi tandihi cuii sa i sohon sii, cuenda moo cuu si.

⁸Vatyi tuhun sa i sohon sii, i zañehi sii ra ya, ta i naquihin vaha ra sii si. Ta sito ra sa ndisa cuii vatyi ndya nu ndyaa moo i quite. Ta sino iñi ra ya vatyi moo i tasi sii.

⁹Sica tahvi suun sa cuenda ra ya. Ña sica tahvi cuenda tandihi ñiyivi ñuu ñiyivi zoco cuenda ñiyivi sa i sohon sii, vatyí cuenda moo cuu sii ñu.

¹⁰Ta tandihi ñu cuu sii, sii moo cuu sii ñu. Ta ñu cuu suun cuu tucu sii mi, ndihi ca. Ta zacahnu ñu sii.

¹¹Ta vityi ma cundyaa que ñuu ñiyivi ya vatyí quisi nanuhin nu ndyaa moo. Zoco ra ya cua ndoo ra ñuu ñiyivi ya. Zuti, ra ii, zacuendon sii ñu sihin zivi moo, ñu i sohon sii, ta tacuan ta cua ndu-ïin ñu tañi maa yo.

¹²Ñi ñi sa ndyei sihin ra ya, i zacuende sii ra sihin zivi moo. I sicumi vehi sii ra ya, ta yoñi ra cua naa zoco minoo tuhun ñi ra cua naa tañi catyí Tuhun moo.

¹³Zoco vityí cua quisi nu ndyoon. Ta ñi ñi sa ndyei ñuu ñiyivi ya nacatyí tuhun ya, ta tacuan ta cua coo sa zii sii mi sihin ra ya, ta cua cuzii xaan iñi ra.

¹⁴Sa i nacatyí Tuhun moo sihin ra, ta ña cuu ca ndyehe ñiyivi ñuu ñiyivi ya sii ra vatyí yivi ca cuenda ñuu ñiyivi ya cuu ra. Tañi mi yivi ra cuenda ñuu ñiyivi ya cui.

¹⁵Ña sique suun sa tavon sii ra ñuu ñiyivi ya. Zoco sique suun sa vatyí cua zacuendon sii ra sisi sa ña vaha iyo ñuu ñiyivi ya coto ndoyo ñuhu ra.

¹⁶Yivi ca cuenda ñuu ñiyivi ya cuu sii ra. Tañi mi yivi cuenda ñuu ñiyivi ya cui.

¹⁷Zanduvaha con cuhva iyo ra sihin tuhun ndisa sii moo. Tuhun cahan moo, tuhun ndisa cuii cuu si.

¹⁸Tañi i tasun sii mi ñuu ñiyivi ya, zuun ñi tacuan tasi sii ra ya ñuu ñiyivi.

¹⁹Tyaa siye sii, sii sa ña vaha sa cuenda ra ya vatyí tacuan ta cua tyaa siyo tucu maa ra sii ra sii sa ña vaha ta cundyico ra sii, sa ndisa.

²⁰Ña ñin ñi sa cuenda ra ya sica tahvi, zoco ndya sa cuenda ñiyivi cua sino iñi sii sihin tuhun sa cua cahan ra ya.

²¹Ta tacuan ta cua ndu-ïin tandihi ñu tañi maa yo vatyí ñin ñi iyon sihin, ta ñin ñi iye suhun, Ndyoo Zuti. Ta tacuan ta cua ndu-ïin tucu maa ñu sihin yo. Ta tacuan ta cua sino iñi ñiyivi ñuu ñiyivi vatyí i zaquisun sii.

²²Ta sa vaha xaan sa sohon sii, i sehi sii ra ya vatyí ndu-ïin ra tañi maa yo ñin ñi cuu yo.

²³Yuhvi ta ra ya ñin ñi cuu ndi tañi yoho sihin mi ñin ñi cuu yo, ta nandu-ïin maa ra minoo sa ndisa cuii vatyí tacuan ta cua coto ñiyivi ñuu ñiyivi vatyí moo i tasi sii ta cuñi xoon sii ra ya tañi cuñun sii.

²⁴Ndyoo Zuti, cuñi sa vatyí ñiyivi sa i sohon sii, cua cundyaa ñu ñin ñi sihin mi nu cua cundyé, ta tacuan ta cua ndyehe ñu sa vaha xaan sa i sohon sii. Vatyí i cuñi xoon sii, cumañi ca sino ñuu ñiyivi.

²⁵Ndyoo Zuti, ra ndoo xaan, ña nacoto ñiyivi ñuu ñiyivi ya suun, zoco yuhvi site suun, ta sito ra ya vatyi moo i tasi sii.

²⁶Sa i zacote sii ra ya cuhva iyo moo, ta cua zacote cuaha ca sii ra. Tacuan ta cuhva cuñi xoon sii, cua coo si sisi añima ra, ta cua coo tucu yuhvi sisi añima ra.

Cuahan ra Jesús vehe caa

18 Ta sa ndihi cahan ra Jesús tuhun ya, i quita ra sihin ra i casi ra ta cuahan ra inga siyo yuu sa nañi Cedrón ndya minoo nu iyo cuaha xaan yutu ta ita. Ta yucuan i quihvi ra sihin ra i casi ra.

²Ta ra Judas, ra sa xico tuhun sii ra Jesús, sa sito tucu maa ra nu cuahan ra vatyi tuhva xaan ra Jesús sahan yucuan sihin ra i casi ra.

³Tacuan ta sa quihin ra Judas minoo ityi zandaru ta cuaha xaan policia cuenda ra zutu nahnu ta ra fariseo, ta cuahan ra sihin lámpara ta yiti ta sihin ndaha tyiño xaan.

⁴Ta sa sito ra Jesús tandihi tundoho sa cua tahan ra. Ta xihna ca maa ra i quita, ta i nducu tuhun ra sii ra sa vasi cuan: ¿Yoo sii nanducu ndo?

⁵Ta i nacahan ra ta catyi ra: Sii ra Jesús, ra ñuu Nazaret. Tacuan ta i catyi ra Jesús: Zuun yuhvi cui. Catyi ra. Ta ndihi ra Judas sihin ra cuan. Maa ra cuu ra i xico sii ra Jesús.

⁶Ta zuun ñi caa cuhva sa i catyi ra Jesús sihin ra: “Zuun yuhvi cui”, ta i sica sata tandihi ra cuan, ta i nduva tandihi cuii ra nu ñuhu.

⁷Tacuan ta i nducu tuhun ra Jesús sii ra inga saha: ¿Yoo sii nanducu

ndo? Ta i catyi ra cuan: Sii ra Jesús, ra ñuu Nazaret.

⁸Ta i nacahan ra Jesús ta catyi ra: Sa catyi sihin ndo vatyi zuun yuhvi cui. Tatu sii mi nanducu ndo, cuatu ndo nacuhun xihna ra ndihi sihin ya. Catyi ra.

⁹Tacuan cua cuu si, vatyi cua quita si tañi cuhva catyi Tuhun Ndyoo vatyi catyi si: “Ra sa i sohon sii, ñá zacunei numinoo ra.”

¹⁰Tacuan ta ziqui i tava ra Simón Pedro mityi sa ndyizo ra. Ta i cañi ra sii ra cu muzu sii ra cu nuu sii tandihi ra cu zutu, ta i sahndya ra zoho ra siyo cuaha ra. Malco nañi ra cu muzu cuan.

¹¹Tacuan ta i catyi ra Jesús sihin ra Pedro: Natyuhun mityun sisi veno si. ¿Atu ña cuñun sa ndyehi tundoho sa saha Zuti sii?

Cuahan ra Jesús nu ndyaa ra cu nuu sii tandihi ra cu zutu

¹²Tacuan ta ziqui minoo ityi zandaru cuan, sihin ra cu nuu sii ra ta ra cu policia cuenda ra hebreo, i tiin ra sii ra Jesús, ta i sihni ra sii ra.

¹³Ta sa xihna ñi i sindyaca ra sii ra ndya vehe ra Anás vatyi tyizo ra Caifás cuu sii ra. Ta ra Caifás cuu ra cu nuu sii tandihi ra cu zutu cuiya cuan.

¹⁴Ta ra Caifás, zuun ñi ra cuu ra sa catyi sihin ra hebreo quivi cuan vatyi vaha ca naccu minoo ñi ra sa cuenda tandihi, ta ma cuu tandihi ñiyivi.

I catyi ra Pedro vatyi ña sito ra sii ra Jesús

¹⁵Ta i sindyico ra Simón Pedro sii ra Jesús, ta tacuan tucu inga ra. Sito ra mandoñi sahnu Anás sii inga ra cuan, ta yucuan cuenda i

cuu quihvi ra sihin ra Jesús ndya yuvehe ra cu nuu sii tandihi ra cu zutu.

¹⁶Zoco i ndoo ra Pedro sata nuzama. Tacuan ta ziqui i quita inga ra. Sa sito ra cu nuu sii tandihi ra cu zutu sii ra cuan. I cahan ra cuan sihin ñaha zacuenda yuvehe, ta i cuu quihvi ra Pedro.

¹⁷Ta ñaha sa zacuenda yuvehe cuan, i catyi ña sihin ra Pedro: ¿Atu yivi minoo ra ndyico sii ra cuan cuun? Ta i catyi ra Pedro: Yivi ra cui.

¹⁸Ta yucuan yucu muzu ta tandihi ra policia. Sa zatahan ra ñúhu vatyí visi xaan, ta yucuan ndyaa ra yunuhu. Tuhva ra Pedro ta nandyaa ra sihin ra.

**I nducu tuhun xaan ra
Anás sii ra Jesús**

¹⁹Tacuan ta ziqui i nducu tuhun xaan ra mandoñi sahnu, ra Anás, sii ra Jesús yoo ra ndyico sii ra, ta ñaa sa zacuaaha ra.

²⁰Ta i nacahan ra Jesús, ta catyi ra sihin ra: I quehin ityi nuu tandihi ñiyivi. I zacuehi sisi vehe ñuhu tahan ñuu ta sisi vehe ñuhu cahnu ihya nu titahan tandihi ñiyivi hebreo. Ta ñahñi maa sa nacatyí xehi.

²¹¿Ñaa cuenda nducu tuhun sii? Nducu tuhun sii ñiyivi i siñi ñaa sa nacatyí sihin ñu. Sito maa ñu ñaa sa nacatyí sihin ñu.

²²Ta sa ndihi cahan ra Jesús tacuan, ta minoo ra cu policia sa ndyaa yatyí ñi i cati ra sii ra Jesús sihin ndaha ra ta catyi ra: Ña tacuan tahan si cohon sihin ra mandoñi sahnu.

²³Ta i nacahan ra Jesús ta catyi ra: Tatu i quehin ndya vaha ñi, catyun ñaa sa ña vaha quehin. Zoco tatu vaha quehin ¿ñaa cuenda catun sii? Catyi ra.

²⁴Tacuan ta i tasi ra Anás sii ra Jesús zoco nuhñi ra ndya nu ndyaa ra Caifás, ra cu nuu sii tandihi ra cu zutu.

**I catyi ra Pedro inga saha
vatyi ña sito ra sii ra Jesús**

²⁵Ta nandyaa ra Simón Pedro yunuhu. Tacuan ta ziqui i catyi ñiyivi sihin ra: ¿Atu yivi minoo ra ndyico sii ra cuan cuun? Ta i catyi ra Pedro: Yivi ra cui. Catyi ra.

²⁶Minoo muzu ra cu zutu ya cahnu cuu ñiyivi sii ra i sahdya ra Pedro zoho, ta i catyi ra cuan sihin ra Pedro: ¿Atu yivun i ndyehi sihin ra cuan yucuan nu iyo cuaha xaan yutu?

²⁷Ta i catyi ra Pedro inga saha vatyí yivi. Ta zuun ñi caa cuhva cuan i sacú saa ndivi tyahnu.

Cuahan ra Jesús nuu ra Pilato

²⁸Tacuan ta i sindyaca ra sii ra Jesús nu ñoho ra vehe ra Caifás ndya vehe tyiño cuenda ra gobernador. Ta nu ñaha ñi cuu si. Ta ñá quihvi ra hebreo sisi vehe tyiño vatyí yivi vehe hebreo cuu si, ta catyi ley hebreo vatyí tatu cua quihvi ra, cua nducuxi caa ra, ta ma cuu ca cuxiñi ra sisi vico zuhun.

²⁹Yucuan cuenda i quita ra Pilato ityi sata nu yucu ra cuan, ta catyi ra: ¿Ñaa cuatyí tyaa ndo sata ra ya? Catyi ra.

³⁰Ta i nacahan ra ta catyi ra: Tatu yivi ra iyo cuatyí cuu ra, ma nacuhva ndi sii ra suun.

³¹Tacuan ta i catyi ra Pilato sihin ra: Quihin maa ndo sii ra ta tyicuhva ndo sii ra cuhva catyi ley maa ndo. Ta i catyi ra hebreo sihin ra: Ña catyi ley ndi sa cahñi ndi numinoo ñiyivi. Catyi ra.

³²Tacuan cua cuu si ta cuhva cua quita si cuhva catyi ra Jesús yozo caa cua cuu ra.

³³Tacuan ta ziqui i nandihvi ra Pilato sisi vehe tyiño, ta i cana ra sii ra Jesús naquisi ra nu ndyaa ra, ta i catyi ra sihin ra: ¿Atu rey cuenda ñiyivi hebreo cuun?

³⁴Ta i nacahan ra Jesús ta catyi ra: ¿Atu cohon cuhva sa sica ñi iñi moo a sa iyo ñiyivi nacatyi suhun?

³⁵Ta i nacahan ra Pilato ta catyi ra: Yivi ra hebreo cui. Zuun ñi ñiyivi ñuu moo sihin ra zutu nahnu i quisi ndyaca suun sii. ¿Ñaa sa zacuun?

³⁶Ta i nacahan ra Jesús ta catyi ra: Nu ndyaca ñehi, yivi ñuu ñiyivi ya cuu si. Vatyi tatu cuñi cundyaca ñehi ihya, cua cahñi tahan ra ndyico sii, ta ma cuhva ra sii, sii ñiyivi hebreo. Zoco nu ndyaca ñehi, yivi ñuu ñiyivi ya cuu si.

³⁷Tacuan ta i catyi ra Pilato sihin ra: Vaziqui minoo rey cuun. Ta i catyi ra Jesús: Zuun cui cuhva catyun. Yucuan cuenda i caqui ta vasi ñuu ñiyivi ya vatyi cua cuu cuhve sa ndaa sa cuenda sa ndisa. Ta tandihvi ñiyivi zavaha sa vaha, tyaa ñu yahvi sa quehin.

³⁸Ta i catyi ra Pilato sihin ra Jesús: ¿Ñaa sa cuu sa ndisa? Ta sa catyi ra tacuan ta i quita tucu ra ndya ityi sata nu yucu ñu hebreo, ta i catyi ra sihin ñu: Ñahñi maa cuatyi ra iyo caña ñi.

³⁹Ta iyo minoo costumbre sii maa ndo sisi vico zuhun vatyi cua zañe sii minoo ra ñoho vehe caa. ¿Atu cuñi ndo vatyi zañe sii ra cu rey cuenda ñiyivi hebreo?

⁴⁰Ta i cana saa ñiyivi ta catyi ñu: Yivi ra ihya zañon. Zañon sii ra Barrabás. Catyi ñu. Ta ra Barrabás cuan, ra zuhu cuu ra cuan.

19 Ta yucuan cuenda i quihin ra Pilato sii ra Jesús, ta i saha ra sa cañi xaan zandaru sii ra.

²Ta i quihin zandaru iñu, ta zavaha ra minoo corona, ta i tyihi ra sii si xiñi ra Jesús. Ta i tyihi ra minoo zahma cañi tyacu zahma tixinda sii ra.

³Ta i catyi zandaru: iNacumi suun yoho rey, ra ndyaca ñaha cahnu sii ñiyivi hebreo! Ta i cati ra sii ra Jesús sihin ndaha ra. Ta i sacu ndyaa ra sii ra.

⁴Tacuan ta ziqui i quita tucu ra Pilato inga saha ityi sata, ta i catyi ra sihin ñiyivi hebreo: Ndyehe ndo, vasi ndyaque sii ra sii ndo vatyi coto ndo vatyi ñahñi maa cuatyi ra iyo sa cuenda mi.

⁵Ta i quita ra Jesús. Ñoho corona iñu xiñi ra ta ñoho ra zahma tyacu tixinda cuan. Ta i catyi ra Pilato sihin ñu: Ica ra ya.

⁶Ta sa ndyehé ra zutu nahnu ta ra ndihvi sihin ra sii ra Jesús, ta i cana saa ra ta catyi ra: Tyoon sii ra nu cruz. Tyoon sii ra nu cruz. Zoco i catyi ra Pilato sihin ra cuan: Quihin maa ndo sii ra ta tyaa ndo sii ra nu cruz tatu cuñi ndo, zoco sa cuenda mi ñahñi maa cuatyi ra iyo caña ñi.

⁷Ta i nacahan ra hebreo ta catyi ra: Iyo minoo ley sii maa ndi, ta catyi si vatyi tahan si sa cuu ra

vatyí catyí ra vatyí Zehe ra Ndyoo cuu sii ra.

⁸Ta sa siñi ra Pilato cuhva catyí ñu, ta i yuhu ca ra.

⁹Ta i nandihvi ra sisi vehe tyiño, ta i catyí ra sihin ra Jesús: ¿Ta ndyamaa i quisun? Zoco ñá cahan ra Jesús sa cahan ra.

¹⁰Tacuan ta ziquí i catyí ra Pilato sihin ra: ¿Ñacu ña cohon sa quehin? ¿Atu ña siton vatyí iyo cuhva sii, ta cuu catyí vatyí cahñi ñiyivi suun nu cruz, ta cuu zañe suun?

¹¹Ta i nacahan ra Jesús, ta catyí ra: Ñahñi maa sa cuu zavohon sihin tatu sa yivi ra Ndyoo i saha cuhva suun. Yucuan cuenda cahnu ca cuatyí ra saha cuenda sii suun.

¹²Ta sa ndihi cahan ra Jesús tacuan, ta i nducu ra Pilato cuhva zaña ra sii ra. Zoco i quisaha cana saa ra hebreo ta catyí ra: Tatu zañon sii ra ña, yivi amigo ra César cuun. Yoo ra catyí vatyí minoo rey cuu ra, cuñi ra quindyaa ra tyiño ra César.

¹³Ta sa siñi ra Pilato cuhva cuan, ta ziquí i sindyaca ra sii ra Jesús ityi sata, ta i sicundyaa ra tyayu ra nu tuhva ra zandaa tyiño, nu nañi si Gabata sihin zahan hebreo. Ta cuñi si catyí si Nu Ndava.

¹⁴Ta quivi sa zanduvaha ñiyivi cuenda vico zuhun i cuu si tañi maa ora, ta i catyí ra Pilato sihin ñiyivi hebreo: Ica rey ndo ya.

¹⁵Tacuan ta ziquí i cana saa ñiyivi inga saha, ta catyí ñu: ¡Quihin ndo sii ra! ¡Quihin ndo sii ra! Tyaa ndo sii ra nu cruz. Ta i catyí ra Pilato sihin ñu: ¿Atu cuñi ndo sa cahñi sii rey ndo? Ta i nacahan ra zutu nahnu, ta catyí ra: Yoñi ca inga rey ndi. Maa ñi ra César.

¹⁶Ta yucuan cuenda i saha cuenda ra Pilato sii ra vatyí cahñi ra sii ra nu cruz. Ta i quihin zandaru sii ra Jesús, ta cuahan ra sihin ra.

Nu i tyaa ra sii ra Jesús nu cruz

¹⁷Ta ndyizo ra Jesús cruz ra cuahan ra sihin ra ndya nu nañi si Yiquí Xiñi Ndiyí. Ta sihin zahan hebreo nañi si Gólgota.

¹⁸Ta yucuan i tyaa ra sii ra nuu cruz sihin clavo. Ta inga uu tahan ra, minoo ra siyo cuaha ta minoo ra siyo zatyí ra Jesús, ta ra Jesús mahñu.

¹⁹Ta i tyaa ra Pilato minoo zivi, ta i catyí ra vatyí cundyaa si xiñi cruz cuan ta catyí si: “Ra Jesús ñuu Nazaret, rey cuenda ñiyivi hebreo cuu ra.”

²⁰Cuaha xaan ra hebreo i cahvi tuhun sa ndyaa xiñi cruz cuan. Vatyí nu sihi ra Jesús, yatyí ndyaa si yuhu ñuu. Ta tuhun sa ndyaa xiñi cruz cuan, ndyaa si sihin zahan hebreo, zahan griego ta zahan latín.

²¹Ta ra zutu nahnu i catyí ra sihin ra Pilato: Ma tyoon: “Rey cuenda ñiyivi hebreo.” Tyoon vatyí maa ra catyí vatyí rey cuenda ñiyivi hebreo cuu ra.

²²Zoco i nacahan ra Pilato: Cuhva i tyei, sa ndyaa si.

²³Ta sa yaha i tyaa zandaru sii ra Jesús nu cruz, ta i quihin ra zahma ra. Sa cumi tahan ra i quihin ra minoo minoo si. Ta minoo zahma cañi sa ndisi ra, i cacu si ñin ñi; ñahñi nu i ndicui ñu sii si.

²⁴Yucuan cuenda i catyí zandaru sihin tahan ra: Ma ndata yo sii si. Nacuziquí yo, ta cua ndyehe yo yoo ra cua zahacanaa. Catyí ra. Ta

cuhva ya i quita si cuhva catyi Tutu ra Ndyoo:

I zasa ra zahme sii tahan ra,
Ta i siziqui ra yoo ra cua ñihi
zahma cañi vii.

Ta tacuan i zavaha zandaru.

²⁵Ta nandyaa zihí ra Jesús yatyí ñi saha cruz nu ndyaa ra Jesús nu cruz. Ta nandyaa tucu cuhu ña ta ña María ñazihí ra Cleofas ta ña María Magdalena tucu.

²⁶Ta sa ndyehe ra Jesús vatyí yatyí nandyaa zihí ra ta minoo ra i casi ra, ra sa cuñi xaan ra, ta i catyi ra Jesús sihin zihí ra: Ndyá vityí, ra ihya cua cuu zehun. Catyi ra.

²⁷Ta ziqui i catyi ra sihin ra i casi ra: Ta maa ña cua cuu zihun. Ta ndya cuhva cuan i quihin ra sii ña, ta cuahan ña vehe ra.

²⁸Ta sa yaha cuan, ta ziqui i sito ra Jesús vatyí sa i zavaha ra tandihí ta sa i cuu tandihí cuhva catyi si nuu Tutu ra Ndyoo. Ta ziqui i catyi ra: Ityi xein.

²⁹Ta yatyí ñi yucuan nandyaa minoo quizi situ cuui ndutya iya. Ta i zatyí zandaru minoo sa ñahma, ta i tyaa ra sii si minoo nuu zoco yutu sa nañi hisopo, ta i tyiña ra sii si yuhu ra Jesús.

³⁰Ta sa i sihi ra Jesús ndutya iya cuan, ta ziqui i catyi ra: Sa ndihí tyiño. Ta i nacañi noo ra xiñi ra, ta i nacuhva cuenda ra aña ra.

**I tusi minoo zandaru minoo
caa xaan xiin ra Jesús**

³¹Cumañi minoo ñi ca quivi ta cua cuu si quivi cahnu sisi vico zuhun cuenda ñiyivi hebreo. Ñá cuñi ra hebreo sa ndoo coño ñuhu cuan nu cruz quivi quitatu ñiyivi

vatyí cahnu xaan quivi zacuu ñiyivi quivi cuan sa cuenda vico zuhun. Yucuan cuenda i sica ra tumañi iñi sii ra Pilato vatyí cuhva ra sa cahnu zandaru yiqui ndoo ra sa ndyaa nu cruz. (Ta sa ndihí sahnú ra yiqui ndoo ra cuan ta yatyí ca cua cuu ra.) Ta cua cuu tyaa siyo ra sii ra.

³²Tacuan ta i saa zandaru, ta i sahnú ra yiqui ndoo minoo ra ta inga tucu ra sa ndyaa inga nu cruz.

³³Zoco sa saa ra nu ndyaa ra Jesús ta i ndyehe ra vatyí sa sihi ra, ta ñá sahnú ca ra saha ra.

³⁴Zoco i tusi minoo zandaru minoo caa xaan xiin ra Jesús, ta i quita ñiñi ta ndutya.

³⁵Ta minoo ra i ndyehe, saha ra sa ndaa, ta sa ndisa cahan ra. Sito maa ra vatyí sa ndisa cuu sa cahan ra. Ta nacatyí ra sii si vatyí cua cuu sino tucu iñi maa ndo.

³⁶Ta cuhva cuan i cuu tandihí si vatyí cua quita si tañi catyi Tutu ra Ndyoo nu catyi si: “Ma cahnu ñiyivi numinoo yiqui ra.”

³⁷Ta inga tucu nu tutu ra Ndyoo catyi si: “Cua ndyehe ñiyivi sii ra cuhva cua quihvi minoo caa xaan xiin ra.”

I tyihí ra sii ra Jesús sisi ñaña

³⁸Ta sa yaha cuan, ta ziqui i quisi ra José ra ñuu Arimatea. Sino iñi ra sii ra Jesús, zoco xehe ñi vatyí yuhu ra sii ra hebreo. Ta i sica ra tumañi iñi sii ra Pilato vatyí cuu quihin ra coño ñuhu ra Jesús. Ta i saha ra Pilato. Ta ziqui i sahan ra, ta i quihin ra coño ñuhu ra Jesús.

³⁹Ta i quisi tucu ra Nicodemo, ra sa sahan sa xihna ñi nu ndyaa ra Jesús minoo sa cuaa. Ndaha ra

cuaha xaan azetye vixi. Nazaca si sihin mirra ta áloe. Tañi minoo oco usi kilo si.

⁴⁰Tacuan ta ziqui i quihin ra José ta ra Nicodemo coño ñuhu ra Jesús, ta i cava noo ra zahma sa cahyu ra azetye vixi cuan cuhva iyo costumbre ñiyivi hebreo tatu cua tyihi ñu sii minoo ñiyivi sisi ñaña.

⁴¹Ta yatyi nu i sihi ra Jesús nu cruz sicoo cuaha xaan yutu tyaqui, ta yucuan sicoo minoo ñaña sa ta yoñi ca cutyiño.

⁴²Ta yucuan i tyihi ra sii ra Jesús vatyi yatyi ñi ndyaa si. Ta sa cua cuu si quivi quitatu ñiyivi hebreo.

I nandoto ra Jesús

20 Ta quivi tumingu ñaa ca i saa ña María Magdalena ndya ñaña, ta i ndyehe ña vatyi sa siñi siyo yuu sa sindazi yuñaña cuan.

²Tacuan ta ziqui i sino xaan ña ndya nu ndyaa ra Simón Pedro ta inga ra sa cuñi xaan ra Jesús, ta i catyi ña sihin ra: Sa sitava ñiyivi coño ñuhu ra Jesús sisi ñaña cuan, ta ña sito yo ndyamaa i natyih i ñu sii si.

³Yucuan cuenda i quita ra Pedro ta inga ra ta cuahan ra ndya ñaña.

⁴Nduu tahan ra i cacono ra, zoco ñihi xaan ca sino inga ra ta ziqui ra Pedro, ta xihna ca ra cuan i saa ñaña.

⁵Ta i ndyehe noo ra sisi ñaña, ta i ndyehe ra zahma sa i cava noo sii ra Jesús; catuu si nu ñuhu, zoco ñá quihvi ra.

⁶Ta ziqui i saa ra Simón Pedro, ta i quihvi ra sisi ñaña, ta i ndyehe ra zahma sa i cava noo sii ra Jesús; catuu si.

⁷Ta zahma luhlu sa ñoho xiñi ra Jesús, ña iin ñi catuu si sihin inga zahma cuan. Nacuiñi tahnu vaha si, ta catuu zihin si.

⁸Tacuan ta ziqui i quihvi tucu inga ra sa saa sa xihna ñi. Ta i ndyehe ra. Ta i sino iñi ra.

⁹Zoco tañaha ca coto ra vatyi catyi Tuhun Ndyoo vatyi ndyaa si sa cua nandoto tucu ra Jesús sa sa i sihi ra.

¹⁰Tacuan ta i quita ra i casi ra Jesús, ta cua nuhu ra ndya vehe ra.

I quituu ra Jesús nuu ña María Magdalena

¹¹Ta i nasaa ña María ndya ñaña, ta sa nandyaa ña yuhu ñaña, ta cuihya xaan i cuñi ña, ta i sacu xaan ña. Ta cuhva sa sacu ña, ta i nandyeh e noo ña sisi ñaña.

¹²Ta i ndyehe ña uu tahan ángel sa ñoho zahma cui si. Minoo ra ndyaa ityi nu sicaa xiñi ra Jesús, ta inga ra ityi nu i sicaa saha ra nu sicaa coño ñuhu ra.

¹³Ta i catyi ángel sihin ña: Maha, ¿ñacu sacu xoon? Ta i catyi ña: Vatyi i quihin ñiyivi coño ñuhu ra Jesús, ta ña site ndyamaa i tyih i ñu sii si.

¹⁴Ta sa ndih i cahan ña tacuan, ta i nasico cava ña, ta ndyehe ña sii ra Jesús nandyaa ra. Zoco ñá nacoto ña tatu zuun ra cuu ra.

¹⁵Ta i catyi ra Jesús sihin ña: Maha, ¿ñacu sacu xoon? ¿Yoo sii nanducun? Ta ña María sica iñi ña vatyi ra zacuenda yucuan cuu ra cahan, ta i catyi ña sihin ra: Tata, tatu yoho i quihin coño ñuhu ra ya, nacatyun sihin ndyamaa i tyuhun sii si vatyi cua naquihin sii si.

¹⁶Tacuan ta ziqui i catyi ra Jesús sihin ña: María. Ta i nandyehé vaha ña sii ra, ta i catyi ña sihin ra: ¡Rabboni! Zahan hebreo cuu si cuan, ta cuñi si catyi si Maestro.

¹⁷Ta i catyi ra Jesús sihin ña: Ma tiun sii vatyi tañaha ca nandaa xique ndya nu ndyaa Zuti. Zoco cuahan nu ndyaa tandihi ra sa cuñi xein, ta nacatyun sihin ra vatyi cuehin nu ndyaa Zuti, ta Zutu tucu maa ndo cuu sii ra. Ta nu ndyaa Ndyoo mi, ta Ndyoo tucu maa ndo.

¹⁸Ta ziqui cuahan ña María Magdalena nu yucu ra i casi ra Jesús, ta i nacatyi ña sihin ra vatyi sa i ndyehe ña sii ra Jesús ta i cahan ra tuhun cuan sihin ña.

Cahan ra Jesús sihin ra i casi ra

¹⁹Tacuan ta ziqui zuun ñi quivi tumingu cuan sa sahiñi i siyucu ra i casi ra Jesús iin ñi, ta ndazi cutu yuvehe vatyi yuhu ra sii ra hebreo, ta i quisi ra Jesús ta i sicuñi ndyaa ra mahñu, ta catyi ra sihin ra: Nacoo sa vaha sii ndo.

²⁰Ta sa yaha catyi ra tacuan, ta ziqui i zañaha ra ndaha ra ta xiin ra. Ta zii xaan i cuñi ra i casi ra sa i ndyehe ra sii ra Jesús.

²¹Tacuan ta i catyi ra Jesús sihin ra inga saha: Nacoo sa vaha sii ndo. Tañi sa tasi Ndyoo Zuti sii, sihin tyiño ra, zuun ñi cuhva cuan cua tasi sii maa ndo.

²²Ta sa ndihi catyi ra tacuan, ta i tivi ra tatyí ra sii ra, ta catyi ra sihin ra: Naquihin ndo Tatyí li.

²³Yoo sii cuatyi cua zandasi ndo, cua ndasi si sa ndisa. Ta yoo sii cuatyi ma zandasi ndo, ma ndasi cuatyi ñu. Catyi ra.

Ñihi xaan iñi ra Tomás

²⁴Ta ra Tomás minoo sa usi uu tahan ra i casi ra Jesús cuu ra. Nañi tucu ra Dídimo. Ta yoñi ra ndyaa cuhva sa quisi ra Jesús.

²⁵Ta i nacatyi inga ra i casi ra Jesús sihin ra: I ndyehe ndi sii ra Jesús. Zoco i catyi ra Tomás sihin ra: Tatu ma ndyehi nu cahvi ndaha ra nu i quihvi clavo ta tyihi nu ndehi yucuan, ta tatu ma ndyehi xiin ra nu quihvi caa xaan ta tyihi ndehi yucuan, ma sino iñi. Catyi ra.

²⁶Ta yaha uña quivi, ta ziqui ñoho ndazi tucu ra i casi ra Jesús, ta ndyaa ra Tomás sihin ra. Ta ndazi cutu yuvehe, zoco i quihvi ra Jesús ta i sicuñi ndyaa ra mahñu, ta i catyi ra: Nacoo sa vaha xaan sii ndo.

²⁷Ta ziqui i catyi ra sihin ra Tomás: Zatuhvon ndohon ta tyuhun nu ndohon ndehi, ta zatuhvon ndohon ta tyuhun sisi xiin. Ta ma cuu con minoo ra ña sino iñi, zoco sino iñun. Catyi ra.

²⁸Tacuan ta i catyi ra Tomás sihin ra: Moo cuu ra ndyaca ñaha sii. Ta moo cuu Ndyoo sii.

²⁹Ta i catyi ra Jesús sihin ra: Tomás, sa i ndyehun sii, ta yucuan cuenda sino iñun. Vaha xaan ca ñiyivi ma ndyehe sii, ta sino iñi ñu.

Iyo cuenda sa vatyi iyo libro ya

³⁰Ta iyo cuaha xaan inga sa ndyityi i zavaha ra Jesús nuu ra i casi ra, ta ña ndyaa si nuu libro ya.

³¹Zoco i tyei zuhva si ihya vatyi cua cuu sino iñi ndo vatyi ra Jesús cuu ra Cristo, zehe ra Ndyoo. Ta sihin sa sino iñi ndo, cua ñihi ndo

sa cacu añima ndo tandihì cuii tyiemvu sa cuenda maa ra.

**Cahan ra Jesús sihin usa
tahan ra i casi ra**

21 Ta sa yaha tandihì cuhva cuan, ta ziquì ihya cuu cuhva i cahan tucu ra Jesús inga saha sihin ra i casi ra yumiñi sa nañi Tiberias.

² Ìin ñi tayucu ra Simón Pedro sihin ra Tomás, ra nañi Dídimó, ta ra Natanael, ra ñuu Caná nu cu si Galilea, ta zehe ra Zebedeo ta inga uu tahan ra i casi ra Jesús.

³ Ta i catyi ra Simón Pedro sihin inga ra: Cuehin cua tiin tyiyaca. Ta i catyi inga ra sihin ra: Cua cuhun tucu maa ndi suhun. Ta cuahan ra, ta i quihvi ra minoo barco. Zoco ñahñi maa tyiyaca i ñihi ra sa cuaa cuan.

⁴ Ta cuhva sa vasi cundisi, sicuñi ndyaa ra Jesús nu ñiyiti, zoco ñá nacoto ra vatyí ra Jesús cuu ra.

⁵ Ta ziquì i catyi ra Jesús sihin ra: Zehe luhli, ¿atu ñahñi tyiyaca i ñihi ndo? Ta i catyi ra: Yoñi ti.

⁶ Ta i catyi ra Jesús sihin ra: Cañi ndo taraya ndo siyo cuaha, ta cua ñihi ndo. Ta i cañi ra sii si, ta ziquì ñá cuu ca tava ra taraya ra vatyí cuaha xaan tyiyaca ñoho.

⁷ Ta ra sa cuñi xaan ra Jesús i catyi ra sihin ra Pedro: Ra Jesús cuu ra. Ta sa siñi ra Simón Pedro vatyí ra Jesús cuu ra, ta i nazucu ra zahma ra sii ra vatyí sa i tava ra sii si sa cua tiin ra tyiyaca. Ta i quihvi ra nu miñi.

⁸ Ta i quisi inga ra sihin barco luhlu. Xita ra taraya sa ñoho tyiyaca vatyí ña sica ndyaa yuhu miñi tañi minoo ziendu metro ñi.

⁹ Ta sa i quita tandihì ra nu ñuhu, i ndyehe ra tuñuhu, ta yucuan catuu minoo tyiyaca ta pan tucu.

¹⁰ Ta i catyi ra Jesús: Quisi ndyaca ndo zuhva ca tyiyaca sa naca tiin ndo.

¹¹ Ta i sahan ra Simón Pedro ndya nu ndyaa barco, ta xita ra taraya tyiyaca nahnu cuan ndya nu ñiyiti. Ziendu uu xico usi uñi tahan ti ñoho, ta ñá tahndya taraya vazú cuaha xaan ti.

¹² Ta i catyi ra Jesús sihin ra: Ñaha ndo vatyí curumuza ndo. Ta yoñi ra cuñi nducu tuhun sii ra Jesús yoo ra cuu ra vatyí sa sito ra vatyí ra Jesús cuu ra.

¹³ Ta i sahan ra Jesús, ta i quihin ra pan, ta i saha ra sii si sii ra. Ta tacuan tucu tyiyaca.

¹⁴ Ta ihya cuu sa cu uñi tahan saha i cahan ra Jesús sihin ra i casi ra ta sa yaha sa nandoto ra sisi sa i sihi ra.

Zacuendon mvee ticatyí zone

¹⁵ Ta sa yaha i curumuza ra, ta i catyi ra Jesús sihin ra Simón Pedro: Simón, zehe ra Jonás, ¿atu cuñi xaan con sii ta ziquì ca inga ra ya? Ta i catyi ra Pedro sihin ra: Avi, tata, sa siton vatyí cuñi suun. Ta i catyi ra Jesús: Cuhvon sa casi mvee ticatyí lee zone.

¹⁶ Ta ziquì i catyi ra Jesús sihin ra inga saha: Simón, zehe ra Jonás, ¿atu cuñi xoon sii? Ta i catyi ra Pedro: Avi, tata, sa siton vatyí cuñi suun. Ta i catyi ra Jesús sihin ra: Zacuenda vohon sii mvee ticatyí zone.

¹⁷ Ta ziquì i catyi ra Jesús sihin ra sa cu uñi saha: Simón, zehe ra

Jonás, ¿atu cuñun sii? Ta cuihya xaan i cuñi ra Pedro vatyí sa i nducu tuhun ra Jesús sii ra sa cu uñi tahan saha: ¿Atu cuñun sii? Ta i catyí ra sihin ra: Tata, sa sito moo tandíhi cuii. Sítón vatyí cuñi suun. Ta i catyí ra Jesús sihin ra: Cuhvon sa casi mvee ticatyí zone.

¹⁸Sa ndisa ta sa ndisa catyí suhun vatyí quívi i culuhlun ta i cuu ndíhvun zahmon maa tuhun ñun, ta sohon ndyamaa cuñun cuhun. Zoco quívi cua cusahnun cua zandundoon ndohon, ta inga ra cua natyíhi ra zahmon suun. Ta cua cundyaca ra suun nu ña cuñun cuhun. Tacuan i catyí ra Jesús sihin ra Pedro.

¹⁹Ta sa i catyí ra Jesús tuhun cuan, i saha ra cuhva cutuñi ñi ra yozo caa cua tahan si sii ra Pedro sa cua cuu ra, ta cua zacahnu ra sii ra Ndyoo cuhva cuan. Ta sa ndíhi cahan ra Jesús tacuan, ta i catyí ra sihin ra: Cundyicon sii.

**Mínoo ra i casi ra Jesús,
ra sa cuñi xaan ra**

²⁰Tacuan ta ziqui i nandyehé sata ra Pedro, ta i ndyehé ra vatyí

ndyico inga ra i casi ra Jesús, ra sa cuñi xaan ra Jesús. Zuun ra cuu ra sa nañaa sii ra Jesús mínoo sa cuaa nu cua cuxíni ra nu i nducu tuhun ra sii ra Jesús: ¿Yoo ra cua xico tuhun suun?

²¹Ta sa ndyehé ra Pedro sii ra cuan, ta i nducu tuhun ra sii ra Jesús: Tata, ¿ta ñaa sa cua cuu sii ra ya?

²²Ta i catyí ra Jesús sihin ra: Tatu cuñi vatyí ndoo ra ñuu ñiyívi ndya quívi cua quisi ¿ta ñaa sa cuenda oo? Yoho cundyicon sii. Catyí ra.

²³Yucuan cuenda i quita tuhun ya, ta i sica ñi tandíhi ñiyívi sino ñi vatyí i catyí ra Jesús vatyí ma cuu ra cuan, zoco ñá catyí ra Jesús sa ma cuu ra. I catyí ra: “Tatu cuñi vatyí ndoo ra ndya quívi cua quisi ¿ta ñaa sa cuenda oo?”

²⁴Ta zuun ñi maa ra cuu ra saha sa ndaa sa cuenda tuhun ya. Ta sito ndi vatyí ndisa cuii sa ndaa sa saha ra.

²⁵Ta iyo cuaha xaan ca sa i zavaha ra Jesús. Ta sica ñi vatyí tatu cua tyaa ñiyívi sii si mínoo sí, ma cutahan tandíhi libro nu sisi ñuu ñiyívi. Ndíhi si vityí.